

MATIU

Matiu ka lamana'amu koyo'ehina

1 ¹Ma fayahi Yesu Kilisitohi tata'agi enigi'ani mana ni'ibe. Yesuhi tata'afu mone Tebiti yabe. To ana bomofihhi tata'afu mone koyapa bo gi'a Abalaha yabe.

²Abalaha ai Isakahi afo'afu yabe. To Isaka ai Yakopuhi afo'afu yabe. To Yakopu ai Yutahi to gona'amagihhi afo'anifu yabe. ³To Yuta ai liha'a Tema yagi etali pana'atiti loemo Pelesi to Yelaha yabe. To Pelesi ai Hesolonihi afo'afu yabe. To Hesoloni ai Lamihi afo'afu yabe. ⁴To Lami ai Aminatapehi afo'afu yabe. To Aminatape ai Nasonihhi afo'afu yabe. To Nasoni ai Salamohi afo'afu yabe. ⁵To Salamo ai liha'a Lehapu yagi etali pana'atiti Boasa yabe. To Boasahi ai liha'a Luti yagi etali pana'atiti Opeti yabe. To Opeti ai Yesehi afo'afu yabe. ⁶To Yese ai Tebitihhi afo'afu yagi ya'ma Tebiti sipi kibina bo huto hu'ehina yabe.

To Tebitiu ai mone bo Yulaiya yabe ana bomofihhi liha'a Tebitiu lilago pana'a keto'ehina gi'a Solomoni yabe. ⁷To Solomoni ai Lehoboamuhhi afo'afu yabe. To Lehoboamu ai Abaiyahi afo'afu yabe. To Abaiya ai Asahi afo'afu yabe. ⁸To Asa ai Yehosofatihhi afo'afu yabe. To Yehosofati ai Yolamuhhi afo'afu yabe. To Yolamu ai Asaiyahi afo'afu yabe. ⁹To Asaiya ai Yotamuhhi afo'afu yabe. To Yotamu ai Ehasihhi afo'afu yabe. To Ehasi ai Hese kaiyahi afo'afu yabe. ¹⁰To Hese kaiya ai Manasehhi afo'afu yabe. To Manase ai Emosihhi afo'afu yabe. To Emosi ai Yosaiyahi afo'afu yabe. ¹¹To Yosaiya ai Yekonaiyahi to gona'amagihhi afo'anifu yagi fateha'animagi enali'i Bebiloni metoga enele'mete bi'ahanamofihhi kana'a yabe.

¹²To ana Bebiloni melugu mine'ahananamofihhi kana'agu Yekonaiya ai Sialitihhi afo'afu yabe. To Sialitihhi ai Yelabelihhi afo'afu yabe. ¹³To Yelabeli ai Abiutihhi afo'afu yabe. To Abiuti ai Elaiyakimihhi afo'afu yabe. To Elaiyakimi ai Asohhi afo'afu yabe. ¹⁴To Aso ai Yatokihhi afo'afu yabe. Yatoki ai Ekimihhi afo'afu yabe. To Ekimi ai Eliutihhi afo'afu yabe.

¹⁵To Eliuti ai Eliesahi afo'afu yabe. To Eliesa ai Matanihi afo'afu yabe. To Matani ai Yakopuhi afo'afu yabe. ¹⁶To Yakopu ai Yosefehi afo'afu yabe. To Yosefe Maliahi baha'a yabe. Ya'ma Malia ai Yesuhi ito'afu yabe. To Yesuhi gi'a mone Kilisito yabe. Ana gi'amofihhi hapa'a Hu'mau le'mo ho ti'ehina bo nelanamo ni'ibe.

¹⁷Ya hu'ehigo asaga Abalahahi naga'aloti tito Tebitito pa sago nayahi luga luga su hoto nigigusagati loegi loegi heleko malago naga'i mine'ahana yabe. To nayahi luga luga su hago to nigigusagati loegi loegi heleko malago Tebitihi megesaloti tigo minana enali Bebiloni hepato enele'mete bi'ahana. To ana huto nayahi luga luga su holoto nigigusagati loegi loegi heleko malago minana naga'a enali mineme tite Mesiau huto hina kanalo mine'ahana yabe.

Malia ai Yesuhi keto'ehina

¹⁸Yesu huto hu'ehinamofihhi kaga'a ma huto ni'ibe. Ai ito'afu Malia, ai Yosefe hiti li alobole hilu'ibe lite kehelite mine'aha'ina. Ya hu'ehina etali li alobole hite yafi gofa hete etayanugu meli'aha'inamo Maliau molo kehelina Sikalafu'uba ailugu minago yagapana'i ketalube'mu hu'ehina yabe. ¹⁹Maliahi baha'a Yosefeu, ai bati bo, to ai Maliahi ya hu'ahane luto le'mo buya mehu'ehina. Ai legeso huto fala kito suguna'i Maliahi he'mi etalube luto keheli'ehina. ²⁰Ai Yosefeu Maliahi suguna'i he'mi etalina ekesa yigiba yigiba huto nohigo bamulugu agelouba bulo huloto ma luto lu emi'ehina: Yosefeo, Abalahahi tata'aga, kai Maliahi lihaka le'mo lolo hilatana'mu koli mehobo. Ai Sikalafu'uba Maliahi yagapana'i emi'ehibe. ²¹Ai pana'i ketolenogo kai gi'a Yesu yabe luto hobo. Hena'mugope ai boana'amagihi foipana'ani li he'mi epoloto hetofa kapogu enele'mo malalina'mu yabe luto Sikalafu'uba Yosefehi lu emi'ehina yabe.

²²Ya'mana asaga'na ma huto huto hilina ai kaga mone Sipi Bouba lu huto huto bomofihhi bagagu lulago o'ehinamofihhi legeya'a huto hilibe. Lu huto huto bouba ma luto lu'ehina: ²³Yafana'uba yagapana hiti huloto pana'i ketoto gi'a Emanueli luto malalina'mu yabe. Ya'mana gi'amofihhi hapa'aya ma luto ni'ibe: Hu'ma lali hiti nominabe.

²⁴Yosefeu bu'i ko'ehinati ho tiloto Hu'mamofihhi agelo'auga bamulugu lu emina'a huto Maliahi li eto'ehina. ²⁵Ya hu'ehina Yosefeu ai Malia hiti nohi kete ya hite mehuse nohigo Maliau pana'i keto'ehina. Ya higo Yosefeu ana pana'mofihhi gi'a Yesu yabe luto molo'ehina yabe.

Keheli bati huse bomagi Yesutoga e'ahana

2 ¹Yesuhi Betelehe hepato Yutia melugu Heloti sipi bo minana kanagu Maliau keto'ehina. Ya hulago alihi keheli bati huse bo luga'a enali yege notinagati sonofi'i kene ite Yelusale hepato neheti'ahana. ²To enali ma lite enoloka he'ahana: Yuhufa pana'i huto hu'ehina ai Yuta bona'magi

sipi bo'ani lolo hilina hiya'a nohibe? Ai sonofi'a yege notinagati ti'ehigo bu golototi lali fokehi halune luto noone lite li'ahana yabe. ³Sipi bo Heloti ya'mana kaga keheliloto topa holoto lesa'a noligo ana huto asaga Yelusale boana'i enelesa lu бага i'ehina yabe. ⁴Helotiu asaga keya ka tisa bona'i to mono noto kaba bona'i kehe i nupa iloto ma luto enoloka ho'ehina: Mesia hiya'alo huto nohilina ni'ibe? ⁵Enali lu emi'ahana: Betelehe hepato Yutia melugu yabe. Lu huto huto bouba ya luto fayanugu go molo'ehina yabe:

⁶ Kai Betelehe Yuta melugu,
 kai sipi bo Yuta me'i kaba hi'ahana bo
 enali enemege'i olata mehobo.
 Kailuguti sipi bo mone huto huloto
 to ai Isilaeli naga'nimagi
 kaba hu epalalina'mu yabe.

⁷Ya higo Helotiu Yesuhi bu galune lite yege tinagati ana bona'i kehe iloto ma luto suguna'i enoloka ho'ehina: Hena kana'alo ana sonofi'i huto hu'ehifi luto enoloka ho'ehina yabe. ⁸To ai ana bona'i he'mi epalago nebago ma luto kaga lu epolo'ehina: Bite ana pana'i sa hu bati hilete to bu getetinimo lenali ete lu nimilo, ya hinogo nani ana huto buto ai kumu fokehi halube. ⁹Enali Helotihu kaga'a akehelilete abi'ahana. To enali ana sonofi'i koyapa'i yege notinagati bu gelete lifite e'ahana kohe to epoloto buto ana pana'i nohina noto lataha'alo mino'ehina yabe. ¹⁰Enali sonofi'i bu gelete komopa bati higo sipi enegelo bi'ahana yabe. ¹¹Enali ana nonuga tilete ana pana'i ito'afihi Malia hiti neha'igo enali enalapusa fi emilete mono ka li etete hilete sisaku gu'aniguti hetofa hatofana hefite emi'ahana.

¹²To bamulugu Hu'mau hu enubulo mololoto Heloti nohinaga mebilo luto lu epigo enali fato kapoga bite hepa'aniga neheti'ahana yabe.

Iyipitoga bi'aha'ibe

¹³Enali abilago Hu'mamofih i agelo'auba Yosefahi bamu'i hu bulo mololoto ma lu emi'ehina: Ho tito pana'i hiti ito'afi hiti etele'moto koli huto Iyipi melugu buto nohitogo alihi nani lu kiminogo'ni alane. Helotiu pana kumu sa huto halina'mu yabe. ¹⁴Ya ligo ana folugu'i Yosefeu ho tiloto ana pana'i ito'afi hiti etele'moloto Iyipitoga bi'ahana.

¹⁵Ya hite anaga nehago Helotiu fili'ehina yabe. Ya'mana kana Hu'mau lu yege hose bomagi enabagagu lu'ehina nose'na'a huto hilibe luto Iyipi meluguti aku'i kehe ugo o'ehina yabe.

Helotiu ligo babu yagapana'i enoho fili su he'ahana

¹⁶Yege notinagati Yesuhi bu galune'mu ana bona'i enali Helotihu ya hite mi'i malana akeheliloto italuga logo bi'ehina. Ya higo ai bona'i luga'a enoho lifigo

Betelehe hepato hiti to hepa'i luga'a ana lebato ninalo hiti asaga pana'i kufu'ani loemo bu'ehinafi to yuhufa huto nehana asaga'i enoho fili su he'ahana. To ai yege notinagati ana bomagihini enoloka nohago lu emina kaga ekesa yigiloto yabe.

¹⁷Ya hu'ehigo kaga mone Hu'mau koyapa'i lu huto huto bo, Yelemaiyaha, bagalo molo'ehina'a huto nohibe luto lu'ehina:

¹⁸Enali Lama hepaluguti
 bona nogo mone keheli'ahana.
 Sipi eniginaga figo
 yibi ahi ahi lite nehana
 enali keheli'ahana
 Laseliu ai yagapana'a asaga'i
 afili su he'ahago
 sipi yibi huto minago
 bona'magi le'mo fulu mone mehi'ahana.

Yosefeu liha'a hiti to pana'a hiti aku'i e'ahana

¹⁹Alihi Helotiu afililago Hu'mamofihini agelo'auga Yosefhi Iyipi melugu bamu'i hu bulo moloto ma luto lu emi'ehina: ²⁰Ho tito pana'i hiti ito'afi hiti etele'moto Isilaeli hepatoga aku'i bubo, enali pana'i halune'mu sa sa hi'ahana bona'i yatai afili'ahabe. ²¹Ya ligo Yosefeu ho tiloto ana pana'i ito'afi hiti etele'moto Isilaeli hepatoga aku'i legete bi'ahana yabe.

²²Ya hu'ehina Akeleasiu afo'afihini Helotihini nona'a Yutia bona'magihini kaba bo'ani nohibe lana Yosefeu koli huto Hu'mau bamulugu kaga mone hiti lu emigo keheli'ehina. Ya huloto ai ana hepa he'mito Galili kegi'a bu molo'ehina yabe. ²³Ai buto Nasalete hepato nohi gito mino'ehina. Ya higo kaga lu huto huto bona'magi li'ahanauba legeya'a li huto nohibe lite li'ahana: Enali Nasalete bo yabe lite lilata hilana'mu yabe.

Yoniu nagami folo epolose bouba mono ka lu epi'ehina

3 ¹Ya'mana yupahi Yoniu Yutia kamelugu humofa'na huto mono ka ma luto lu epimofa'na hu'ehina: ²Komopatini i gelehe hite foipanatini he'mi su halo lu'ehina. Hu'mamofihini kokulumalugu kapo'a hokolo hilina kana'a epi'ehina. ³Hu'mamofihini baga'a lu huto huto bo Aisaiyau liyafa huloto ma luto Yoni kumu'i lu'ehina yabe:

Bona'i menehanaga meluguti bo mone'mofihini
 bagaguti ma luto nolibe:
 Sipi Bomofihini kapo'a li loloba hi etalo.
 Kapo kuyugu hu'ehilina li fu nelite
 li yuhufana hi ete'ehinogo
 ai analo kapo malalibe.

⁴Yoniu gukete'a hepilata hina kameli yaga oka'a gukete hepito humofa'na hu'ehina. To gilimi'a fatipagu ilata hinaya yaga gufa'atu lolo

huto i'ehina yabe. To kenu'i hiti to lopi upe'i fi'ehina'a hiti nose'na'a nolata hu'ehina yabe. ⁵Ana yupahi Yelusale bona'i to Yutia kegi'a bona'i to asaga hepa'i Yotani nagami bele belehi ninalo neminana bona'i asaga'i Yonihi aitoga e'ahana. ⁶Ya hite foipana'ani aitoga pa sago Yotani nagamilugu nagami folo epolo'ehina yabe.

⁷Yoni Felosi bona'i to Satusi bona'i babu lite nagami'i folo letalane lite ago bu enogoloto ma luto lu epi'ehina: Lenali foipa osifa'mofihi yagapana'a, kuyu'afu lu lepigo Hu'mamofihi italuga logo bise'na alihi huto hilube'mu nohina koli falalune'mu nehabe luto ka epeki'ehina yabe. ⁸Lenali komopatini i gelehe hilete yalo etonaguti mineme binogo buto komopatini i gelehe i бага ilibe. ⁹Lenali lenipatinigu ma lite mekehelilo: Abalahau ai afotifu yabe, lali mino fu luse bona'i Hu'mau lifisa meilibe. Nani lu nolepube, Hu'mau ai ka'ma nina efahi liloto Abalahahi pana'a lolo hilina bati nohibe. ¹⁰Luhi loloba huto yafa hapa'alo ni'ibe. Asaga yafa legeya'a mehalinamofihi hetigi su hoto logogu genogo logouba lo su halibe. ¹¹Lenali komopatini i gelehe hana'mu luto nani fa'mene nagamitu nofolo lepolobe. Ya nohunaya ai bo mone nani nemegelesalo alina boubu ai Sikalafu'i to logo'a hiti folo lepalalina'mu yabe luto Yoni lu epi'ehina. ¹²To ai emuha'a yanuga li'ehibe. To kifi foyaguti lilina yabe. To ai nose'na yufagaha'a li nomalana nonugu li nupa huto li malalina'mu yabe. To yana huto sibina'a li nupa huto mesobose loba logogu galina'mu yabe.

Yoni Yesuhi nagami folo eto'ehina

Mk 1:9-11; Lk 3:21-22

¹³Ya luto lu'ehina kana'aluga Yesu Galili hepa'i he'mito Yotani'i kegi'a Yoni nagami'i folo netalibe'mu yabe luto bu'ehina. ¹⁴Ya hu'ehina Yoni: O'e, luto laga hu etoloto ma luto lu emi'ehina: Kai nagami folo netalata bati huto ni'inamo kai nanitoga noane. ¹⁵Ya ligo Yesu ka'alo ma luto lu emi'ehina: Ana'a hiligi ya meluto yatai kai lu nokumuna suhi hubo. Ya huto ya'ma kapolo li moloto hilu'inauba Hu'mau lu'ehinamofihi hinogo bati hilina'mu yabe. Ya ligo Yoni Yesuhi kaga lina mege'i moloto nagami folo eto'ehina yabe.

¹⁶Yesu nagami'i afolo etolago mele'isi fa'mene kugutatoga ti molo'ehina. Ya nohigo analo kokuluma'i hokolo nohigo anaguti Hu'mamofihi Sikalafu'a limi'ehina, ai kigopa nama legitana lolo huto oto Yesuhi lataha'alo fi besa lo'ehina yabe. ¹⁷Ya nohigo kokulugaluguti kaga mone ma luto lu'ehina: Ya'ma nani'ni pana'ni mana'a nohibe. Laga nebesina pana'ni nohigo ai kumuko hetofa pana'ni yabe luto negelo bi emilata nohuna yabe luto kokulugaluguti lu'ehina yabe.

Satau Yesuhi mi'i molo'ehina

Mk 1:12-13; Lk 4:1-13

4 ¹Ya hulago Hu'mamofihi Sikalafu'auba Yesuhi le'moto ka melugu Satau fi taga hu etalibe luto bu'ehina. ²Yesu yege 40 to 40 sinihi

nose'na menose anaga mino'ehina. Ya huloto alihi sipi kau'na ho'ehina.
 3 Ya higo Satau aitoga henetiloto ma luto lu emi'ehina: Kai Hu'mamofih
 pana'mo nohutomo ka'ma ni'ina efahi lu epitogo nose'na lolo hino.

4 Yesu ka'alo nona'a ma luto lu emi'ehina: Monolugu ma luto ni'ibe:
*Bona'mofih komopa'a nose'nauba li buto mebilina ai asaga kaga Hu'mau
 molo'ehinaubagoko le'mo buto bito hetofa kapolo malalina'mu yabe.*

5 Ya luto ligo aku'i he'mito Satau Yesuhi le'moto mone hepato buloto
 mono nohi lataha'a kosa kosa hu'ehinalo le'moto tito he'mi etoloto 6 ma
 luto lu emi'ehina: Kai Hu'mamofih pana'a nohutomo maloti heleko lago
 uma melugu limibo. Mono kauba ma luto lulata nohibe:

Hu'mau kai kumu luto
 agelo'a enoho lifinogo limite nehinogo
 enali enayanugu limito ketogo
 kele'mo saga hilana'mu yabe.
 Ya hinogo efahuba kigika noto
 ya huto mehiline'mu yabe.

7 Ya noligo Yesu ka'alo ma luto nona'a lu emi'ehina: Monolugu mone'a
 hiti ma luto ni'ibe: *Kai Sipi Bomofih fi taga mehu etobo, ai Hu'makafu
 nohibe.*

8 To yaloti he'mito Satau Yesuhi le'moto yatama kosa mone ninalo
 le'moto tiloto asagako kapo lepito anana anana hetofana ninamofih
 lepi'ehina. 9 Ya huloto ma luto Yesuhi lu emi'ehina: Kai kolohupa nohi
 filoto nunumu lu netoto nigi li saga huto nofokehi halata asaga'na kaigo
 kimi su halube. 10 Ya ligo Yesu Satahi ho lifito ma lu'ehina: Satao, abufa
 hubo. Mono kauba: *Hu'mamofih Sipi Bo aisigo gi'a li saga huto fokehi hoto
 agoya hu emibo,* luto lulata nohibe.

11 Ya ligo Satau he'mi etoto abufa nohigo agelomagi ete analo Yesuhi
 he'me'ahana yabe.

Yesu Galili melugu lili'na hapi fi'ehina

Mk 1:14-15; Lk 4:14-15

12 Yonih naga foyagu le'mo malabe lite lana'a Yesu akeheliloto ai Galili
 melugu bufa hu'ehina. 13 Ya huloto ai Nasalete hepato memino'ehina ai
 he'mito buto Kapaneami hepato mino'ehina. Kapaneami ai Galili Hefuhi
 beleha'alo Sebuluni to Nafatali melugu mino'ehina yabe. 14 Ya hu'ehigo
 Hu'mau kaga mone lu huto huto bo Aisaiyaha bagalo molo'ehinauba
 legeya'a huto nohibe. Ai ma luto noli:

15 Sebuluni me'i to Nafatali me'i
 nagami hefutoga nina,
 to hepa'i Yotani Nagami beletoga
 mino bego bego hu'ehina,
 to Galili ifo'aga

fegutoga bona'i neminana kegi'a yabe.

- ¹⁶ Bona'i enali metepunagu neminana
enali sipi logo fana mehena'a abu ge'ahabe.
Enali bona'i metepu ito
filisemofihhi hepa'i ninalo neminana
enalitoga fana mehena
ahuto hu epolo baga i'ehibe.

¹⁷ Ya'mana kanaloti hapi fito Yesu mono ka ma luto lu epi'ehina:
Foipanatiniguti komopatini i gelehe hilo. Kokulumamofihhi kapo'a anasi
a'o leba to'ehibe.

Loegi loegi bo Yesu kehe igo mege'i mele'ahana

Mk 1:16-20

¹⁸ Yesu Galili nagami Hefuhi beleha'aga kapo moloto notubuto loe
kogunale bu etogo'ehina. Simoni, enali Pita lite gi'a helata nehana
hiti to gona'a Atulu, etali hefunugu faya gutalafa melete neha'igo bu
etogo'ehina. ¹⁹ Ya huloto Yesu ma luto lu etimi'ehina: Nani nemege'i
mele'inogo nani letelepinogo'ni bona'i enele'mo kefefehite lila'ibe.
²⁰ Ya ligo etali hololu lite faya gutalafa'atiti nehe'mite Yesuhi mege'i
mele'aha'ina yabe.

²¹ Bu foto'alo mololoto ana huto kogunale Yemesi to Yoni, etali Sepetihhi
pana'a neha'igo bu etogo'ehina. Etali boti'atitigu afo'atitifi hiti faya
gusalafa li loloba hite neha'igo Yesu kehe i etimi'ehina. ²² Ya higo hololu
lite afo'atitifi hiti to boti hiti nehe'mite Yesuhi mege'i mele'aha'ina yabe.

Yesu babu boana'i enele'mo bati huto mono ka lu yege ho epi'ehina

Lk 6:17-19

²³ Yesu Galili kegi'a minomofa'na huto mono noha'anigu tiloto boana'i
mono ka lu epila to Hu'mamofihhi Kapo'a kumu kaga lu epila nohuto to
boana'i enebesiehinana li he'mi epolola to enigi enayahi sibina hula ya
hula hu'ehina bona'i enele'mo bati hu'ehina yabe. ²⁴ Ai kaga'a Silia kegi'a
bu baga ilago kehelilete enali bona'i anaga enebesinafi to foipa li'ahana
bona'ifi to fato fato'na epesiehinana bona'i enele'mete Yesu nohinalo
e'ahana. Ya hago Yesu asaga bona'i enele'mo bati nohuto enele'mo ye
ko su ho'ehina yabe. ²⁵ Babu boana'i Galiliti Tekapoli kegi'ati to Yelusale
hepatoti, Yutia kegi'ati to Yotani beletoga neminana boana'i asaga'i babu
lite li nupa hite, Yesuhi mege'i molomofa'na hi'ahana yabe.

Yesu kaga kosagu lu epi'ehina

5 ¹ Yesu bu gana babu boana'i mege'i lifite nebago ai kosagu tito analo
nohigo koko panana'a ai metoga ete mino bego hi'ahana. ² Ya hago
Yesu kaga ma luto lu epi'ehina:

Bouba gelo bilinamofihi kaga'a lu'ehina

Lk 6:20-23

³Bona'i enali komopa'anigu nani bati mehina bo nohube lite kehelite ya'ma minelata nehana enali enegelo bilo. Enali Hu'mamofihi kapo'alugu tilana'mu yabe. ⁴Bona'i enali eniginage figo neminana enofokehi lilo. Hu'mau enele'mo fulu hu epoloto soso hu epalalina'mu yabe. ⁵Agoya bona'i enali enegelo bilo. Enali kaga molo epolo'ehinalo asaga me'i lilana'mu yabe. ⁶Bona'i enali bebe sete hapa'ani minenogo Hu'mamofihi ka'alo mege'i melete minalana enali enegelo bilo. Hu'mau alihi asaga'na epilina'mu yabe. ⁷Bona'i enali luga'a bona'i eniginaga ka lu epite agoya hu epilata nehana bona'i enegelo bilo. Alihi Hu'mau enegelo bi epito agoya hu epilina'mu yabe. ⁸Bona'i enali komopa'ani gulu gulu ligo neminana bona'i enali enegelo bilo. Enali Hu'mamofihi bu galana'mu yabe. ⁹Bona'i enali luba hilune'mu nehinogomo ana luba folagaha'anigu bite kofa hu epelelata nehana bona'i enali enegelo bilo. Hu'mau ai panana'ni yabe lilina'mu yabe. ¹⁰Hu'mamofihi ka'a mege'i melete minelata nehana bona'i enali enagabu foya nelitemo enegelo bilo. Hu'mamofihi kokuluma kapo'a enali'na lolu hilina'mu yabe. ¹¹To lenali nani'i nemege'i melete neminenogo luga'a bona'magi bu lenegelete enitaluga logo binogo foipa faipa ka li lepelete lenegene mane ite ka fato fato'mofihi lenalitoga lu nemelenogomo lenali lenegelo bilo. ¹²Ya nehinogomo kugufaluga laga kebesinogo kegelu bibo. Sipi minaka kokuluma hepatoga Hu'mau kaba hu keto'ehina kimilina'mu yabe. Koyapa'i ana suhi hite lu yege hose bona'i kohe tete huto hanamagihi enegene mane ite enehe'ahana yabe, luto Yesu lu epi'ehina yabe.

Bo ai hege legi to logo guluya meha'a legi huto nohibe

Mk 9:50; Lk 14:34-35

¹³Bona'i lenali me'mofihi hege'a legi hite nehabe. Ya hu'ehina ana hegemofihi laga'a abu su holagomo lenali aku'i hena hago ana hegemofihi laga lenalitoga olata nohibe? Ya hina hegemofihi lilina'a meminolata nohibe. Enali bati mehu'ehibe lite li nehe'migo boana'i analo lapasa ite kapo melelata nehabe.

¹⁴Lenali melugu fana mehena'a legi hite nehabe. To hepa'i mone kosagu minolata nohina ana hepa'i bona enubulo fala kito meminolata nohibe. Ai huto'i minolata nohibe. ¹⁵Bona'i enali libi'i li kulu tilete somotu ifi metalibe. Enali ifo hitalo malago nonugu nehana bonatoga kululu tuto fi besa lo бага igo be ge fana tete minelata nehabe. ¹⁶Ya huto ninagi lenali libitini ligite boana'i enali enubulo binogo lenali hetofa hapatini bu gelete to enali ana hite Sipi Bo Hu'matinifu kokuluma hepatoga nohinamofihi enegelo bite gi'a liyafa hilabe.

Keya ka hapa'amu lu enelep'i'ehina

¹⁷Lenali nani kumu'i Mosehi keya ka'a hiti to lu yege hose bona'magihi ka'ani hiti li he'milube luto o'ehibe lite mekehelilo. Nani li he'milube luto meo'ohuna ana kaga'a lu'ehinamofihi pa salibe luto o'ohuna yabe. ¹⁸Ule'ale huto lusiga ma'naka luto nani lu nolepupe, asaga'na ma me'i hiti kokuluma hiti su hoto bilinaya Hu'mamofihi keya ka'a kitili kitili'na su hoto mebilina analo minoba minoba hilina'mu yabe. ¹⁹Ya hu'ehinagi bo moneuba Hu'mamofihi keya ka'a nesi'asi li gofa hoto pelesa iloto luga'a bona'i ana suhi huto enelepilina kokuluma kapolo gi'a nesi'asi minalibe. To bo moneuba hetofana huto keya kamofihi liyafa huloto mege'i moloto nominoto boana'i ma kaga mege'i malalo luto enele'mo ho tiloto hetofa kapogu malalina ai kokulumalugu sipi gi'a minalina'mu yabe. ²⁰Ya hu'ehina nani lenekesa nobube. Lenali Hu'mamofihi laga besina suhi hite hetofanaguti minalanauba Felosi bona'i hiti to keya kaga enelepise bona'magihi hapa'ani enebe liginogoko lenali kokuluma kapolo nehetilana'mu yabe luto Yesu lu epi'ehina yabe.

Enipagu logo bisemofihi hapa'a

Lk 12:57-59

²¹Koyapa'i kaga mone ma lite keya kagu tatatinigihi lu keye'ahana akeheli'ahabe: *Bo moneuba mone bo ho fililina ana bo ai ka foyagu filina'mu yabe.* ²²Ya hu'ehina yatai aku nani lu nolepupe. Bo moneuba gona'a ipakafa halina ai ka foya lilina'mu yabe. To bo moneuba gona'amofihi kaiya fa'mene bati mehina bo nohane luto ka emekilina kanisole bolo ho tito ka foya lilina'mu yabe. To bo moneuba gona'amofihi negi nagi noto bati mehu'ahata bo nohane luto ka emekilina aiya loba loba logo kapogu bilina'mu yabe luto Yesu lu epi'ehina yabe. ²³Ya hu'ehinagi kai Hu'mamofihi lokiya fi emilube'mu hitalo oloto yata'a kogonaka ka emeki'ehilata kekesa hokolo hinogomo ²⁴asaga'na ana hitalo nomoloto hololu luto buto kogonaka le'mo fulu huto ya huto kipakafa hoto ka emeki'ohuna yatai lubeyaga nounagihe luto li koguna ilete'atiti yalo alihi oto Hu'mamofihi hitalo lokiya fi emibo.

²⁵To bo moneuba ka foyagu kele'mo malalube'mu kele'moto nobinogomo kapoga nebitetiti kai mele'isi hololu luto ipakafa mehoto kiya yogokolo hu emibo to ka hetofa'a lu emito koguna ito minobo. Bonaka ana bouba yasimofihi yato kele'mo melenogo to yaloti ya'mauba polisi bomofihi yato kele'mo melenogo yaloti polisi bouba naga foyagu kele'mo molo lalibe. ²⁶Ya hinogo anaga nohutoka efahi tina hu keto'ehinamo molo emiloto nagaluguti su halane, to tinakalo emi pa mesotomo ana naga foyagu minomo buto emiletogomo su halata'mu yabe, luto Yesu lu epi'ehina yabe.

Bo alobole li sibina husemofihi hapa'a

²⁷Lenali koyapa'i ya'ma kaga lago akeheli'ahana yabe. *Lenali bo alobo gofa mehalo.* ²⁸Ya hu'ehina nani yatai ma luto lu nolepube. Bo moneuba a'i mone bu goloto bulu'i hoto ipa'a emitto minalina, ai komopa'agu ya huto kehelilinauba, ai alobo huto minosemofihi keya ka'a li gofa hoto komopa'agu foipana nohibe. ²⁹To lamagakaga kubukauba ligo foipana nohutomo li kutu hoto he'milago bubo. Kugufaka luga kegi'a fenene hinogo nohuto minoba minoba kapogu bilata bati huto yabe. To kugufaka asaga'i ni'inogo nohuto logo kapogu bilata ya bati mehu'ehibe. ³⁰To kayahi lamaga'auga ligo foipana li huto nohutomo ana kayahi laga huto he'milago bubo. Mone kayahi laga hu he'milago ya hina bati hutita'mu asaga kugufaka ni'inogo logo kapogu bilata bati mehutita'mu yabe.

Bo alobo loko husemofihi hapa'a

Mt 19:9; Mk 10:11-12; Lk 16:18

³¹Koyapa'i bina kagu ka mone ma luto mino'ehina yabe: Bo moneuba liha'a he'mi etalube'mu nohutomo fayahi mone ya huto liha'ni he'mi etobe luto koyoto emibo luto nina yabe. ³²Ya hu'ehina nani yatai lu nolepube. Bo mone'mofihi liha'a fato bo hiti koto ho tito mehuse bati huto nominago to ana bouba ya'ma liha'a he'mi etolenogo to yalo ana liha'auga fato bolo buto minalina ai ya'ma bomofihi hapa'auga ligo liha'auga li alobo hu'ehina keya ka gofa nohabe. To bo moneuba ana a'i lilotomo ai bo alobomagi keya ka li gofa holago foipana'a nominabe.

³³To mone keya ka tatatigi alago lenali hiti akeheli su he'ahanaya ma luto ni'ibe: Kaga mone nolutomo ana kaga faga yabe'amu le'mo amuya malalube'mu lutomo lusiga luto ifoloti nolube luto melubo. To lusiga nolutomo lusiga ma'naka nolunagihe luto lu hokolo huto lubo. ³⁴Ya hu'ehina yatai nani lu nolepube. Lenali kaga mone le'mo amuya malalune'mu nehitemo ifo muya kokuluma hepatoti nolune lite melilo. Kokuluma'i ai Hu'mamofihi hepa'a ni'ibe. ³⁵To lenali kaga mone le'mo amuya malalune'mu nehitemo me'i gi mehalo. Me'i Hu'mamofihi lagaso hepa'a ni'ligo ai'nanalo gi'a mololata nohibe. To lenali kaga mone le'mo amuya malalune'mu nehitemo lenali Yelusale hepa'i gi'a mehalo. Yelusale hepa'i ai Sipi Bomofihi hepa'a ni'ibe. ³⁶To kaga mone latahakalo li moloto lu amuya memolobo. Okaka legeya'a mone'isi koholina li lolo hula to nupa'na li lolo hula mehilata'mu yabe. ³⁷Ya hu'ehinagi lenali o'yo lila, to o'e lila hite ana'asiya lilata hilo. To kaga analo lu yatama hite lilata nehana kagamoya foipa bo Satatogati olata nohibe.

Bati mehina suhi nehanalo nona'a aku'i hulatamofihi hapa'a

Lk 6:29-30

³⁸Ya'ma kaga koyapa'i ahuto hina lenali akeheli'ahabe. *Kai kubuka i polo nehinogomo ana huto enali enubu i polo hubo. To kabaga yogo'a ife*

nesenogomo kai ana huto enali enabaga yogo'a ife sobo. ³⁹Ya hu'ehina nani aku'i yatai lu nolepube. Lenali bo moneuba osahi lenehenogomo lenali ana bo nona'a mehalo. Lenabaga hapa'alo lamagatiniga inogomo mone kegi'a i gelehe hu emitogo ino. ⁴⁰To bo moneuba ka foyagu kele'mo malalube'mu nohuto kefeka nolinogomo guka hiti heti emitogo lino. ⁴¹To bo moneuba ana'ina'a nehe'moto lito buto emasilo limilane linogomoya kai he'moto buto ai lu'ehina be ligito foto'alo emibo. ⁴²To bo moneuba ana'ina nimibo luto kehe inogomo kai emibo. To ana'ina kaitogati yoka'i lilune lite kehe neinogomo kai o'e luto kemegea hu meepibo.

Fatehe bona'i enele'mo laga husemofihi hapa'a

Lk 6:27-28, 32-36

⁴³Koyapa'i ya'ma kaga huto hu'ehina lenali akeheli'ahabe: *Lenali bona'i lenalalutinigigo enele'mo bati nehite fatehatini lenipakafa ho epite enele'mo fato malalo.* ⁴⁴Ya hu'ehina nani yatai aku'i lu nolepube. Fatehatini enele'mo bati nehite to lenali'i lenele'mo bati mehilana bonatoga nunumu Hu'mamofitoga hu epelenogo ai enehe'malibe. ⁴⁵Ya hilete yalo lenali kokulumalugu Afotinifihi panana'a lolo hilana'mu yabe. Ai bo foipa'afi to bo mana'afi enogo mone'ago huloto anabo anabo yege'amofihi fana meha'a epilata nohibe. To ana huto ko'i bo mana'a noepito bo sibina'a noepito hulata nohibe. ⁴⁶To lenali bona'i enipa lepilata nehana bona'i enipa epite enele'mo bati hilata nehanaguti hena mina'a lilana ni'ibe? Enali foipa boana'i hiti takisi lilata bona'i hiti ana suhi hilata nehabe. ⁴⁷To kai kalalukafinogo yahi emito be notigito fatehakamofito kubu bu go fatoga nomalata henanaloti luga'a bona'i enebe ligilata ni'ibe? To fegutoga bona'magi hiti ana suhi hilata nehabe. ⁴⁸Ya hu'ehinagi lenali asaga yupahi hetofanaguti minete hetofa foya lite bebe sete kokulumalugu Afotinifu hina'a hite minalo, luto Yesu lu epi'ehina yabe.

Bona'i enehe'mosemofihi hapa'a

6 ¹Lenali kaba hu bati hilo. Lenali hetofa hapatini asaga boana'magihi enubulo enali be galabe lite li huto hite lolo mehilo. To lenali ya hilana kokulumalugu Afotinifitogati mina'a melilana'mu yabe.

²To fe'noha'a meni'ise bomofihi ana'ina he'moto Emilube'mu nohutomo, kai fagalo bona'magi mono nonugu hila to kapo napagu hila nehana'a huto bona enubugu fi yotili katili ito bula ola mehobo. Ya hilata nehana bona'iya enali boana'magi bu lagalabe lite hilata nehabe. Nani lusiga luto lu nolepube. Enali alihi melilana mina'ani yatai alite neminabe. ³To fe'noha'ani menilina bona'i enehe'malube'mu nohutomo legeso huto fala kito suguna'i lolo hubo, to kayahi lamaga'agati ya hilube'mu nohutomo kayahi soga'a lu meemibo. ⁴To kai ya huto fenene huto suguna'i lolo huletogomo Afokafu kokulumalugu nohinauba asaga

suguna'na bu go baga ilata bouba bu kogoloto alihi mina kimilina'mu yabe.

Nunumumofihhi hapa'a

Lk 11:2-4

⁵Kai nunumu hilube'mu nohutomo fagalo bomagi hilata nehana suhi kai mehobo. Enali mono nonugu ho tite nehite nunumu lilata nehabe, to hepalugu sipi kapo i loe lae hu'ehinalo bite bona enubugu nehite nunumu hilata nehabe. Nani lusiga luto lu nolepube. Enali mina'ani ali'ahabe.

⁶To kai nunumu hilube'mu nohutomo legeso huto kose nohakagu tiloto kafeka li hekini loloto Afokafitoga numuna hu emitogo ai fala kito nohinati keheli ketalibe. To ai Afokafu asaga suguna'i ninana bu golata bouba bu kogoloto analo nona'a kimilibe.

⁷To lenali numuna hilune'mu nehitemo kegeiyo bona'magi nehana'a hite yatamalo kaga babu lite melilo. Enali babu kaga linogoti Hu'mau nunumuti keheli bati hilibe lite lilata nehabe. ⁸Lenali enali suhi lite enemege'i memalalo. Nunumu mehi'ahago Hu'ma Afotinifihhi kaga lu emilana'a komopatinigu abu go su holata nohibe. ⁹Lenali ma lite numuna hu emilo: Afotiga, kokulumalugu minane, kigika hetofa huto fato minalibe. ¹⁰Kai kapoka ai huto hino, luto nolune. Enali kabaga liyafa hite kokuluma agoya hi nekimigo lali melugu ana suhi huto kabaga liyafa huto kofokehi halune'mu nolune. ¹¹Kai yatai nose'nati limibo. ¹²To kai foipanati li he'mi letobo, to lali ana huto bona'magi foipana nehiletana li he'mi epalalune. ¹³Kai sipi fi taga huse'nagu lele'mo memoloto foipanamofihhi afo'afitogati lele'mo lubuto bibo.

¹⁴Kehelilo. Lenali bona'magitoga foipana li huto hu epele'ahana lenali li he'mi epelenogo, ana huto kokulumalugu Afotinifu lenali foipanatini li he'mi lepalalina'mu yabe. ¹⁵To lenali boana'i enali foipana'ani li mehe'mi epalana ana huto kokulumalugu Afotinifu lenali foipanatini li mehe'mi lepalalina'mu yabe, Yesu lu epi'ehina yabe.

Nose'na mo sisemofihhi hapa'a

¹⁶Lenali mono ka'mu lite nose'na mo site neminetemo fagalo bomagi hilata nehana suhi hite lenokaba li sibina mehilo. Enali enokaba li sibina hilata nehanaya asaga boana'magi bu enegelete nose'na mo si'ahabe lite lu epalalabe lite nehabe. Nani ma'naka luto lu nolepube. Enali ya hilata nehana bona'magi mina'ani ali'ahabe. ¹⁷Ya huto ni'inagi kai nose'na mo sito nominotomo okakagu mesebe nofoloto kokabaluga nagami koto li kosaba huto humofa'na hubo. ¹⁸Ya hitogo boana'magi enali ya huto nose'na mo si'ehina bo menohibe lite lilana'mu yabe. Ya huletogo Afokafu fala kito fenene nohuto asaga'na bu golata nohinauba alihi hetofa mina'a kimilina'mu yabe.

Hetofana li nupa hulatamofihi hapa'a

Lk 12:33-34

¹⁹Lenali ma melugu hetofa hatofa fe'nohatini li nupa mehilo. Ma melugu molepa kafamagi hiti to kagopa logose'nauba anana anana li sibina hulata nohigo to guminalo bomagi kafe sigite gumina felelata nehabe. ²⁰Ya hu'ehina lenali kokulumalugu'natini li nupa hilo. Asaga'na kokulumalugu nina ai kagopa melogolata nohibe, to molepa kafauba menolata nohibe, to guminalo bouba kafe sigito tito gumina melilata nohibe. ²¹Yogo fe'nohaka ni'ilinaga asaga yupahi komopaka minolata hilina'mu yabe.

Kugufakamofihi fana meha'a

Lk 11:34-36

²²Lubumoya lugufamofihi libi'a legi huto ni'ibe. Kubukauba bati huto ni'itomo asaga kugufakaloga i besa lo бага ilata nohibe. ²³To kubuka sibina hu'ehigomo asaga kugufakalo metepu i бага noibe. To kailugu fana mehena ninauba aku'i metepu hapi fito gilotomo analo sipi metepu i бага noibe.

Koko pana'uba loe bona'mofihi lili'na melilata nohibe

Lk 16:1; 12:22-31

²⁴Koko pana'i moneuba loe bolo moneko kumu lili'na lilata menohibe. Ya hilina ai mone bomofihi lili'na li bati nohuto mone bomofihi lili'na li bati mehilina'mu yabe. Lenali Hu'mamofihi lili'nalo bo'a neminete efapofihi lili'nalo bo'a moneko kumu meminalo.

²⁵Ya'mu luto nani lu nolepube. Lenali nagami'i to nose'na nete minalana'mufi to gukete lenugufalo li hekelete minalanamufi lenelesa nolinogo lenekesa yigiba yigiba mehilo. Bati huto minose'nauba nose'na ho'ehifi to bati huto minose'nauba guketemofihi ho'ehibe? ²⁶Lenali nama helo lili hilata nehanamagihi bu enagalo. Enali nose'na foyagu hekelete limo limo melete nelata menehabe. Hu'ma Afotinifu kokulumalugu nominanauba nose'na'ani epilata nohibe. Lenali nama enebege ligite nehana menekehelifiye? ²⁷Hiya bomaka minomo bilata kana'agu kelesanaguti minalata ni'ibe?

²⁸To hena hibe lite lenali gukete li hekelete minalana'amufi lenekesa yigiba yigiba hilata nehabe? Lose tose'na fegutoga minolata nohina enali hena hena huto tilata nehafi lenali bu galo. Enali lili'na'ani lila to gukete'ani li hekelela menehabe. ²⁹Nani lusiga luto lu nolepube. Solomoni fe'noho bo minana'a huto gukete'a ma lose tose kifinamagi li nehekalana'a huto li hekoloto memino'ehina yabe. ³⁰Yatai huto hilete yago fenene hilete nehana lose tose kifi'namagihi Hu'mau gukete'ani hu

epololata nohibe. To lenali'iba ana huto lenele'mo bati huto guketetini mehu lepalalina ni'ifihe? Lenegekesa menina bona'i nehafi?

³¹Ya hu'ehinagi lenali nose'na nalana'mufi to gukete li hekalalana'mu lenekesa yigiba yigiba hilete lenelesa melino. ³²Enali mono ka mekehelise bona'magi asaga ya'manana'mu mege'i lifite kene ilata nehabe. Ya hu'ehina kokulumalugu Afotinifu asaga'na lilanana ya huse'na lilanagi luto akeheli'ehibe. ³³Ya hu'ehinagi kai yata'a Hu'mamofihiki kapo'alo li kubulo moloto mege'i meletogo ai gelo biloto asaga'na bati'a kimilina'mu yabe. ³⁴Ya hu'ehinagi yagomo'mu hena'ni hilube luto kekesa yigi babu melubo. Hu'mau yagomo kaba hu ketalibe. Kai moneko moneko kanamu'i kekesa kehelito minobo.

Bona'i yasi legi enele'mo yegelo molose'mofihiki ka hapa'a

Lk 6:37-38, 41-42

7 ¹Lenali bona'i enipakafa hete enele'mo yegelo memalalo. To Hu'mau alihi lenali'i lenele'mo yegelo ana huto memalalibe. ²To Hu'mau hu'ehilata bameto li moloto kele'mo yegelo malalina'mu yabe. To kaga luto bona'i ya amuya'niloti yabe lilata Hu'mau ana mone'ago kagaloti kele'mo yegelo malalina'mu yabe. ³Kai kogonakamofihiki pehena bugu nina hena hibe luto gili gili nohu etane? Kai kubukagu kefa fulupa sipi'a ana huto ko'ehina bu goto li he'miloto hubo. ⁴Kefa fulupa fela'a kubukagu ni'ilina li mehe'mise hena hibe luto kogonakamofihiki ma luto lu emilata ni'ibe: Nogonao, pehena kubugu ni'ina li he'mi ketaluna bati huto ni'ifihe? Ya luto lilapiye? ⁵Kai faga fagalo bo. Yata'a kai kubukagu kefa fulupa fela'a koyoyo hu'ehina li he'miloto yalo bu go fana to'ohuto kogonakamofihiki buguti pehena li he'mi etobo.

⁶Lenali hetofa nasana kalamagihiki meepilo. Enali i behe hite heni lepele lalabe nolube. To lenali pesesutini hetofa hatofa'a yagamagihiki meepilo. Enali pesesutini libe hepulu tibe hite lapasa i lalabe nolube.

Bo amuya moloto nunumu foya nolina

Lk 11:9-13

⁷Lenali Hu'mamofitoga nunumu hite kehe ilenogo lepilibe. Lenali sa sa hite lilabe. Lenali kasito inogo Hu'mau kafe sigi lepalalibe. ⁸Bona'i enali Hu'mamofitoga loka hete nunumu nehana. Ai epilata nohibe. Bona'i sa sa hilinauba li huto hulata nohibe. To kasito noina bona'mofihiki kasihi hokolo hu etolata nohibe. ⁹To lenali afo'anigita panatinimagi nose'namu kehe neinogomo efa kosahi li epilana ni'ifihe? ¹⁰To faya kumu kehe neinogomo osifa'i li epilata nehafihe? O'e, ya menehabe. ¹¹Ya hu'ehinagi lenali bati menehana bona'magita yagapanatinimagihiki hetofana epilata nehinogomo yalo lali kehelilune, Hu'ma Afotinifu kokulumalugu nohinauba lenali nunumu hu emite ya hite hilana bona'i hetofana lepilina'mu yabe.

¹²Nanitoga ya suhi hu netalo luto kekesa noyigilata suhi enali fato bonatoga ana suhi hu epolobo. Ya'ma ai Mosehi keya ka'amofihi hapa'a koyapa'i ninamoloto to lu yege hose bona'magihi kaga enelepise'na'ani hiti mana'a ni'ibe.

Hetofana huto minosemofihi lagaso kapo'a

Lk 13:24

¹³Lenali kitili kapoguti ti hokolo hilo. Fenene huse hepa'i logo kapolo bu'ehina kapoya ai sipi fela kapo hokolo huto bu'ehibe. Ya hu'ehigo yege yege boana'i ana kapogu bilata nehabe. ¹⁴To hetofa hepato buse kapoya ai kitili'i ni'igo ana kapomofihi lili'na'a ule'ale huto lise suhi huto ni'ibe. Ya hu'ehigo mone'isi mone'isi boana'magi ana kapolo sa hite bilata nehabe.

Lali fagalo lu yege hose bomagihi kaba hu bati hilune

Lk 6:43-44

¹⁵Lenali fagalo lu yege hose bomagihi kaba hu bati hilo. Enali sipisipi yagamofihi gufa'a gukete li hekelete lenalitoga elata nehabe. Ya hi'ahana enali komopa'anigu lopi kala suhi hite nehanago lenali'iya lenehete salu kite nalana'mu yabe. ¹⁶Enali hilana hapa'aniya lenali enogo hokolo hite bu enagalana'mu yabe. Ufehe yafamagi nemuya legeya'a helata menehabe, to nemuya yafamagi ufehe yafamofihi legeya'a holata menehabe. ¹⁷To bati huto mesebe lele tele huto tilata nohina yafauba legeya'a bati huto sipina holata nohibe, to numutopa loloto sako bako logo huto lilata nohina yafauba legeya'a sibina huto lagaso'asi holata nohibe. ¹⁸Mesebe lele tele huto bati huto tilata nohina yafauba legeya'a mone sibina huto holata menohibe, to numutopa ito sako bako huto lilata nohina yafauba legeya'a bati huto sipina mone holata menohibe. ¹⁹To yafa luga'amagi enali nose'na legeya'a meholata nehanaya laga huto logogu gelata nehabe. ²⁰Ya huto ni'inagi fagalo lu yege hose bomagi hilana hapa'aniya lenali enogo hokolo hite bu enagalana'mu yabe.

Lenali'i mekeheli'ohube Yesu foipa bona kumu lilibe

Lk 13:25-27

²¹Asaga bona'i nani kumu'i: Kibina bo'nio, Kibina bo'nio, lilata nehana enali kokulumamofihi kapo'alo mebilana'mu yabe. To bona'i luga'amagi nani Afo'nifu kokulumalugu nohinamofihi bita hina suhi hilata nehana bona'isi enele'malina'mu yabe. ²²Ana kana'a huto hilina yupahi babu boana'magi ma lite lilana'mu yabe: Kibina bo'nio, Kibina bo'nio, kai kigilo Hu'mamofihi mono ka'a lu epi'ohuta yabe, to kai kigilo babeyafana sipi lili'na li huto huloto to foipa fele enoho lifi'ohuta yabe lite lilana'mu yabe. ²³Ya lite nelinogo nani ma luto lu epiluna'mu yabe: Nani lenali'i mekeheli'ohube. Foipa faipa bona'i lenali mino koli hite abufa hilo.

Nohi gisemofihi hapa'a loemo*Lk 6:47-49*

²⁴Ya hu'ehinagi, bo moneuba kaga'ni kehelito liyafa huloto nemege'i malalinauba ai bo moneuba hetofa ekesa keheliloto efaha me'i ninalo nohi gilata nohina suhi hilibe. ²⁵Ya hu'ehigo ko'i noito habafahi nolito huloto nagami'i bilito ya huto ana noto nohibe. To ana nohi li tele tulu menobibe. To hena'mugope efaha me'molo ana nohi gi'ehigo lapusa yafa'auga limito ema melugu sipi efato li tokolo hu'ehigo yabe.

²⁶To asaga bona'i enali ka'ni kehelilete ana ka'nimofihi liyafa hite mege'i menemalana bona'ia enali negi bomagi nagami belete kehelugu nohi gilata nehana suhi lite nehabe. ²⁷Ya hi'ahago ko'i noito habafahi nolito huloto nagami'i ana nohi beleha'alo bilito ana nohi li kusago hekili higo limito kolata nohibe.

²⁸Yesu ya'mana kaga alu su holago asaga li nupa hite minana boana'i Yesuhi kaga'a kehelilete keheli fato fato hite sipi enelesa'ani lu'ehina yabe. ²⁹Yesu ai bona'magi keya ka enelepilata nehana'a huto melu'ehina yabe. Ai amuyana'ani nina bomagi kaga lilata nehana suhi huto kaga'a lu epina'mu enali boana'i keheli mehe'mi'ahana yabe.

Yesu sipi hepuhi lo'ehina bomofihi le'mo bati hu'ehina*Mk 1:40-45; Lk 5:12-16*

8 ¹Yesu kosaguti limitogo babu boana'magi mege'i bi'ahana. ²To sipi hepuhi lo'ehina bo moneuba Yesutoga oto lahupa nohi fito lu'ehina: Sipi bomaka. Kai kegekesa kehelito nugufa'ni le'mo bati hilata'mu nohane. ³Ya ligo Yesu yatu su toto gufa'alo bako huto ma lu emi'ehina: Nani ya hilube'mu nohuto kugufaka gulu gulu hilinagi kehepuhaka asu ho'ehina, Yesu ya luto ligo ana'asilo hepuha'a asaga'na asu hoto fenene hu'ehina. ⁴Ya higo Yesu lu emi'ehina: Kehelibo. Fato fato bona'magi kaga lu meepibo. Mono bomofitoga buloto kugufaka lepibo. Ai bu go bati huto higo mone nona'a Mosehi koyapa'i kaga molo'ehinamo'mu mono bomofihi emibo. Ya huletogo asaga bona'i enubulo kugufaka gulu gulu'ehinana bu kagalabe, Yesu lu'ehina.

Sipi Lomu bomofihi koko pana'a besi'ehigo Yesu le'mo bati hu'ehina*Lk 7:1-10*

⁵To Yesu kapo moloto mone hepato Kapaneami tito nohigo mone Lomu gimi bouba oto lu emi'ehina: ⁶Sipi bomaka nehe'mobo. Koko pana'ni moneuba hepa'nimogu sipi besito nebelusaga minoba minoba nohigo gabu sipi'a nogibe, luto ligo, ⁷Yesu lu emi'ehina: Hepakaloga buto le'mo bati hilube. ⁸Gimi bouba lu'ehina: Ya hilapi? O'e. Nani fa'mene bo nohunagi kai noha'nigu metilane luto nokehelube. Kai fa'mene

lusa ka'ago litogo koko pana'ni gufa'aluga bati hilibe. ⁹To hena'mube? Nani ana huto napa li'ehina sipi bomofihi maha'aluga nohugo lili'na nonimina yabe. To nani'ni ana huto gimi bo'ni nehana nani namanuga ana hite nehabe. To nani mone kene'mofihi bubo luto nolugomo ai bulata nohibe. To mone fato'amofihi obo luto nolugomo a'olata nohibe. To koko pana'nimofihi ya lili'na libo luto nolu etogomo ana lili'na lilata nohibe.

¹⁰Ya luto ana bouba Yesuhi lu emilago Yesu ana ka'a keheliloto ekesa yigi babu lu emi'ehina. Ya huloto boana'i mege'i lefeli'ali hana kaga ma luto lu epi'ehina: Kehelilo. Nani lu nolepube. Isilaeli bo moneuba ya'ma bouba hina'a huto komopa'a li nimi'ehina bu megolata nohube.

¹¹Lenekesu meheno. Asaga'i yege notinagati noliminagati fato fato hepatogati ete'ani Hu'mamofihi kapo'alo Abalahagi, Isakagi to Yakopugi li nupa hilete minete'ani nose'na nalabe. ¹²To Isilaeli bona'i mone'amagi ana kapo'alo tilune'mu nehago Hu'mau fegutoga sipi metepumogu he'mi epalalibe. Fegutoga sipi yibi hiba hiba hilete enabaga heni kofilabe.

¹³Yesu gimi bomofihi lu emi'ehina: Hepakaloga abubo. Keheli ule'ale huse'naka, to komopaka li nimi'ahatana ya'ma huto hilibe, Yesu luto lu'ehina. Ana kana'agu mele'isi ya'ma gimi bomofihi koko pana'a le'mo bati hu'ehina.

Yesu babu luto epesina bona'i li bati hu'ehina

Mk 1:29-34; Lk 4:38-41

¹⁴Yesu Pitahi noha'agu buloto bu ganamo Pitahi litayami'afipo gufa mukoho akohona besi'ehigo sipalo ko'ehigo bu go'ehina. ¹⁵Yesu ana a'mofihi yahi bako huto besinana'a mele'isi fa hu eto'ehina. Ana a'uba sipaloti ho tito nose'na laita hu epoloto gabu ito epi'ehina.

¹⁶Utepoya bona'magi babu bona'i epesina foipa felemo ti'ahana bona'i Yesutoga enele'mete e'ahana. Ya nehago Yesu ana foipa felemagi amuya kaga'asigo moneko'isi lu epigo bi fa hi'ahana. To fato epesina bona'i hiti enele'mo bati hu'ehina yabe. ¹⁷Ai ana huto hu'ehinagi koyapa'i Aisaiyau bu go'ohuto kaga molo'ehina: *Ai lebesise'namo li he'mi leto'ehibe. Ai lugufati sibina hu'ehinanamo aigoko'i kofito bu'ehina.*

Bona'i Yesuhi mege'i malalune lite hi'ahana

Lk 9:57-62

¹⁸Yesu babu boana'i li nupa hilete nehago bu goto koko pana'amagi lu epi'ehina: Muya hefutoga bilutagihe. ¹⁹Kaga lu noepinogo keya ka enelepise bo moneuba aitoga oto ma lu'ehina: Tisao, kai hiti hiya'aga bilapi bilatamoga bilube luto nele'moto bilu'ibe luto lu'ehina. ²⁰To Yesu lu emi'ehina: Lopi kalamo kalina muli'i ni'ibe to namamo kalina nohi ni'inaya to Kokulumaguti limi'ehina Bouba koto basu bilina hepa'i meni'ibe luto lu emi'ehina. ²¹To bo mone Yesuhi mege'i molo'ehinanauba

lu emi'ehina: Kibina bo'nio, yata'a hepa'niga buloto'ni afo'nifu fililenogo keli hoto i behe huto kai hiti nani hiti minalu'ibe luto ligo, ²² Yesu lu emi'ehina: Kai nemege'i molobo. Fili'ahanana bona'i komopa'ani menimise'namagi fili'ehina bona'i keli halabe, Yesu ya lu'ehina.

Yesu sipi habafahi lu emigo felele hu'ehina

Mk 4:35-41; Lk 8:22-25

²³ Yesu hiti koko pana'amagi hiti botigu tilete hefuhu nagamilugu bi'ahana. ²⁴ To Yesu bu'i ko'ehina. Ya hu'ehigo mele'isi amuya habafahi hefupoguti liloto nagami'mouba bililoto sipinamo botigu folo'ehina. ²⁵ To koko pana'a Yesutoga le'mo ho tilete ma lite li'ahana: Sibi bo yale. Lali ma'asi afililuta'a nohinagi lehe'mobo. Mele'isi. ²⁶ Yesu lu epi'ehina: Koli gofana nehana henabe lutobe? Nani kumu kehelise'natini nesi'asi ni'igo ule'ale hitemo memine'ahabe. Ko'ehinati ho tiloto ana sipi amuya habapofihit hiti to nagami'i bilina hiti kaga lu etimigo analo mele'isi felele huto bu'ehina. ²⁷ Ya hu'ehigo asaga bona'i enelesa'ani li'ahana. Ma bose. Henana bo nohibe? Habapofihifi nagami'i bilinamofihifi kaga lu epigo enali ka'a keheli emina bo yabe, lite li'ahana yabe.

Bo loemale'i komopa'atitigu felemo nehago Yesu li he'mi'ehina

Mk 5:1-20; Lk 8:26-39

²⁸ Yesu kapo moloto'a hefupo muya beletoga heleko moloto Gatala bona'magihit kapo'anigu nehetigo bo loemale'i aitoga kene mala mala muliluguti e'aha'ibe. Ana bomale'i komopa'atitigu foipa felemagi ti'ahanagi luba hise nehite hagulu neta'ina bomale'i yabe. Yana hepa'mo mine'aha'igo fato bona'i koli nehite tilina mehi'ahana yabe. ²⁹ Yesu olenogo etali sipi kehe ilete: Hu'mamofihit pana'ise. Hena suhi hu le'etalube'mu nohane? Alihi asaga bona'i halata yupahi yatai aku le'ahalapiye? li'aha'ina yabe. ³⁰ Analo afehi yaga babu lite nose'na'ani line mane hite mine'ahana. ³¹ Foipa felemagi Yesuhi loka he'ahana: He'mi lepelenogomo miya yagamagi enugufagu lele'mo molobo ligo, ³² Yesu: Abilo, luto enoho lifi'ehina. Ya higo enali ana foipa felemagi bomale'ititihit he'mite yagamagi enugufagu tite falago ana yaga enali asaga'i yabatoga limilete bite hefunugu nofu ti su he'ahana yabe.

³³ Ya higo yaga afo'agi analoti he'mite hololu lite bite tauniga nehetite asaga huto hinanamo hiti bomale'i foipa fele komopa'atitigu nemina kagamo hiti lu epi'ahana. ³⁴ Ya lu epilago tauniga neminana boana'i asaga'na Yesutoga bilune litemo bi'ahana. Yesu nohinalo nehetite loka heba heba hite: Lali metimoloti he'miloto bufa hubo, lite li'ahana yabe.

Yesu gi yahi sibina hu'ehina bo le'mo bati hu'ehina

Mk 2:1-12; Lk 5:17-26

9 ¹ Yesu botigu tiloto i behe huto hefunugu i gofa hoto muya beletoga heleko moloto ai'a hepa'alo neheti'ehina yabe. ² Luga'a bona'magi

bo mone gi yahi sibina hu'ehina bo sipa'alo ko'ehigo Yesutoga le'mete e'ahana. Ya hago Yesuhi aitoga komopa'ani mele'ahana bu goloto Yesu ana gigusa'a sibina hu'ehina bo ma luto lu emi'ehina: Pana'ni, kipagu fulu hino. Nani foipanaka li nohe'mi ketobe. ³Ya ligo Mosehi keya ka enelepise bona'magi musi musi ka enali'ani ma lite li'ahana: Ma boubai ai Hu'mamofihimegeka nolu etabe. ⁴Ya nelago Yesu kaga'ani akeheliloto ma luto lu epi'ehina: Lenali henabe lite foipa faipa lenekesa neyigibe? ⁵To ya'mana bomofihifoipanaka li nohe'mi ketobe nolunauba keta hu'ehifi, to ho tito kapo molobo lilunauba keta hu'ehibe? ⁶Ya hu'ehina nani lenali'i lenelepilube, Kokulumaguti limi'ehina Bouba ma melugu amuya li'ehinago foipana li he'milina'a huto ni'ibe. Ya luto lu epiloto gi yaha'a sibina hu'ehina bomofihii: Ho tito sipaka kofito hepakaga bubo. ⁷Ya ligo ana bo ana'asi ho tiloto hepa'aga bufa hu'ehina yabe. ⁸To boana'i enali anana huto hina be gelete koli hi'ahana. Hu'ma ya'ma huse amuyana bologa molo'ehibe lite enali akeheli'ahana yabe, ya hilete enali Hu'mamofihii gi'a liyafa hi'ahana yabe.

Yesu Matiuhi kehe i'ehina

Mk 2:13-17; Lk 5:27-32

⁹Yesu ana hepa'i he'miloto kapo moloto binaga takisi nolina bo mone gi'a Matiuhiyabe lite helata nehana bo ai takisi lilata nohina nonuga nohigo Yesu bu goloto ma luto lu emi'ehina: Nemege'i molobo. Ya ligo Matiuhito tiloto Yesuhi mege'i lifito bu'ehina yabe.

¹⁰To Yesu ai noha'agu nose'na noto nohigo takisi nelina bona'i hiti to foipa bona'i hiti babu lite e'ahana. Enali Yesu hiti to koko panana'a hiti nose'na nete mine'ahana yabe. ¹¹Ya nehago Felosi bona'magi be gelete Yesuhi koko panana'a ma lite enoloka he'ahana: Henabe luto tisa botiniuba ai takisi nelina bo hiti to foipa bo hiti nose'na nonabe? ¹²Yesu enali kaga'ani akehelito ma luto lu epi'ehina: Enali meepesi'ehina bo lusa bo nohinalo mebilata nehabe. To enali epesi'ehina bonako lusa bo nohinalo bilata nehabe. ¹³Lenali bite ya'ma mono kamofihii hapa keheli bebe sete li buto hilo. *Nani yagakafa enehe'ahanamagi nimite nehago menebesibe. To nani fulu huse'na'muko nebesibe* Hu'mau lu'ehina ni'ibe, luto Yesu lu epi'ehina yabe. To nani komopa'ani bebe sana bona'i kehe ilube luto meo'ohube. Nani foipa bona'i kehe ilube luto o'ohuna yabe, luto Yesu lu epi'ehina yabe.

Nose'na mo sise hapa'a

Mk 2:18-22; Lk 5:33-39

¹⁴Ya'mana kanalo Yonihi koko panana'a Yesutoga nehetilete ma lite loka he'ahana: Hena hu'ehigo lali hiti to Felosi bo hiti nose'na mo silata nohunogo to enali kai koko panakamagi nose'na mo silata menehabe?

15 Ya lago Yesu ai lu epi'ehina: To bo moneuba ana kata hilube'mu nohigomo lalu'agi hiti ete li nupa hite neminabe, ya nehanamagi enali enipagu sibina hulata nohifihe? Ya hulata menohibe. Ya hu'ehina alihi ya'mana ana kata nohina bo le'mo nehe'mibe. Ya hago ai lalu'agi hiti meminolata nohibe. Ya hilana yupahi analo enali nose'na mo site minalana'mu yabe, luto Yesu lu epi'ehina yabe.

16 Bo mone'amagi yuhufa kata letuha'atu koyapa kata hepu to'ehinalo hetilata menehabe. To ya hilana ai yuhufa kata letuha'auga koyapa kata aku'i i hegege hinogo sipi hokolo kapo aku'i lolo hilina'mu yabe. 17 To bona'i mone'amagi yuhufa bai nagami'i lite koyapa meme yaga gufa'a konugu heki bilata menehabe. To enali ya hilana koyapa meme yaga gufa'a kohi i hegege hinogo to bai nagami'i melugu i heki su halina'mu yabe. Ya hina'mu yabe lite enali yuhufa bai nagami'i yuhufa meme gufa'a konugu heki bigo to etali loe sana sana bati hite minelata neha'ibe, luto Yesu lu epi'ehina yabe.

**Yesu kaba bomofihi fili'ehina pa'a le'mo ho tito to
kefe'alo meko hina a'i le'mo bati hu'ehina**

18 Yesu ana kaga lu epito nohigo kaba bo mone Yesuhi metoga o leba toloto to ai lapusa nohi fi emiloto ma lu'ehina: Pa'ni ma'asi afili'ehibe. Ya hu'ehinaya kai oto kayaha'atu gufa'alo meko hitogo ai aku'i ho tito minalibe. 19 To Yesu ho tito ana bo mege'i nobigo Yesuhi koko pana'a ana hite mege'i melete bi'ahana yabe.

20 A'i mone mino'ehina ai asaga yupahi golaha'a he'miba he'miba huto minago kufu'a nayahi luga luga su hoto nigigusagati loemo heleko malago mino'ehina a'i yabe. Ai ana a'uba Yesuhi megesagati oto Yesuhi kefe'a nekisa'alo yahi li'ehina yabe. 21 Ai ana a'uba ma luto ai'a keheli'ehina: Nani kefe'alo meko hulenogo'ni nebesise'na'ni su ho netalibe. 22 Yesu i behe huto ana a'i bu goloto ma luto lu emi'ehina: Pa'ni, kipakagu fuluna kebesino. Kai nanitoga komopaka moloto minalatanauba kele'mo buto bito kebesise'naka li nohe'mibe luto Yesu lu emi'ehina yabe. Ya noligo ana'asilo ana a'mofihi nobesinana su ho etago bati hu'ehina yabe.

23 Ya huloto Yesu kaba bomofihi noha'aluga buto ti'ehina. Ya huloto bona'magi folonemeyahi melete nehago bu go'ehina. To asaga boana'i sipi yibi nama hite nehite kaga babu lite nelite henati hilune, lite enelesa ka lite mine'ahana yabe. 24 Ya nehago Yesu asaga bona'i: Fegutoga bilo luto enoho lifi'ehina yabe. Ma lagaso pa'iya mefili'ehibe, ai fa'mene bu'i ko'ehibe. Ya noligo asaga boana'magi Yesuhi kiya yokolo hi ete'ahana yabe. 25 To asaga boana'i fegutoga limi su nehago Yesu ana pa'mofihi hasagu tiloto ana pa'i yato li saga higo analo mele'isi ho ti'ehina yabe. 26 Ya higo anana huto hinanamofihi kaga'a ana hepalugu bula ola higo asaga bona'magi keheli baga i'ahana yabe.

Yesu bo loemo etubu pisi lina bole etele'mo bati hu'ehina

²⁷Yesu ana hepa'i he'miloto kapo moloto nobigo etubu pisi lu'ehina bo loemale'i mege'i lifite nebite ma lite li'aha'ina: Tatatifu Tebitihi pana'amaka kai le'ali'i kiginaga fi le'emibo lite kehe i'aha'ina yabe. ²⁸Ya nela'igo Yesu ai nonuga notigo etali ana bole Yesutoga neheta'aha'ina yabe. Ya ha'igo Yesu etoloka ho'ehina: Letali le'ele'mo bati hilina'mu yabe lite nanitoga komopatiti nenimi'ifihe? Etali li'aha'ina: O'yo, Sipi Bo, le'ali keheli'ohu'ibe. ²⁹To Yesu yatu'i etubulo meko huloto lu etimi'ehina: Letali nanitoga komopatiti nimi'aha'inago letubutiti bati hilina'mu yabe. ³⁰Yesu ya ligo etubu'atiti ana'asilo mele'isi i gili hu'ehina yabe. Ya higo Yesu etekesa bito ma luto lu etimi'ehina: Letali ya'mana huto nohu letotonamofihiki kaga'a bona'i lu meepilo. ³¹Etali bite Yesu hu etoto'ehina kaga'a asaga hepatoga lu epimofa'na hi'aha'ina yabe.

Yesu negi bo le'mo bati hu'ehina

³²Ana bole neba'igo bona'i luga'amagi negi bo mone foipa feleuba gufagu tigo kaga meluse nominana bo Yesutoga le'mete e'ahana yabe. ³³Ya higo Yesu ana foipa fele li he'mi etago ana bouba kaga hapi fito lu'ehina yabe. Ya higo asaga boana'i topa hete enekesa yigi babu lilete ma lite li'ahana: Koyapa'i Isilaeli melugu ya'ma huse'na huto higo bu mego'ohuta suhi huto hibe, lite li'ahana yabe. ³⁴Ya nelago Felosi bona'magi ma li'ahana: Ai foipa felemagihiki kaba bo'aniuba amuyana emigo foipa fele li nohe'mi epalabe, lite li'ahana yabe.

Yesu boana'i ginaga fi epi'ehina

³⁵To Yesu asaga hepatoga bego humofa'na hu'ehina. Ya huloto asaga boana'i mono noha'anigu lu enelepito Hu'mamofihiki ka lamana'a lu noepito to enebesina boana'i enele'mo ye nokoto to enugufagu ketana nina li he'mi epolomofa'na hu'ehina yabe. ³⁶Babu boana'i Yesuhi le'mo bego hite minago bu enogoloto Yesu eniginaga fi epi'ehina yabe. Hena'mugope enali enekesa yigi babu lilete bo moneuba meenehe'mago sipisipi yaga kaba bo'ani meminago tili tele hite minelata nehana suhi lite minana'mu luto yabe. ³⁷Ya huloto Yesu koko panana'a ma luto lu epi'ehina: Babu nose'na foyagu uya'i loto mupa ito ninaya ana nose'na li nupa hilana bona'a loe'asi nehabe. ³⁸Ya hu'ehinagi lenali bite foya afo'afihiki numuna hi etenogo ai foya'agu ete lili'na lite nose'na'a li nupa hilana bona'i enele'mo babu lilibe, lu'ehina yabe.

Aposolo pana'magi enigi'ani

Mk 3:13-19; Lk 6:12-16

10 ¹To Yesu aposolo panana'a nayaha'ni su hago nigigusaga loemo leheko malago enele'mo nupa huloto foipa felefi to bona'i

enugufagu enebesila to ketana nina li he'mi epalalabe luto amuyana epi'ehina yabe. ²Nayaha'ni su hago nigigusaga loemo leheko malago aposolo pana'magihi enigi'ani li keheli'ehina ma luto ni'ibe. Yata'a Simoni fato gi'a Pita, to Atulu ai gona'a yabe. To Yemesi Sepetihina pana'a ai Yoni gona'a hiti yabe. ³To Filipi hiti to Batolomu hiti yabe. To Tomasi hiti Matiu hiti etali takisi efahi lilata bole yabe. To Yemesi ai Alifiasihina pana'a yabe, to Tatiyasi yabe. ⁴To Simoni ai fato gi'a Seloti yabe. To Yutasi fato gi'a Isikelioti, ai Yesuhi mi'i moloto fateha'amagihi epi'ehina yabe.

Yesu 12 aposolo pana'a lili'na enelep'ehina

Mk 6:7-13; Lk 9:1-5

⁵Yesu nayaha'ni su hago nigigusaga loemo leheko malago koko panana enoho lifiloto ma kaga lu epi'ehina: Lenali fegutoga bona nagatoga bite ise megilo. To lenali Samalia bona'magi hepatoga mebito. ⁶Lenali Isilaeli nagalugu sipisipi yaga fenene hite nehanalo bilo. ⁷Lenali bite kaga ma lite lu epilo: Kokulumamofihina kapo'a anasi a'o leba notabe. ⁸Lenali enebesise bona'i enele'mo ye kalo, to fili'ahana bona'i enele'mo ho tilo, to sipi enehepuhi lo'ehilina bona'i ana enehepuha'ani li gololo ti epalalo, to foipa fele li he'mi epalalo. Lenali mina melise nelinagi ana hite mina'a melise lu nolepuna suhi hi epalalo. ⁹Lenali efa gutini luga li gu meise bilo. ¹⁰Lenali sisaku gutinifi, guketetini loefi, lenigigusagu sutinifi to fatusatinifi melise lenayapako bilo. To lenali enele'malana bona'magi nose'na lepilana'mu yabe luto Yesu lu epi'ehina yabe.

¹¹To lenali tauni hepa'i ninalofi to lagaso hepa'i ninalo nehetiletemo lenali ana hepato bona'i hapa'ani bu go bati hiletebe. Hiya bo bati bo nohifi to hiya bo bati mehina bo nohifi lite enogo kehelilete hapa'a bati hu'ehilina bo be geletemo lenali ana bo hiti nehite fato hepatoga bilune'muko ho tite bilo. ¹²To lenali nohi moneluga tiletemo ana nonuga nehilana bona'i lenipagu fuluna mineno lite lu epilete tilo. ¹³To ya'mana nonuga bona'i bati bona'mo nehinogomo lenali enebe tigitte fulunatini epilo. To hapa'ani bebe mesana bona'mo nehinogomo lenali fulunatini aku'i i behe huto lenalitiniloga alina'mu yabe. ¹⁴To hepa'i monetotifi to nohi monelugutifi lenebe metiginogomofi to kagatini keheli melepinogomo lenali lenigigusagati mumusopa li tili nehite ana hepa'i he'mite fato hepatoga bilo. ¹⁵Nani ma'naka luto lu nolepube. Hu'mau ana boana'i kaga'ani loko hu epalalina yupapogu Hu'mau Sotomu hepa'i hiti to Gomola hepa'i hiti nesi'a enahalibe. To lenele'mo bati mehilana hepa'ia Hu'mau sipi enoho su halina'mu yabe, luto Yesu lu epi'ehina yabe.

Keta huse'na fato fato'mofihina huto hilina'mu yabe

¹⁶Lenali kehelilo. Nani lenali'i sipisipi yaga legi huto lopi kalamagihi folagaha'anigu lenoho lufube. Ya hu'ehinagi lenali ka keheliya ise osifa

legi hite ana'ina lolo hilune'mu nehitemo yata'a lenekesa yigi fe liletebe. To lenali lufu namamofihi hapa'a agoya'a nina suhi lite minalo. ¹⁷Lenali kaba hu bati hilo. Enali bona'i luga'amagi naga'i lepelete ka foya li lepelete enali li nupa hite minelata nehana nonugu lenele'mo melete naga osatu lenibi yigilana'mu yabe. ¹⁸Enali nani kumu lite lenali'i gamani bona'i hiti to enikibina bona enubulo lenele'mo yegelo melete ka foya li lepalalana'mu yabe. To mono ka ana gamani bona'i hiti to fegutoga bona'i hiti lu epilana'mu lite ya hi lepalana'mu yabe, luto Yesu lu epi'ehina yabe. ¹⁹To ka foyagu lenele'mete nebinogomo lenali kaga lilana'mu henabe lilune lite lenekesa yigi to hiya'a huto kaga lilupi lite lenekesa yigi babu melilo. To ana kana'a noenogomo kaga lilana lenabagalo alina'mu yabe. ²⁰Ana kaga lilanaya lenalitini melilana'mu yabe, to kokulumaguti Afotinifu ana kaga lenelepilenogo ana kaga lenali lu epilana'mu yabe, luto Yesu lu epi'ehina yabe.

²¹Bomagi enali enogo'anigihika foyagu enele'me melete enoho fililana'mu yabe. To afo'afu pana'amofihi ana suhi luto ho fililina'mu yabe. To panana'animagi afo'anigihika hite fateha'ani enele'mo lolo hite enoho fililana'mu yabe. ²²To anaga bona'magi lenipakafa halana'mu yabe. Hena'mugope lenali nani yagapana'ni minana'mu lite yabe. Ya hu'ehina to bo moneuba amuya moloto minomo buto bona'i guna ise kana'alo minalina Hu'mau aku'i le'menogo ana bo ai Hu'mamofihi pana'a minalina'mu yabe. ²³To mone hepatoti lenehenogomo lenali ana hepa'i he'mite hololu lite fato hepatoga bilo. Nani ma'naka luto lu nolepube. Lenali asaga Isilaeli hepalugu bite lili'na li бага mei'ehinogo nani aku'i aluna'mu yabe, luto Yesu lu epi'ehina yabe.

²⁴To sukulu pana'i moneuba tisa bo'amofihi mone be ligito meminolata nohibe. To koko pana'uba kaba bo'amofihi be ligito meminolata nohibe. ²⁵To sukulu pana'uba tisa bo'a lolo hilina bati huto ni'ibe. To koko pana'uba sipi bo'a lolo huto minalina bati huto ni'ibe. Nani afotinifita enali foipa felemofihi gi'a Bielesebulu nanitoga mele'ahana suhi hite lenali'i ana hite babu lite foipa lenigi halana'mu yabe, luto Yesu lu epi'ehina yabe.

Bouba Hu'mamofihi aisigo koli hu emino

Lk 12:2-7

²⁶Ya hu'ehinagi lenali bona'i koli mehi epalalo. Asaga'na fenene huto ninana alihi huto hi su halana'mu yabe. To asaga'na ifi toto fala kito ninana kugumatogago huto hinogo enali bona'magi bu galana'mu yabe. ²⁷Kaga nani sininugu lu nolepuna lenali yegelo lu epilo. To kaga fulu huto lenalitinigo lu nolepuna lenali nohi lataha'alo ho ti'ehite lu yege he epilo. ²⁸Ma melugu lenugufa'a lenoho fililafa to lenemehatini hiti lenoho mefililana bona kumu'i koli mehilo. Lenali Hu'mau ai lenugufatini hiti to

lenemehatini hiti loe sana sana sipi logo kapogu lenoho fililina bomofihi ai kumuko'i koli hi etete minalo. ²⁹Enali nama lagaso'asi loemo moneko toعالoti mina filata nehabe. Ya hu'ehina Afotinifihi laga'a mebesilina to nama lagaso'a mone'mofihi suhi luto melugu'i limo meilina'mu yabe. ³⁰To lenali'iya latahatinigu nina okatiniya aleka so su ho'ehibe. ³¹Ya hu'ehinagi lenali koli mehilo. Lenaliya lagaso nama babu lite nehanamagihi mina'ani enebe ligite nehabe, luto Yesu lu epi'ehina yabe.

Yesuhi gi'a bona'i lu episemofihi hapa'a

Lk 12:8-9

³²Bo moneuba Yesuhi pana'i nohube luto lu yege homofa'na hilina nani alihi ana huto Afo'nifu kokulumalugu nohinamofihi bulo'i gi'a lu yege haluna'mu yabe luto Yesu lu epi'ehina yabe. ³³To mone bouba Yesuhi pana'a menohube luto nigi'ni li fala kito minalina nani ana huto ai gi'a Afo'nifu kokulumalugu nohina bomofihi bulo li fala kiluna'mu yabe, luto Yesu lu epi'ehina yabe.

Yesu luba li huto hilube'mu o'ehina

Lk 12:51-53; 14:26-27

³⁴Ma melugu luba mehilo luto lenele'mo baba ilube'mu o'ehibe lite nani kumu'i melilo. Nani luba bona'i lenele'mo baba ilube'mu meo'ohunaya kosa kosa emita'i lito ma melugu limi'ohube. ³⁵Nani fatehena li huto hilube luto limi'ohube. Bouba afo'afihi le'mo fateha'a lolo hilina'mu yabe, pa'animagi ito'anigihi fateha'ani enele'mo lolo hilana'mu yabe, to a'uba baha'amofihi ito'afihi fateha'a le'mo lolo hilina'mu yabe. ³⁶Bomofihi fateha'a mana'iya ai lalameha'a minalana'mu yabe, luto Yesu lu epi'ehina yabe.

³⁷Bo moneuba ito'afinogo afo'afinogo etele'mo bati nohuto nani'i nele'mo bati mehilina bo ai nani'i nalalu'nifu legi huto meminalina'mu yabe. To bo moneuba liha'a yagapana'a enele'mo bati huloto nani'i nele'mo bati mehilina bo ai nani'i nalalu'nifu legi huto meminalina'mu yabe. ³⁸To bo moneuba malipu yafa'a lito kofiloto nemege'i memalalinauba ai nani nalalu'nifu lolo mehilina'mu yabe. ³⁹Bo moneuba gufa'a le'mo bati huto minalina ai meha'a he'mi mana hilina'mu yabe. To mone bouba nani kumu luto gufa'a he'mi yakalesa hilinauba ai meha'a li buto bilina'mu yabe, luto Yesu lu'ehina yabe.

Bouba mina bati'a lilina

Mk 9:41

⁴⁰Bo moneubafi moneuba lenebe tigilinaya nani'i nebe tigilina'mu yabe. To nani'i nebe tigilina bona'iya ai noho lifigo limi'ohuna bomofihi be tigilina'mu yabe. ⁴¹To bo moneuba Hu'mamofihi ka'a leli'ali nohina bo

noago bu goloto he'malube luto ekesa kehelito noha'aluga le'moto buto nose'na emito kaba hu etalina ai ya'mana bouba lu huto huto bomofihi suhi lito mina'a lilina'mu yabe. To bo mone hapa'a bebe sana bo noenogo bu goloto ana bo he'malube luto luloto le'moto buto noha'agu kaba bati'a hu etalina bo ai mina'a bati huto hapa'a bebe sana bouba lilina'a huto lilina'mu yabe. ⁴²To bo moneuba fatoga boana'i neago bu enogoloto'a: Akae, ma boana'i Yesuhi naga'amo nehanago enehe'malube luto ekesa kehelito yatipa nagami'i konugu hefito epi fulu hilina boya ma'naka luto lu lepube. Ai ana bouba mina'a liba liba hilina'mu yabe, luto Yesu lu epi'ehina yabe.

Yoniu koko pana'a Yesutoga enoho lifi'ehina

Lk 7:18-35

11 ¹Yesu nayaha'ni su hago nigigusaga loemo leheko malago koko pana'amagi lili'na lilana kaga alu epi su holoto ana hepa'i he'mito ana kegi'a hepa'i nila nila hu'ehinalo bula ola huto boana'i kaga lu enelepito to hetofa kaga lu yege homofa'na hu'ehina yabe.

²To Yoniu ai nagami folo epolose bo naga'i emi'ahago nohuto asaga lili'na Yesu nolinamofihi ka'a keheliloto koko pana'a enoho lifigo Yesutoga e'ahana. ³Ya hilete ma lite Yesuhi loka he'ahana: Kaiba Yoniu alane luto lu'ehina bomo nohapi, fato bo geba hiluta ni'ibe? ⁴Ya lago Yesu ka'anilo lu epi'ehina: Lenali i behe hite bite Yonihi sipi lili'na li huto nohugo be enaganamofihi hapa'a lu emilo. ⁵Enali enubu pisi lina bona'i aku'i enubu'ani i gili higo asaga'na bu negabe. To enigi enayahi sibina hu'ehina bona'i kapo malabe. To ililogo bona'i enele'mo gololo tugo babe. To enekesa hekini lana bona'i enekesa li hokolo hugo kaga kehelite babe. To fili'ahana bona'i aku'i ho ti kosaba habe. To fe'noha'ani menina boana'i ka lamana'a kehelibe. ⁶To bo moneuba nani kumu'i ekesa yigi yigi huto Hu'mamofihi pana'a nohifi fato bo nohifi ya'ma meluse aku'i nanitoga komopa'a nimilina bo ai gelo bino.

⁷Ya luto Yesu kaga lu su holago Yonihi koko pana'a abilago Yesu Yoni kumu kaga babu boana'i lu epi'ehina: Koyapa'i lenali bona'i menehana kamelugu bi'ahana henana bu galune lite bi'ahanabe? To lenali akepa mone'mofihi habafahuba li pisi hu'ehina bu galune litefihe? ⁸To lenali henana bu galune lite bi'ahanabe? To lenali bo moneuba hetofa gukete li hekoloto nohinogo bu galune lite bi'ahanafihe? Nani lu nolepube. Enali bona'i hetofa gukete li hekelete to hetofana enugufalo li melete neminana bona'iya enali sipi kibina bomofihi noha'agu minelata nehabe. ⁹Ya hu'ehina lenali hena hibe lite bi'ahanabe? Lenali henana bu galune lite bi'ahanabe? To lu huto huto bo bu galune lite bi'ahanafihe? O'yo nani lu nolepube. Ai lusi mono bo yabe. To ai asaga mono bona'i luga'a enohoto nohibe. ¹⁰Ya'mana bo Yoni kumu luto mono kagu ma luto lulata nohina

yabe: *Mono ka'ni leli'ali bo'ni ya'ma nohibe luto Hu'ma lu'ehina yabe. To nani yata'a ale'mo he'minogo'ni ai buto kapo li hokolo hu ketalibe.* ¹¹ Yesu kaga molo emito lu'ehina: Nani ma'naka luto lu nolepube. Yoni ai nagami folo epolose bouba asaga bona'i ma melugu nehana enohoto nohibe. Ya hu'ehina bo mone Hu'mamofihi kapolo lagaso huto nohilinauba ai Yonihi be ligito nohibe. ¹² Yoni huto hina kanaloti minomo tito yalo'i kana'alo ago luba nehana bona'magi kokulumamofihi kapo'a li he'milune'mu nehite luba hiba hiba hi'ahana. ¹³ Asaga lu yege hose bona'i kaga hiti keya ka hite Hu'mamofihi Kapo'amofihi ka'a Yonihi huto hina kana'aloti moneka huto hi'ahana yabe. ¹⁴ To lenali keheli bati hilunemo'mu keheli bati hilo. Yonihi ai'ya Elaiyau yabe, ai ya'mana bo alibe luto lu'ohuta bo yabe. ¹⁵ Ai ekesa'a ni'ilina bouba keheli bati hino.

¹⁶ Yatai kanalo boana'i henanalo lu malalube? Enali yagapana'i hepa'i folagaha'agu luga filete nehite luga'a yagapana'i kehe ite ma lite lu epilata nehana suhi lite nehabe: ¹⁷ Lali folonemeyahi fu lu lepolotamo lenali nama lilana suhi hite melekehi ite memine'ahabe. To lali eniginaga fise suhi huto yibi nama hutamo enali yibi hilana suhi hite memine'ahabe. ¹⁸ Yonihi o'ehina ai nose'na nola to bai nagami'i nola mehu'ehina yabe. Ya nohigo lenali ma lite li'ahana yabe: Foipa fele ai komopa'agu ni'ibe lite li'ahana yabe. ¹⁹ To yatai Kokulumaguti limi'ehina Bouba oloto nose'na noto nagami'i noto nohigo to lenali ma lite neli etabe: Bu galo. Ai nose'na lau'i iba iba bo yabe nelabe. To bai nagami'i ana huto babu luto noba noba bo yabe lite nelabe. To ai takisi nelina bo to foipa bona'magihi enalalu'anifu yabe lite lilata nehabe. To ya'mananalo bu golototi Hu'mamofihi keheli bati huse'na'a ma'naka ni'ibe luto liluta'mu yabe.

Ke, komopa'ani i gelehe mehi'ahana bona'ise

Lk 10:13-15

²⁰ Hepa'i luga'aga Yesu topa hose'na li hu enebe li'ehinalo bona'magi komopa'ani i gelehe mehi'ahana yabe. Ya hi'ahago ya'ma kanalo Yesu ka epekito mino'ehina yabe. ²¹ Ai lu'ehina: Ke, Kolasini bona'ise. Ke, lenali Betesaita bona'ise. Lenalitoga babeyafana li huto nohunana enali Taiya bona'i hiti Saitoni bona'i hiti enalitoga li huto hutita enali mele'isi melugu mino laba hite gebona gukete li hekelete lahi enugufalo felete eniginaga foipana'animu'i finogo nehinogo ya bu goto foipana'animo'mu nehabe luto huto hulata nohinagi lenali komopatini i gelehe mehi'ahana. ²² Lenali kehelilo. Me'i su halina kana'a to ka foya lilina yupahi Hu'mau Taiya bona'i hiti Saitoni bona'i hiti enalitoga babu lito keta mehu etalinaya lenalitoga sipi keta besilina'mu yabe, luto Yesu lu epi'ehina yabe. ²³ To lenali Kapaneami bona'ise. Lenalitini kokulumalugu li saga hite tilana ni'ifihe? Logo kapogu limilana'mu yabe. To topa hose'na lenalilugu li huto hu'ohunana Sotomu hepalugu li huto hutita yatai hiti

analo huto huba huba nohitita'mu yabe. ²⁴To ka foya sipina yupahi Hu'mau Sotomu bona'i babu luto keke'i lu epalalinaya to lenali'i loe'asi keke'i lu lepalalina'mu yabe.

Lenali nanitoga ete lenbasu bilo, Yesu lu'ehina

²⁵Ya'mana yupahi Yesu ma luto lu'ehina: Oho. Afo'niga, kokuluma'i hiti me'i hiti sipi kaba bo'a nohane. Kai ana'inaka kehelise bona'magihi enubulo li fala nokito to kai lagaso yagapana'magihi enubulo li huto hulata nohata'mu nani kofokehi lito bati huto yabe luto kegepohi nolube. ²⁶O'yo, Afo'niga kaika lu'ahatalo ana suhi ana suhi fato fato'i huto hulata nohibe.

²⁷Nani afo'nifu asaga'na nani nayanuguko molo'ehibe. Bo moneuba Hu'mamofihhi pana'a nohibe luto mekeheli'ehina. Afo'nifu aisigo keheli'ehibe. To bo moneuba Hu'mamofihhi ai nohibe luto mekeheli'ehina, Pana'a aisigo keheli'ohuto ai Pana'auga Afo'afihhi enelepito kaga lu epina bona'i enali ana hite Hu'ma nohibe lite kehelilata nehabe lu'ehina.

²⁸Lenali ketana kofilete ketatini'mu kosele'ise bona'i nanitoga ete lenbasu bilo. ²⁹Ya'ma yafa nani nig'i'nagu nina lenali lite lenali lenig'i'nagu malalo. Lenali nani hapa'ni lilo. Hena'mugope nani fulu fulu kaga bona'i lu noepuna bo nohube. To koyone huto legeso huto nominona bo nohube. To lenali komopatinimofihhi nanitoga ete le'mo basu bilo. ³⁰Ya'ma ketana lenig'i'nagu nomolo lepolonanaya hetofana ni'ibe. To ana'ina kofilabe luto nani nolepunanaya keta mehina baba hana ni'ibe, luto Yesu lu epi'ehina yabe.

Fuligu lili'na he'misemofihhi ka'a

Mk 2:23-28; Lk 6:1-5

12 ¹Alihi fuli kana monelugu Yesu nose'na foya folagaha'agu kapo moloto bu'ehina. Ya nohigo koko panana'a mege'i nebanati kau'na enahago legeya'a nesi'asi tegete noha'a li nehe'mite mana'a nete nebabe. Ana nose'na laisi tegina nina ligite ne'ahana. ²To Felosi bona'i luga'amagi ya hanana be gelete ma li'ahana: Fuli kanagu o'e lite li'ahana supo lenali hena'mu ya nehabe? ³Ya lago Yesu lu epi'ehina: To lenali Tebitiu hu'ehinamofihhi fayaha'a leka sete mekeheli'ahafihe? Tebitiu lalu'agi hiti sipi kau'na enoho'ehinamo'mu nolube. ⁴Ya nohigo ai Hu'mamofihhi noha'agu tiloto Hu'mamofihhi bulo ni'ina beleti nose'na lito'a nonoto lalu'agi mege'i ana noepito ne'ahana yabe. To ya'mana beleti mono bona'magigo nelata nehabe. To fato fato bona'i menalabe. To ya hu'ehinamofihhi ka'a leka sete mekeheli'ahafihe? ⁵To lenali Mosehi ka foya buku'agu nina mono kamoba leka sete mekeheli'ahafihe? Asaga fuli kana'agu mono noto kaba hi'ahana bomagi fuli kana'alo ya'ma keya ka li gofa helata hi'ahana to enali bati mehina suhi mehi'ahana

yabe. ⁶Nani lu nolepube. Ana'ina mone ni'inaubaya mono nohi be ligito ni'ibe. ⁷Ya hu'ehina lenali ma mono kaga keheli bati hite keheli fe lilana: *Nani yagakafa he'ahananamagi nimitogo menebesibe. Nani fulu huto minose'namu'i nebesibe.* Yalo lenali ketana lite bati mehina suhi mehilata nehana bona'i enalitoga ligo mefi epalalana'mu yabe. ⁸Kokulumaguti limi'ehina Bouba ai fuli kanamofihi sipi kaba bo'a nohibe.

Fuli kanagu Yesu bo mone yaha'a foipa lo'ehina bo le'mo bati hu'ehina
Mk 3:1-6; Lk 6:6-11

⁹Yesu hepa'i he'miloto buto li gehesa hite minelata nehana noha'anigu ti'ehina. ¹⁰To bo mone yaha'a sibina hu'ehina bo anagu mino'ehina. To Yesu hilina hapa'a li kuguma hu etalune lite bona'i luga'amagi mapahi fite ana nonuga mine'ahana yabe. Enali loka he'ahana: Fuli kanagu'i enebesi'ehina bona'i enele'mo bati huse'iba bati huto ni'ifihe? ¹¹Yesu ka'anilo lu epi'ehina: Mone bomaka sipisipi yagaka fuli kanagu keligu limi'ehilina hena hilata ni'ibe? To ana keliguti gufalo lito le'mo lago metilata ni'ifihe? ¹²To bouba sipisipi yaga be ligito nohibe. Ya hu'ehinagi fuli kanagu bona'i enele'mo bati hilo luto keya kagatiuba nolibe. ¹³Ya luloto yaha'a sibina hu'ehina bo ma luto lu emi'ehina: Kayaha li su tobo. Ya ligo ana bouba yaha'a li su tago mone kegi'a yaha'auga hu'ehina'a huto bati hu'ehina yabe. ¹⁴Ya higo enali Felosi bona'i heleko limite bite li nupa hilete Yesuhi halune lite kaga lu keheli fa keheli hi'ahana yabe.

Yesu Hu'mamofihi lili'nalo pana'a mana'i nohibe

¹⁵Yesu ana kaga'ani akeheliloto ana hepa'i he'miloto nobigo babu bona'i mege'i lifite bi'ahana yabe. Ya nehago enebesi'ehinana'ani li he'mi su ho epolo'ehina yabe. ¹⁶Ya nohuto ana bona'i enekesa biloto lenali nani kumu'i bona'i lu meepilo luto lu epi'ehina yabe. ¹⁷To kaga mone lu huto huto bo Aisaiyau ma luto lu'ehina kagauba legeya'a huto hilina'mu yabe:

¹⁸Ya'ma lili'nalo bo'ni nohibe luto

Hu'ma lu'ehina,

ai nani'ni le'mo ho notube.

Ai nebesina bo nohigo

ai kumu'i

nipagu bati hulata nohina pana'ni yabe.

Nani Sikalafu'ni aitoga malaluna'mu yabe,

to ai fato naga'magitoga hetofanaguti

minosemofihi kagu lu epimofa'na

hilina'mu yabe.

¹⁹Ai bona'i ka epekito enubunepa ito mehilina'mu yabe.

To sipi kapoguti kehe kehe ito

- kaga nolinogo
 nogo'a mekehelilana'mu yabe.
 20 To akepa mone i pisi hu'ehilina
 ai li gofa mehilina'mu yabe.
 To logo mone loloto
 yuhufa sabalube'mu nohilina
 ai li sobo su mehalina'mu yabe.
 Ai lili'na liba liba huto
 nohuto mino fe luse'namofihi
 be ligiloto'a yabe.
 21 To asaga bona'i aitogago
 komopa'ani molo emite minalana'mu yabe.

Yesu lili'na Bielesebulu hiti lila'ibe li'ahana

Mk 3:20-30; Lk 11:14-23

22 Bona'i luga'amagi bo mone bu'a pisi ligo kaga meluse nominana bo le'mete Yesutoga e'ahana yabe. Hena'mugope foipa fele aitoga ni'igo yabe. Yesu ana bo le'mo bati higo bu'a i gili hula to kaga lula hu'ehina yabe. 23 Ya higo enali le'mo bego hite babu boana'i minanamagi be gelete topa helete ma lite li'ahana: Ya'ma boba Tebitihi pana'mouba nohifi fato bobo? 24 Ya nelago Felosi bona'magi kehelilete ma lite li'ahana: Ai foipa fele li nohe'mi epalanaya foipa felemagihi sipi bo'ani Bielesebulu amuya emi'ehigo nohibe. 25 Kaga lu keheli fa keheli enali nehana kaga'ani Yesu akeheliloto ma luto lu epi'ehina: Hepa'i luga'a enali'aniguti loko luku hilete luba hilata nehana yatamalo luba hite minelata menehabe. To hepa'i mone'magifi to lalamehe naga'i mone'magi loko hilete luba hilata nehana enali ya'mana hepa'ifi to lalamehe naga'ifi mino bati hite meminalana'mu yabe. 26 To Satau ai fato foipa felemofihi le'mo he'milina ai naga'a enali aloko nehabe. Ya hinogo Satahi hepa kapo'a hena huto amuya moloto minalina ni'ibe? Enali amuya melete enigi binogo meminalana'mu yabe. 27 Lenali nani kumu'i Bielesebulu amuya nimigo foipa fele li he'mi he'mi nohibe lite nelafihe? To yagapanatinimagihi kuyu'afu enehe'moto amuya epigo foipa fele hesi he'milata nehabe? Ya hi'ehite enali'ani yasi bo lolo hite nehite ya'mana kagatini loko hite kehelilabe. 28 Ai Hu'mamofihi Sikalafu'auga amuya nimigo foipa fele hesi nohe'mi nogo'nimo lenali Hu'mamofihi kapo'a lalitoga a'o leba notanagi lite kehelilabe, luto Yesu lu epi'ehina yabe.

29 Bona'i enali amuya bomofihi noha'aguti tite fe'noha'a bu go'ehigo lilata menehabe. Enali ana bo gilo yato naga ilete yato noha'agu tite silaga fe'noha'a lilana'a huto ni'ibe.

30 Bo moneuba nanitoga komopa'a nimito meminalina ai nani fateha'ni nohibe. Bo moneuba nani'i nehe'moto sipisipi yaga enele'mo tulu

menohina ai'ya ana sipisipi yaga enele'mo tili tele nohibe luto Yesu lu epi'ehina yabe. ³¹Ya'ma ka'mu luto nani lu nolepube. Asaga foipanafi to bona enemegeka boana'magi lilata nehana Hu'mau ana foipana'ani li he'milina'mu yabe. Ya hilinaya to mone bouba Sikalafu'mofihhi megeka luto kaga emekilina foipana'a Hu'mau li mehe'mi etalina'mu yabe.

³²To mone bouba Hu'mamofihhi pana'amofihhi kaga foipa lu etalinaya Hu'mau ana foipana'a li he'mi etalina'mu yabe. Ya hilinaya bo moneuba Sikalafu'mofihhi kaga foipa'a lu etalinaya ana foipana'a Hu'mau li mehe'mi etalina'mu yabe. Yatai hiti aliha'a yupa hiti ana sunogo hilina'mu yabe, luto Yesu lu epi'ehina yabe.

Foipa yafauba foipa legeya'a holata nohibe

Lk 6:43-45

³³To yafa moneuba bati huto mesebe lele tele huto tiloto legeya'a bati huto sipina holata nohibe. To numutopa loto tilata nohina yafauba legeya'a ana huto ho foipa lolata nohibe. To bona'magi yafa legeya'alo belelete be gelete ya yafaya bati huto notinagi lila to numutopa loto notinagi lila hite li kehelilata nehabe. ³⁴Lenali foipa osifa'mofihhi yagapana'a nehabe. Lenaliba hena hite bati ka lilana'a huto ni'ibe? Lenali foipa bona'i yabe. Asaga foipa foipa kaga bomofihhi komopa'agu bai toto nina kaga'a ai baga'aloti huto hulata nohibe. ³⁵To hetofa bomofihhi komopa'agu kaga bati'a babu luto minolata nohibe. Ya hu'ehigo ai hetofa sunogo hulata nohibe. To foipa bona'magi komopa'anigu kaga foipa faipa'a bai toto ni'igo foipa faipa'i suhi babu lite li huto hilata nehabe.

³⁶Ya hu'ehinagi nani lu lepilube. Asaga kaga boana'magi lilata nehana kaga'anilo alihi Hu'mau boana'i enele'mo fato fato hilina yupahi enoloka halina'mu yabe. ³⁷Kaika lu'ehilata kagakalo'mu Hu'mau bati bo nohane luto kigi molola foipa bo nohane luto kigi molola hilina'mu yabe.

Bona'i luga'amagi Yesu babeyafana hinogo bu galune'mu hi'ahana

Mk 8:11-12; Lk 11:29-32

³⁸To Mosehi keya ka'mu tisa bo hiti Felosi bona'i luga'amagi li'ahana: Tisao, topa hose foyaka mone li huto hitogo bu galune. ³⁹Ya lago Yesu enali kaga'anilo lu epi'ehina: Lenali yatai boana'ise, lenali bati mehana foipa boana'i nehabe. Lenali topa hose'na li huto hubo nelanaya lito mehiluna'mu yabe. To moneko ya'ma koyapa lu huto huto bo Yonaha topa hose'namo li huto hinogo'ni bu galana'mu yabe. ⁴⁰Yonau loegi monegi yege hiti sinihi hiti faya'mofihhi komopa'agu ko'ehina'a huto Kokulumaguti limi'ehina Bouba yege loegi monegi hiti sinihi loegi monegi ana suhi huto ma me'i komopa'agu kalina'mu yabe. ⁴¹Alihi Hu'mau sipi ka foya lilina yupahi Nineba bona'magi ho tilete lenali'i ka lepekilana'mu yabe. Hena'mugope Yonau kaga enalitoga lu epigo

kehelilete komopa'ani i gelehe hi su he'ahabe. To mone'na Yonahi be ligito ma ni'ina lu lepilube. ⁴²To Hu'mau ka foya lilina yupahi sipi a'i mone gihiti a'i yabe lilata nehana a'mouba ai koyapa'i sofo kegi'a oloto lenali hapatini li yege halina'mu yabe. Hena'mugope ai asaga me'i folagaha'aga buba buba huto Solomonih i hetofa kaga'a kehelimofa'na hu'ehina'mu yabe. Nani lu nolepube, malo'i kene moneuba ya'mana'ma Solomonih i hoto ni'ibe.

Foipa fele aku'i i behe huto o'ehina

Lk 11:24-26

⁴³Foipa feleuba bona'magi enugufaguti heleko nolimitomo ai ka me'i ni'ilinalo mino fulu hilina hepa kumu sa sa hulata nohibe. To ana foipa feleuba mino fulu hilina hepa'i bu megotomo ai gufa'agu ma luto lulata nohibe: ⁴⁴Nani he'mito o'ohuna noha'nigu aku'i bilube luto ekesa yigilata nohibe. Ya luto ekesa yigiloto i behe huto he'mito o'ehina noha'a le'mo bati hago gulu gulu luto ni'igo ana foipa feleuba bu golata nohibe. ⁴⁵To ya huto ni'igo ana noha'a bu goloto ai aku'i ana noha'aguti heleko limito buto sebeni'a foipa fele enele'moto ago ana noha'agu minelata nehabe. Koyapa'i ana bo nesi'a bati huto minolata hinamo yatai babu foipa fele ete ai gufagu bai tago ana bomoya foipa loto bati mehulata nohibe. To aku'i su holotomo ema afetogati hapi fito tilata nohibe. Yatai kanalo foipa bonatoga ya'ma suhi luto huto hilina'mu yabe, luto Yesu lu epi'ehina yabe.

Yesuhi ito'afu to gonamu tamu'agi

Mk 3:31-35; Lk 8:19-21

⁴⁶Yesu babu boana'i kaga lu epito nohigo ito'afi hiti gona'a hiti aitoga e'ahana. Bona'magi Yesuhi le'mo bego hi'ahago enali enemegesaga nehite Yesuhi kaga lu emilune'mu nohune lite bona'i enoloka he'ahana yabe. ⁴⁷Ya lago mone bouba ma luto Yesuhi lu emi'ehina: Itokafi hiti kogonaka hiti kaga li kimilune'mu ema fegutoga ho ti'ahabe. ⁴⁸Ya ligo Yesu lu'ehina: Kiyi'afu ito'nifu nohibe? Kiyigi nogona'ni nehabe? ⁴⁹Ya luloto Yesu koko pana'amagi nehanalo bu goloto enali kumu lu'ehina: Lenali bu galo. Ito'nigi to nogona'ni ma li nupa hite nehabe. ⁵⁰Kokulumalugu Afo'nifu nohinamofih i agoya hu emise bona'iya nani nogona'ni netali'nigi to nani ito'nigi nehabe. Ya luto Yesu lu epi'ehina yabe.

Bouba nose'na biha'a foyagu tili hilina

Mk 4:1-9; Lk 8:4-8

13 ¹Ana yupahi Yesu ana nohi he'miloto nagami hefuhu beletoga buto metoga minoloto boana'i kaga enelepilube'mu hu'ehina. ²Ya nohigo babu boana'i ete le'mo bego hi'ahana yabe. Ya hago ai boti

monelugu tito minago asaga boana'i enali hefuhu beletoga keheto ho tilete mine'ahana.

³To Yesu babu bame ka ma luto lu epi'ehina: Bo mone mino'ehina ai foya'agu nose'na legeya'a tili hilube'mu bu'ehina yabe. ⁴Ai ana nose'na legeya'a tili humo nobigo luga'a kapogu limo koko hu'ehigo namamagi ete fite ne'ahana yabe. ⁵To luga'a nose'na legeya'a me'i nesi'asi ni'ito efahubago hu'ehinagu limo koko hu'ehina yabe. Ya hina nose'na legeya'amagi mele'isi belete ti'ahana yabe, to hena'mugope me'i keta huto meni'igo yabe. ⁶Ya higo analo yege lo malago ana nose'na yegeuba lo hosopa noibe, hena'mugope lufusa'a me'i ema'alo melimi'ohuto yabe. ⁷To nose'na legeya'a luga'a ufehe naga yafamagihi folagaha'anigu limo iloto tilata nehabe. Ya nehana enali ufehe yafamagi yamu'i gite ifi telata nehabe. ⁸To luga'a nose'na legeya'a enali me'i foba huto nogoya hina melugu limo ilata nehabe. Ya hite tilete, enali legeya'a bati hite helata nehabe. Luga'amagi babu lite yafa ho figi gite legeya helata nehabe, luga'a nesi bati hite helata nehabe, to luga'amagi loefi monefi hite helata nehabe. ⁹Ya luto lu epiloto Yesu lu'ehina: Lenali lenekesa ni'inogomo keheli bati hite kehelilo.

Yesu bame ka nolinamofihi hapa'a

Mk 4:10-12; Lk 8:9-10

¹⁰To Yesuhi koko panana'a Yesutoga ete ma lite loka he'ahana: Henabe luto kai boana'magihi bame kaguti kaga lu noepine? ¹¹Ya nelago Yesu lu epi'ehina: Nani Hu'mamofihi Kapo'amofihi suguna ka yamofihi hapa'a lu hokolo hu lepolo'ohuna to lenali ya'ma kagaya keheli'ahabe. Aku'i enali'i ya'ma kamofihi meenelepise nohugo mekeheli'ahana. ¹²Bo moneuba ana'ina li'ehilinaya Hu'mau mone'a hiti molo eminogo li babu luto lilata hilina'mu yabe. To bo moneuba ana'ina yanuga meli'ehilina koyapa'i li'ehilinana minigilina'mu yabe. ¹³Bame ka nolunamofihi hapa'aya ya'ma hilata nehana ka'mu luto nolube. Enali enubu'anitu'i gili gili nehanaya ana'ina mana'a bu go fiya ite bu gelata menehabe. To enekesa'anitu'i kaga kehelilata nehanaya enali keheli fiya ite enekesa yigi bati hilata menehabe. ¹⁴Ma boanato'i lu huto huto bo Aisaiyau kaga mone lu'ehinauba nose'na legeya'a li huto nohibe. Ai ma luto lu'ehina yabe:

Lenali kaga kehelilanaya
ana kaga hapa'a keheli fe melilana'mu yabe.

Lenali lenubutu gili gili hilanaya
ananamofihi mana'a bu go fiya ite
bu megalana'mu yabe.

¹⁵Ma bona'magihi komopa'ani hekini loto
ni'ibe,
ya hu'ehigo

enekesa'aniuba kaga kehelilina'mu
 kosele'i aho'ehibe.
 To enali enekesa'ani negi no su ho'ehibe.
 Ya hu'ehigo
 enubu'aniuba ana'ina bu megalina'mu yabe,
 to enekesa'aniuba
 kaga mekehelilina'mu yabe,
 to lataha'aniguti kaga mana'a
 keheli fe melilana'mu yabe.
 To enali nanitoga lele'mo bati hilibe lite
 i behe hite enogo
 nani enele'mo bati hiluna'mu yabe, luto
 Hu'mau lu'ehina yabe.

¹⁶Ya hu'ehinaya lenali lenegelo bilo. Lenebutiniuba ana'ina bu galibe.
 Lenekesatiniuba kaga kehelilibe. ¹⁷Nani ma'naka luto lu nolepube.
 Koyapa'i babu lu huto huto bona'i hiti to komopa'anigu bati hina
 bona'magi ya'ma yatai lenali bu neganana bu galune lite hi'ahanaya
 enali bu mege'ahana yabe. To lenali yatai nekehelina kaga kehelilune lite
 hi'ahanaya mekeheli'ahana yabe.

Yesu nose'na biha'a hekolosemofihi bame ka'a lu yege ho'ehina
Mk 4:13-20; Lk 8:11-15

¹⁸Bo moneuba nose'na legeya'a foya'agu tili nohinamofihi bame ka hapa'a
 lenali kehelilete ana bame kaloti mana'a lilo. ¹⁹Asaga bona'i enali hetofa
 kaga kehelilete enali enekesa yigi bati menehana Satau hololu luto enalitoga
 nehetiloto enalilugu Hu'ma hetofa kaga nohekalana komopa'aniguti li
 he'milata nohibe. Ya'mamofihiya ai nose'na legeya'a kapogu limo koko
 nohinamofihi hapa'a yabe. ²⁰To nose'na legeya'a luga'a efahubago hinagu
 limo ilata nohibe, ya nohina suhiya bo moneuba kaga keheliloto ai
 mele'isi lito gelo bilata nohibe. ²¹Ya hu'ehina ai lufusa'a me'i komopa'alo
 mebu'ehibe. Ya hu'ehigo ai nesi kanasi minoto hosopa ilata nohibe. Alihi
 bona'i luga'amagi Hu'mamofihi kaga'a lu sibina hilune'mu hilete enali ana
 bomofihi ketana li kofi etete foipana suhi babu lite li huto hi etalana'mu
 yabe. Ya hinogo ana bomofihi hetofa kaga kehelito minose'na'a mele'isi
 he'mi etolata nohibe. ²²To nose'na legeya'a ufehe yamu'ubago hinagu limo
 ito notinamoya ma huto ni'ibe. Bo moneuba mono ka kehelilago ma melugu
 faga efaha fe'nohuba loe lae hu etoto keta besigo ai ana bomofinuguti
 ma'naka legeya'a huto hulata menohibe. ²³To nose'na legeya'a me'i bati huto
 giliba'a hiti me'i ninagu limo ilata nohinamoya ma huto ni'ibe. Bo moneuba
 mono ka keheliloto ekesa yigi bati hu'ehina supo huto ai nose'na'a samahi
 tito li huto hulata nohina'a ni'igo to bo moneuba babu lito li huto hulata
 nohina'a ni'igo to bo moneuba nesi'asi lito li huto hulata ni'ina yabe.

Kifi'namagihi bame ka'ani

²⁴Yesu bame ka mone fato'i ma luto lu epi'ehina: Bo moneuba nose'na legeya'a bati'a foya'agu tili nohina'a huto Hu'mamofihi kapo'aya ni'ibe. ²⁵Ya hu'ehina mone sininugu asaga boana'i enubu'i ke su he'ahago bo moneuba kifina legeya'a lito oto ana fateha'a bomofihi foya'a folagaha'agu tili huloto bu fa nohibe. ²⁶To alihi ana nose'na foya'agu nina nose'na a'nose huto ni'igo buto bu gana ana foipa kifina hiti notigo bu go'ehina yabe. ²⁷To ana foyamofihi afo'afihi lili'nalo bo'amagi be gelete bite ma lite lu emi'ahana: Sipi bo, kai nose'na legeya'a mana'i hekolo'ahapi luto lutamoba hena hu'ahanogo foipa kifina foyakagu noligibe? ²⁸Ya lago ai lu epi'ehina: Enali fateha'nimagi hi'ahabe lu'ehina. Ya ligo enali li'ahana, bite ana foipa kifi'na su ti he'milo luto nokehelihi henabe luto nokeheline? ²⁹Ya lite loka hago ai foya afo'afu lu'ehina: O'e. Lenali foipa kifi'na bite li su ti he'milanaga nose'na hite li su tilana'mu yagi mebilo. ³⁰Kifi'na hiti nose'na hiti anagu he'minogo sibi sibi hite tilenogo alihi nose'na li nupa hiluta yupahi li gehe lilune. To nani ma luto lu lepiluna'mu yabe. Lili'nalo pana'ni, lenali foipa kifi'na li nupa hite sa gilo. Lali logogu galuta'mu yabe. To nose'na'aya li nupa hite noha'niluga malalo luto lu lepiluna'mu yabe.

Yatu nose'na legeya'amofihi bame ka'a

Mk 4:30-32; Lk 13:18-19

³¹Yesu fato bame ka mone ma luto lu epi'ehina: Kokulumamofihi kapo'aya nose'na legeya'amofihi suhi luto ni'ibe. To ana nose'na legeya'a masiteti yabe lite lilata nehabe. Ana nose'na legeya'a bo moneuba lito foya'agu nokafabe. ³²Masiteti legeya'aya luga'a nose'na legeya'amagihi suhi luto sipina ma ni'ibe, ai lagaso'nasi ni'ibe. To ai ana nose'na hofa toto tiloto alihi tiloto'a asaga fato fato'mofihi nina nose'naya enebe noligibe. Ai yafa lolo hulago namamagi ete ana yafamofihi yaha'alo noha'ani ete gilata nehabe. Ya'ma kokulumamofihi kapo'a ana suhi huto hilibe.

Yisiti yabe nelananamofihi bame ka'a

Lk 13:20-21

³³Yesu fato bame ka mone lu epi'ehina: Kokulumamofihi kapo'aya yisiti yabe nelananamofihi suhi luto ni'ibe. A'i moneuba lito fala'ua magulu sipi'agu li tili hu mololoto li meyalo emalo huto li sibi sibi hulata nohibe. Ya nohigo aliha'a ana fala'ua'i yeye bito hofa tolata nohibe. Ya'ma kokulumamofihi kapo'a ana suhi huto huto hilibe.

Yesu kaga bame kagutigo lu'ehina

Mk 4:33-34

³⁴Yesu asaga kaga boana'i lu epi kagaya bame kagutigo lu epi'ehina yabe. Ai kaga mone lu hokolo huto lu meepi'ehina yabe. Ai bame

kagutigo lu epiba epiba hu'ehina yabe. ³⁵Ai lu huto huto bo moneuba ma luto kaga lu'ehinamofihi mana ka'a huto hilibe'mu yabe:

Nani kaga lu noepito'nimo bame kagutigo
 liluna'mu yabe,
 Kaga koyapa'i me'mo li huto huto
 molo'ehina
 yana kanaguti fala kito minomo tito oto
 yatai kana'alo hiti nina
 nani lu lepiluna'mu yabe.

Foipa kifi'namofihi bame ka hapa'a Yesu lu yege ho'ehina

³⁶Yesu asaga boana'i he'mi epololoto nonuga ti'ehina. Ya higo koko panana'a aitoga elete ma li'ahana: Foipa kifi'na foyagu noliginamofihi hapa'a lu limibo. ³⁷To Yesu ka'anilo lu'ehina: Bo ai hetofa nose'na legeya'a foyagu tili hulata nohinaya Kokulumaguti limi'ehina Bo nohibe. ³⁸To foyamoya asaga ma me'i yabe. To bati nose'naya kokuluma kapolo boana'i yabe. To foipa kifi'naya enali Satahi boana'a yabe. ³⁹Ai fatehuba foipa kifi'na legeya'a tili nohina bomoya Satau yabe. To nose'na li nupa huse kana'aya ma me'i su halina kana'a suhi huto yabe. ⁴⁰To enali foipa kifi'na li nupa hite logogu negana ana suhi ma melugu li huto hilana'mu yabe. ⁴¹Ai Kokulumaguti limi'ehina Bouba agelo'a enoho lifigo limite enali asaga'nauba bona'magihi hetofa hapa'ani li sibina nehilanana hiti to asaga bona'i foipa faipa suhi lite neminalana Hu'mamofihi kapo'aloti kaba hi'ehite enele'mo he'milana'mu yabe. ⁴²Ya hilete enali loba loba huto nina logogu enele'mo he'minogo bilete enagabu kumu behe behe baha baha ite sipi yibi hilete enabaga yogo'a henibe gofa hibe hilana'mu yabe. ⁴³Ya'mana yupahi Hu'mamofitoga komopa'ani melete minalana bona'i enalitoga yege legi huto Afo'anifihi hepa'aloti fi besa lo epalalina'mu yabe. To lenali bomagita lenekesa ni'inogomo keheli bati hite kehelilo.

Bouba efaha gu kumu melugu sa nohinamofihi bame ka'a

⁴⁴Efaha gu'i mone foyagu fala kite mele'ahana suhi luto Hu'mamofihi kokuluma kapo'aya ni'ibe. Bomouba bu goloto aku'i ifi notabe. Ya huloto ai sipi gelo bito buto asaga fe'noha'a epigo mina filago ai ana efatoti ana foya buto mina filata nohibe.

Fayaha'a fato fato'mofihi nina pesesu'i mina'amofihi bame ka'a

⁴⁵Bo moneuba pesesu'i hetofa hatofa'a mina filube luto sa sa hulata nohina'a huto Hu'mamofihi kapo'a ni'ibe. ⁴⁶Ai pesesu'i hetofa mina filoto ai buto asaga fe'noha'a fato bona'i noepito efaha nolibe. Ya huto ai efahi liloto i behe huto buto hetofa pesesu'i bu go'ehina lilata nohibe.

Faya gutalafamofihhi bame ka'a

⁴⁷Ana huto kokuluma kapoya faya gutalafa melete faya'i fato fato'mofihhi tite bai netana'a huto ni'ibe. ⁴⁸Faya'i tite bai telago faya'na nehana bomagi li kefeha hite kehetoga libiti nemalabe. Ya hilete enali meto minelete faya'i bati'mofihha'a lapelugu li nemalabe. To bati mehina faya'i menose'mofihhi ni'igomo enali he'milago bilata nehabe. ⁴⁹Ma me'i su halina yupahi ya'mana suhi hilina'mu yabe. Bati bona'magi folagaha'anigu bona'i foipa'a nehilana agelomagi ete enele'mo he'milana'mu yabe. ⁵⁰Ya hite sipi logo loba loba logogu enele'mo malalana'mu yabe. Ya hinogo ana sipi logogu sipi yibi bena nehite enabaga yogo'a henibe kolibe hilana'mu yabe.

Bomofihhi yatai fe'noha'a hiti koyapa fe'noha'a hiti ni'ibe

⁵¹To Yesu enoloka ho'ehina: Lenali asaga kaga lu nolepunamofihhi hapa'a akeheli hokolo hite nekehelifihe? Ya ligo enali lu emi'ahana: O'yo. ⁵²Ya lago Yesu lu epi'ehina: Ya hu'ehigo asaga keya kaga enelepise bona'i enali kokulumamofihhi kapo'alo kaga'mu enelepise lite akeheli su he'ahabe. Enali sipi nohi mone'mofihhi afo'a legi hite nehabe. Ai situa noha'agu tiloto yuhufana hiti tafana hiti li munu munu huto lito fegutoga limilata nohina suhi lite nehabe.

Yesuhi Nasalete bona'magi enemegesa hu emi'ahana

Mk 6:1-6; Lk 4:16-30

⁵³Yesu asaga bame ka lu epi su holoto ana hepa'i he'miloto bufa hu'ehina. ⁵⁴To ai hepa'aga i behe huto buloto asaga boana'magihhi Hu'mamofihhi mono ka'a enali mono noha'anigu lu epi'ehina yabe. Ya nohigo enali topa helete ma lite li'ahana: Ya'ma bouba kaga keheli bati huse'na'a hiti to topa hose'na li huto huse'namofihhi ka hapa'aba hiya'agati li'ehibe? ⁵⁵Yafa lolo huse bomofihhi pana'amo nohifi fato bobe? Maliau ito'afu nohifi fato pana'mofihhi ito'afube? To Yemesiu, Yosefeu, Simoniu, to Yutasiu ai gona'amo nehafi fato bomofihhi enogona'ani nehabe? ⁵⁶To ai etali'agiba magu lali hiti neminanamo ni'ifi hena hibe? Ya'ma keheliya ise'na'a asaga'i ai hiyagati li'ehibe? ⁵⁷Ya lite lilete enali siko nehite ipakafa helete enemegesa hu emi'ahana. Ya hago Yesu ma luto lu epi'ehina: Lu yege hose bomofihhi gi'a asaga hepatoga mino бага i'ehibe. Ya hu'ehina ai'a noho hepa'agu gi'a meni'ibe. ⁵⁸To ya'mu mana hepalugu Yesu sipi lili'na babu luto li hu enubulo memolo'ehina yabe. Hena'mugope enali Yesu li huto hinana'mufi to kaga lu epinalo enali keheli meemise mine'ahana yabe.

Yoni nagami folo epolose bo afili'ehina

Mk 6:14-29; Lk 3:19-20; 9:7-9

14 ¹Yata'a sipi kibina bo Helotiu ya'mana kanalo Yesuhi kaga'a keheli'ehina yabe. ²Ya huloto ai lili'nalo bo'a lu epi'ehina: Ya'ma

bo ai Yoniu nagami folo epolose bo yabe. Kene keliguti aku'i ho ti'ehibe. Ya hu'ehigo ya'ma asaga amuyana ai yato huto nohibe.

³Ai ya'ma huto ni'ibe. Koyapa'i Helotiu Yonihi yato seni nagatu naga'i etoloto nagalugu he'mi eto'ehina yabe. Helotiasiu ai Filipihi liha'a Helotihhi ai etali'afihhi hapa'amu lite ya hi ete'ahana yabe. ⁴Yata'a Yoniu nagami folo epolose Heloti kumu'i bati mehina suhi luto ma a'i li'ahane luto lu emi'ehina yabe. ⁵Ya noligo Helotiu Yonihi lubaha'a laga hilube'mu hinaya asaga boana'magi enubulo koli huto he'mi eto'ehina yabe. Hena'mugope enali Yoniu lu yege hose bo nohibe lite lilata nehana'mu yabe.

⁶Mone yupahi Helotihhi ito'afu keto'ehina kana'alo bona'i luga'a ete li gehesa hite nose'na gete nete mine'ahana yabe. Ya nehago Helotiasihhi pa'aua folagaha'anigu melekehi ito bula ola hu'ehina yabe. Ya higo Helotihhi laga'a gofa besi'ehina yabe. ⁷Ya higo ai ana pa'i lu emi'ehina: Nani asaga bona'magi enubulo ma'naka luto nolu ketobe. Kai ana'ina mone lilube luto gi halatana kimiluna'mu yabe. ⁸Ya ligo ana pa'mofihhi ito'afu ekesa bi'ehina kaga lu'ehina: Kai lape'i monelugu Yonihi nagami folo epolose bomofihhi lataha'a mololoto malo nimibo. ⁹Ya luto ligo Helotihhi gufagu keta besi'ehina yabe. Ya hinaya ai asaga bona'i li nupa hite minete nose'na nana bona enubugu ma'naka luto lu emi'ehina yabe. Ya'mu luto ai lu'ehina: Anana li emilo. ¹⁰Yoni naga nonugu nohinalo bona'i luga'a Helotiu enoho lifigo bite lubaha'a laga hi'ahana yabe. ¹¹Ya hite lape'i monelugu Yonihi lataha'a melete ite ete ana yafa'amofihhi emi'ahana yabe. Ai ana lape lito ito'afu nohinaga bu'ehina yabe. ¹²Ya hago Yonihi koko pana'magi ete gufa'a lite bite keli he ete'ahana yabe. Enali akeli he etelete Yesuhi bite lu emi'ahana yabe.

Yesu 5000 bona'i nose'na epi'ehina

Mk 6:30-44; Lk 9:10-17; Yn 6:1-14

¹³Yesu ana kaga keheliloto ana hepa'i nohe'mito boti lito bona'i menehana hepalugu bu'ehina yabe. Ai'asi bu'ehina yabe. Ya hu'ehigo enali boana'magi kehelilete hepa'ani nehe'mite mege'i lifite bi'ahana yabe. ¹⁴Alihi Yesu nagami beletoga keheto buloto babu boana'i nehago bu enogo'ehina yabe. Ya hago ai ginaga fi epiloto enebesi'ehina bona'ani enele'mo bati hu'ehina yabe.

¹⁵Utehe kana nohigo Yesuhi koko pana'a aitoga elete ma lite lu emi'ahana: Ma hepatoga bona'i menehabe, to sinihi agilina'a nohibe. Ya nohinagi kai boana'i enoho lifitogo enali abino. Enali hepatoga bila ela hite nose'na'ani sa sa hite nalabe. ¹⁶Ya lago Yesu lu epi'ehina: Hena hibe lite enali bilabe? Lenalitini nose'na epilo. ¹⁷Ya ligo enali lu emi'ahana: Maga lali nose'na babu lito meli'ohune. Lali loegi loegi monegi beleti nose'na hiti to faya'i loe hitisi ma li'ohune. ¹⁸Ya lago Yesu lu epi'ehina:

Lenali ana nose'na ite ete nimilo. ¹⁹To ana boana'i kifi'nalo melugu minalo luto lu epi'ehina. Ya luloto ai loegi loegi monegi beleti hiti to loe faya'i hiti liloto kokulumalugu bu golago tiloto nunumu huto fokehi li'ehina. To ai beleti li pata putu siloto koko pana'a epigo enali asaga boana'i lite bite epimofa'na hi'ahana yabe. ²⁰To enali asaga'i ana beleti nelago enumu'i hu'ehina. Ya higo enali nelete he'mina nose'na letuha'a li nupa hite safe 12 agu li bai te'ahana yabe. ²¹Bo ana nose'na ne'ahana maki'aya 5000 yabe. To enali ana'i yagapana'i leka mese'ahana yabe.

Yesu hefuhu nagamilugu kapo molo'ehina

Mk 6:45-52; Yn 6:15-21

²²Yesu koko pana'amagihi lenali botigu tilete kohe tete bite nagami hefuhi mula beletoga nehilo lu'ehina. Ya hiloto ai'a asaga boana'i enoho lifinogo hepa'aniga bilabe'mu hu'ehina. ²³Ai boana'i enoho lifigo hepa'aniga a'nebagu bohupo'i mone ninalo tito nunumu hilube'mu ti'ehina. Utehe kana'alo ai'asigo ana kosalo mino'ehina. ²⁴To boti nagami hefuhi folagaha'agu abulago sipi habafahi enubulogati oto nagami'i li galafu tuto botigu he'mi molo he'mi molo nohuto boti nagamilugu li kose'na hu'ehina yabe. ²⁵Etehi folugu'i go metepu'a hiti Yesu nagami hefuhi mupa'alo kapo moloto koko pana'a nehanalo o'ehina. ²⁶Koko pana'amagi Yesu nagami mupa'alo kapo moloto noago be gelete topa hete afoya foya ilete felemo noabe lite koli hi'ahana yabe. Enali sipi koli fato'mofihi hilete kehe sipi i'ahana. ²⁷Ya hago hololu luto Yesu enali kehe i'ehina: Lenali amuya malalo. Nani'ni nohube. Nani'ni nohube. Lenali koli mehilo. ²⁸To Pitau lu emi'ehina: Sipi Bo'ni. Ma'naka luto kaikamo nohutomo nani'i kehe itogo nani nagami'i mupa'alo kapo moloto kaitoga bilube luto lu'ehina yabe. ²⁹Ya ligo Yesu lu emi'ehina: Obo. Ya ligo Pitau botiguti leheko limiloto nagami mupa'alo li hapi fito kapo moloto Yesu nohinalo bu'ehina. ³⁰Ya hina ai aku'i habafahi bu goloto koli hu'ehina, ya huloto nagamilugu hapi fito limi'ehina. Ya nohuto'a ai kehe sipi iloto lu'ehina: Sipi Bo. Kai nehe'mobo. ³¹Ya noligo Yesu hololu luto Pitahi yato liloto lu emi'ehina: Kai kaga'ni li pili meko'ahane. Kai hena hibe luto loe lae kekesa nokeheline? ³²Etali loe sana sana botigu tite nemina'igo habafahi felele hu'ehina yabe. ³³To bona'i enali botigu minanamagi Yesuhi fokehi helete ma lite li'ahana: Ma'naka luto kai Hu'mamofihi Pana'a nohane.

Genesalete hepato enebesi'ehina bona'i babu lito Yesu

enele'mo bati hu'ehina

Mk 6:53-56

³⁴To nagami'i mula beletoga heleke melete bilete Genesalete hepa kegi'a bi'ahana. ³⁵Ya hago ana hepato bona'magi Yesu okaba'a be

ge'ahana. Ya hilete enebesi'ehina bonatoga enoho lifigo bite enebesina bona'i Yesutoga enele'mete eba eba hi'ahana. ³⁶Ya hilete enali Yesuhi buka tilete ma lite li'ahana: Ke, kai kaga melitogo enebesise bona'magi guketeka nekisa'alo meko hilana bati huto ni'ifihe? To enali ana bona'i Yesuhi gukete'alo meko hana bona'i bati hi su he'ahana yabe.

Tatatigihina enelepise'na

Mk 7:1-13

15 ¹To Felosi bona'i luga'a hiti keya kamu'i tisa bona'i luga'a hiti Yelusale hepatogati ete Yesu nohinalo nehetele ma lite loka he'ahana: ²Kai koko panakamagi hena hibe lite tatatigi limi'ahana ka'ani mege'i menemalabe? Enali nose'na nalune'mu nehitemo enayahi sese mehise fa'mene nelata nehabe. ³Ya lago Yesu kaga'anilo lu epi'ehina: Lenali kagatinisigo mege'i nemelele hena hibe lite Hu'mamofihi keya kaga'a mege'i menemalabe? ⁴Mono ka bukugu Hu'mau ma luto lu'ehina yabe: *Itokafinogo afokafinogo enele'mo bati huto etemege'i molobo. To mone kene'uba ito'afinogo afo'afinogo kaga foipa'a lu etatalina ho fililina'mu yabe.* ⁵Ya hu'ehina lenali ma lite lilata nehabe: To bo moneuba ito'afinogo afo'afinogo etehe'malina efahi ni'inamo meetimilube, to nani Hu'mamofihi emilube lu'ohuna yabe lulata nohibe. ⁶Ya luloto ai ito'afinogo afo'afinogo etele'mo bati mehulata nohibe. Lenali ya'mana suhi li huto nehitemo Hu'mamofihi keya ka'a li gofa nehete lenali hapatimofinogo li saga hilata nehabe. ⁷Lenali fagalo bona'i. Koyapa'i lu huto huto bo mone Aisaiyau lenali kumu luto fayahi ma luto go'ehibe:

⁸ Ya'ma kana'alo

boana'magi nigini enabaga'anitu'i

li saga nehite

to aku'i komopa'ani nanitoga memelese

foto'i melete minelata nehabe.

⁹ Enali fa'mene bona'magih

kaga lu epimofa'na nehite:

Ya'ma kaga

Hu'mamofihi kaga'a yabe lilata nehite.

Enali nani nigini fa'menena'mu

helata nehabe luto

lu'ehina yabe.

Bomofihi le'mo kolo notanana

Mk 7:14-23

¹⁰To asaga boana'i Yesu kehe i nupa huloto ma luto lu epi'ehina: Kaga mone lu lepilunagi lenali lenekesatu'i kehelilete keheli fiya ilo.

¹¹To bomofihi komopa'agu tilata nohinanauba ana bo le'mo kolo tolata

menohibe. To bomofihi ai komopa'aguti fegetoga heleko limilata nohinanauba bo le'mo kolo tolata nohibe.

¹²Ya'mana kana'alo Yesuhi koko pana'a aitoga ete ma lite lu emi'ahana: Felosi bona'magi kagaka kehelilete kipakafa nehabe. Ya nehana kai ya'manana akeheli'ahapihe? ¹³Ya lago Yesu ka'anilo lu epi'ehina: Afo'nifu kokulumulugu nohinamofihi foya'a samahi tito ni'ibe. Asaga kifina Afo'nifu kokulumulugu nohinauba foya'agu mehekolo'ehina kifina nina hapa'a hiti li su ti he'mi su halina'mu yabe. ¹⁴To lenali he'mi epelenogo enali mineno. Enali enubu pisi lina bona'i nehite enali ana hite enubu'ani pisi lu'ehina bona'i fato'amagihi kapo enelepilune'mu nehabe. Ya hu'ehinaya bu'a pisi lu'ehina bouba fato bo ana huto bu'a pisi lu'ehina bo kapo lepilube'mu hilinaya etali loe sana sana ho kete keli kapogu limila'ibe. ¹⁵Ya ligo Pitau Yesuhi ka'alo lu'ehina: Kai ya'mana bame kamofihi hapa'a lu hokolo hitogo kehelilune. ¹⁶Ya ligo Yesu lu epi'ehina: Lenali hiti kaga keheli fe melilana'a hite nehafihe? ¹⁷Lenali keheli bati menehafihe? Ana'ina'a bomofihi bagagu tilata nohinana gupa'agu tito minoloto aku'i gufa'aguti heleko limilata nohibe. ¹⁸Ya hu'ehina ana'ina bomofihi baga'agu ni'inati fegetoga heleko limilata nohinaya komopa'aguti huto huloto tilata nohibe. Ai ya'mananauba bomofihi komopa'a li kolo tolata nohibe. ¹⁹Ana'ina enipaguti tilata nohinana ma huto ni'ibe. Foipa enekesa yigise'na, bona'i enoho filise'na, bo alobo loko huse'na, moko lise'na, gumina huse'na, faga faga luse'na, to bona'i enipakafa hoto enemegeka luse'na yabe. ²⁰Asaga ya'manauba bomofihi le'mo kolo tuba ilata nohibe. Ya hu'ehina bo moneuba yahi okala mehuse nose'na lito nolata nohina ya'mananauba bomofihi le'mo kolo tuba meilata nohibe.

A'uba Yesutoga komopa'a molo'ehina

Mk 7:24-30

²¹To Yesu ana hepa'i he'miloto Taiya hiti to Saitoni hepa kegi'a bu'ehina yabe. ²²Kena a'i mone ana kegi'a nominana a'uba Yesutoga o'ehina. Tebitihi pana'abe. Ai ya luto kehe i'ehina. Kai kiginaga fi nimibo. Foipa feleuba pa'nimofihi le'mo sibina nohinagi nehe'mobo. ²³Ya ligo Yesu kaga meluse mino'ehina. To enali Yesuhi koko pana'a aitoga elete ma lite lu emi'ahana: Ma a'uba lemege lemege nohuto kaga luba luba nohina kai ho lifitogo bufa hino. ²⁴Ya lago Yesu lu emi'ehina: Isilaeli sipisipi yaga fenene hi'ahanalo'mu luto Hu'mau noho lifigo maga limi'ohuna yabe. ²⁵Ya ligo ana a'uba Yesuhi gigusagu oto okabagati lipito koloto lu'ehina: Ke. Sipi Bo, kai nehe'mobo. ²⁶To Yesu ana a'mofihi ka'alo lu emi'ehina: Yagapana'magihi nose'na lito kalamagihi he'mi epiluta bati mehu'ehibe. ²⁷Ya ligo ana a'uba Yesuhi lu emi'ehina: Sipi Bo, ya ma'naka nolane. Ya nohataya kalamagi afo'anigi nose'na nenago letuha'a

hitamofihhi me'agu limo ilata nohina enali kehelite nelata nehabe. ²⁸Ya ligo Yesu ai a'mofihhi lu emi'ehina: Akae, ma a'i yale. Kaga keheli fe luse'naka sipina ni'ibe. Ana'ina lolo hu netalane luto nolatanaya huto hu kimilina'mu yabe. Ya ligo ana'asilo ana a'mofihhi pa'a ka'muya hepalugu nohigo bati hu eto'ehina yabe.

Enebesise bona'i Yesu babu lito enele'mo bati hu'ehina

²⁹Yesu ana hepa'i he'miloto Galili hefuhi beletoga kapo moloto tubu'ehina. Ai kosa bohupo'isi mone ninalo tito mino'ehina. ³⁰Ya nohigo babu boana'i enali li nupa hite ai nohinalo e'ahana. To enigigusa sibina hina bona'i, enubu pisi lu'ehina bona'i, felisa'ani kuyugu hu'ehina bona'i, enabaga hekini lo'ehina bona'i to fato fato epesi'ehina bona'i enali babu lite Yesutoga enele'mete e'ahana yabe. Enali enele'mete ete Yesuhi gigusa'agu malago ai asaga'i enele'mo bati hu su ho'ehina yabe. ³¹Ya higo asaga boana'i enali enekesa yigi babu li'ahana yabe. Hena'mugope negi bona'i aku'i kaga lila, felisa'ani kuyugu hina bona'i bati hu epolola, enigi'ani sibina hu'ehina bona'i kapo melela, to enali enubu'ani pisi lu'ehina bona'i enubu'ani i gili hula hinana be gelete'ani yabe. Ya hilete enali Isilaeli bona'magihi Hu'ma'anifu ai kumu fokehi hete gi'a li saga hi'ahana yabe.

Yesu 4000 bona'i nose'na epi'ehina

Mk 8:1-10

³²Yesu koko panana'a kehe i nupa huloto ma luto lu epi'ehina: Ma bona kumu'i nani niginaga nofibe. Hena'mugope enali loegi monegi yupahi nani hiti mine'ahana yatai nose'na nalana'a meni'ibe. Nani nose'na meepise enoho lifinogo'ni bilana enali kapoga nebinogo enubu neta neta bilenogo ho kete kela ya hila hilabe'mu nolube. ³³Koko pana'amagi Yesuhi loka he'ahana: Ya'ma ka me hepatoti lali babu nose'na hiya'agati liloto ya'ma babu boana'i epilune? ³⁴Ya lago Yesu enoloka ho'ehina: Lenali henaki'a beleti nose'na li'ahabe? Enali lu emi'ahana: Sebeni'a beleti hiti to faya'i lagaso meso'a loesi hiti li'ohune. ³⁵Ya lago Yesu asaga boana'i melugu minalo ligo enali melugu mine'ahana. ³⁶To ai sebeni'a beleti hiti to faya'i lagaso meso'a loesi hiti yanuga liloto Hu'mamofitoga nunumu huto fokehi holoto gofa gofa holoto koko pana'a epi'ehina. Ya higo koko pana'amagi enali leli'ali hite asaga boana'i epi'ahana yabe. ³⁷Asaga bona'i ana nose'na nelago enumu hu'ehina yabe. Ya higo Yesuhi koko pana'amagi letuha'a li nupa nupa hite sipi sepeke'na 7 agu li bai te'ahana yabe. ³⁸To asaga bo ana nose'na ne'ahanaya 4000 bomagi ne'ahana yabe. To ana'i yagapana'i hiti leka mesone.

³⁹To silaga boana'i Yesu enoho lifigo nebago ai boti monelugu tiloto Magatani hepa kegi'a bu'ehina yabe.

Topa hose'na bu galune'mu li nupa hi'ahana

Mk 8:11-13; Lk 12:54-56

16 ¹Felosi bona'i to Satusi bona'i yabe nelana hiti luga'a enali Yesutoga elete fi taga hu etalune'mu hi'ahana. Enali: Kokulumalugu topa hose'na mone li huto hitogo bu galune li'ahana. ²Ya ligo Yesu ka'anilo nona'a lu epi'ehina: Utehi yege limi falalube'mu nohuto kokuluma'i fi beyege toloto safa logo nohigomo lenali bati huto yago yege lalinagi lite lilata nehabe. ³To etehi sopohi giloto kokuluma'i safa logo nohigomo yasi hiti ko'i yatai ilibe lite lilata nehabe. O'yo, lenali bati hite kokulumamofihi meha'a be gelete loko hilata nehabe. Ya nehana lenali yatai kanamofihi meha'a be gelete loko mehilana nehabe. ⁴Lenali bati mehana boana moko fako lite neminana boana'magita nani kumu'i topa hose'na li huto hu lubulo molobo nelabe. Ya nelana nani topa hose'na mone li huto hu lenubulo memalaluna'mu yabe. Lenali koyapa bo Yona huto hu'ehinanamofihi topa hose'na'ago anasi bu galana'mu yabe. Ya luto luloto Yesu he'mi epololoto bu fa hu'ehina yabe.

Felosi bomagi hiti to Satusi bomagi hiti hapa'ani yabe

Mk 8:14-21

⁵Enali Yesuhi koko pana'amagi botigu tite hefuhu nagami'i helekete nebitemo enekesu hago beleti nose'na mone'a melise bi'ahana yabe. ⁶To Yesu ma luto lu epi'ehina: Lenali kaba hu bati hilo. Lenali Felosi bona'i hiti to Satusi bona'i hiti enali yisiti legita hapa'anilo kaba hu bati hilo. ⁷Ya ligo enali'ani ma lite musi musi ka li'ahana: Lali beleti melise o'ohuta kamo'mu nolibe. ⁸Ya lana kaga'ani Yesu akeheliloto ma luto lu epi'ehina: Kaga keheli bebe sose'natini nesi'asi ni'i lepalana bo hena hibe lite lali beleti lito meo'ohune ya lite musi musi ka nelabe? ⁹Lenali keheli bati mehi'ahafihe? 5000 bonato to 5 beleti gofa gofa ho'ohunamoba lenali lenekesu ho'ehifihe? Henaki'a safegu letuha'a li bai te'ahana ni'ibe? ¹⁰To 7 beleti 4000 bomagi epugo ne'ahana kagamoba lenekesu ho'ehifihe? To henaki'a sepeke'nagu letuha'a li bai te'ahana ni'ibe? ¹¹Beleti nose'namu melu'ohuna. Lenali hena hibe lite mekeheli'ahabe? Lenali Felosi bo hiti Satusi bomagihi yisiti suhi luto fagalo hapa'ani ni'inagi kaba hu bati hilo. ¹²Ya ligo enali beletimofi yisitimu'i kaba hu bati hilo melibe. Ai Felosi bomagi hiti to Satusi bomagihi kaga'anilo kaba hu bati hilo luto nolinagi lite enekesa yigi fe li'ahana yabe.

Pitau Yesuhi Hu'mau ho lifi'ehina bo yabe lu'ehina

Mk 8:27-30; Lk 9:18-21

¹³Yesu Sisalia Filipai kegi'a buloto ya'mana kanalo koko pana'a ma luto enoloka ho'ehina: Asaga boana'magi Kokulumaguti limi'ehina Bo kumu'i

hena hibe lite lilata nehabe? ¹⁴To enali lu emi'ahana: Luga'a bona'magi Yoniu nagami folo epolose bo nohibe nelabe. To luga'a bona'magi Elaiyau nohibe nela. To luga'amagi ai Yelemaiya nohifi fato lu huto huto bo nohifi lite lilata nehabe. ¹⁵Ya lago Yesu lu epi'ehina: To lenalitini nani kumu'i kiyi'afube lite nig'i'ni nehabe? ¹⁶Ya ligo Simoni Pitau ka'alo nona'a lu'ehina: Kai Hu'ma nominanamofihi pana'a le'mo ho ti'ehina bo Mesia nohane. ¹⁷Ya ligo Yesu lu emi'ehina: Simonio, kai Yonihia pana'a yale. Kai kegelobibo. Ma melugu bo moneuba ya'ma lamana kaga mekelepi'ehinagi Afo'nifu kokulumalugu nohinauba ai'a kelepi'ehigo ya'ma kaga nolane. ¹⁸Ya hanogo nani lu nokumube: Pita, kaiya efa tegi suhi luto nohane. Ya hu'ahatago ya'mana efato nani mono noha'ni giluna'mu yabe. Filise'namofihi amuya'auga be megilina'mu yabe. ¹⁹To nani kokuluma kapolo hokolo hiltanafi to hekini lolatanafi kimiluna'mu yabe. To kai ma melugu nominotoka hapa'a mone hekini loto lu laga hu epelenogo kokulumalo bo, Hu'mau ana huto lu laga hilina'mu yabe. To ma melugu nominotoka hapa'a mone hokolo hu epelenogo kokulumalo bo, Hu'mau ana huto hokolo hilina'mu yabe. ²⁰To Yesu koko pana'a amuya luto enekesa bi'ehina: Nani kumu luto lenali Hu'mau ho lifi'ehina pana'i Mesia nohibe lite lu yege hete asaga bona'i lu meepilo.

Yesu gabu'i ginogo fililinamofihi ka'a lu'ehina

Mk 8:31-9:1; Lk 9:22-27

²¹Yana kana'alo Yesu koko pana'a kaga hapi fito lu hokolo huto lu epi'ehina: Nani Yelusale hepatoga buloto'ni enikibina bo, sipi mono bo to keya ka tisa bo enalitogati nagabu foya li kofilube. Enali noho fililenogo yege loebe monebe minoloto'ni aku'i ho tiluna'mu yabe. ²²Ya ligo Pitau le'mo beletoga moloto amuya ka emekiloto ma luto lu emi'ehina: Sipi Bo, enali ya mehi ketalana'mu yabe. Ya'mana suhi kaitoga huto mehilina'mu yabe. ²³To Yesu i behe huto Pitahi bu goloto ma luto lu emi'ehina: Sata, kai nanitogati bufa hubo. Kai kapo biluna'a hekini lo netalube'mu nohapihe? Kai kaga nolataya ma melugu bona'magihika kaga nolane, to ai Hu'mamofitogati meo'ehibe.

²⁴Yalo Yesu koko pana'a ma luto lu epi'ehina: Bo moneuba nani'i hiti bilube lutomo ai'a gufa'amu ekesa meygise malipu yafa'a lito kofiloto nemege'i meleno. ²⁵To bo moneuba ai'a gufa'a li buto bito koli koli huto minalina ai gufa'amofihi mino kosaba huse'na'a minigilina'mu yabe. To bo moneuba nani kumu luto gufa'a he'milina alihi ai gufa'amofihi mino kosaba huse'na'a aku'i lilina'mu yabe. ²⁶To bo moneuba ma melugu asaga fe'nohi ninana lilube luto lilinaya to ai'a meha'a minigilibe. Ya hinogo asaga fe'nohanauba hena huto li buto bito he'malina ni'ibe? To boubha hena mina'a he'mito meha'a aku'i lilina ni'ibe? ²⁷Kokulumaguti limi'ehina Boubha Afo'afihika fana mehena'a hiti aku'i noenogo to agelo'a hiti alana'mu yabe. Ya hilina yupahi asaga boana'magi

fato fato suhi hi'ahana hapa hapa'animofihi nona'a li yege ho epalalina'mu yabe. ²⁸Nani ma'naka lu nolepube. Bo luga'a ma ho tilete nehanaguti mefilise nehite bu ge'ehinogo Kokulumaguti limi'ehina Bouba kibina bo lolo huto minoloto aku alina'mu yabe.

Yesuhi gufa'a fato suhi huto i gelehe hu'ehina

Mk 9:2-13; Lk 9:28-36

17 ¹To loebe loebe loebe yege bulago minelete Yesu Pita hiti Yemesi hiti to ai gona'a Yoni hiti enele'mo mege'i toloto yatama kosagu enele'moto tilago ana kosalo enali'anisigo mine'ahana yabe. ²To Yesuhi gufa'a enali enubulo le'mo fato suhi hu eto'ehina yabe. To okaba'a fi besa loloto yege legi huto huto hu'ehina. To gukete'a koholina huloto gulu gulu luto fi besa lo'ehina. ³To koyapa bomale'i Moseugo Elaiyaugo Yesutoga nehetelete kaga lite nehago bu ge'ahana. ⁴Pitau ya hago bu enogoloto ma luto Yesuhi lu emi'ehina: Sipi Bo, ya'maga nohuta bati huto nohune. Kai bati huto yabe litogomo yege nohi loegi monegi maga gilune. Mone kai'i yagi mone Mosehi yagi to mone Elaiyahi yagi huto gi lepalalube. ⁵Ai kaga luto nohigo sopohi mone besa lo'ehinauba enele'mo samapahi bu'ehina. To ana soponuguti nogo mone ma luto huto hu'ehina: Ya'ma ai nibita hina pana'ni nohibe. Nani nipa'ni aitoga emilata nohube. Lenali kaga'a keheli emilo. ⁶Ya noligo Yesuhi koko pana'amagi topa hete sipi koli hilete melugu enokabagati lipi gehesa hi'ahana yabe. ⁷Ya hago Yesu enalitoga oloto enugufalo meko huloto lu epi'ehina: Lenali koli mehite ho tilo. ⁸Ya ligo enali be go saga hilete Yesu ai'asigo nohigo bu ge'ahana yabe. To loemale'i minigi'aha'ina yabe. ⁹Enali ana kosa he'milete kapo melete nelimite amuya kaga luto enekesa biloto Yesu ma luto lu epi'ehina: Ya'manana huto higo lenali bu ge'ahana lenali bona'i luga'a meepilo. Lenali komopatinigu melelete nehinogo Kokulumaguti limi'ehina Bouba keli he'miloto ho tilenogo ana kaga lu huto hilo. ¹⁰To Yesuhi koko pana'amagi ma lite loka he'ahana: Keya ka kehelise bomagi hena hibe lite Elaiyau yata'a alibe lilata nehabe? ¹¹Ya lago Yesu lu epi'ehina: O'yo, ma'naka nelabe. Elaiyau asaga'na oto li loloba hilube'mu yata'a kohe toto o'ehina yabe. ¹²Ya hu'ehina nani ma'naka luto lu nolepube. Elaiyau ai ao'ehibe. Ya hu'ehinamo bona'magi Elaiyau nohibe lite menekehelibe. Ya hite enali enemehuba hinanamofihi mege'i melete nehite fato fato suhi hi ete'ahana yabe. Kokulumaguti limi'ehina Bomofihi ana suhi hi etete gabu'i gilinana hi etalana'mu yabe. ¹³Yesu ya luto lu epigo enali koko pana'amagi enekesa i hokolo higo Yoniu nagami folo epolose bomo'mu linagi lite keheli bebe se'ahana yabe.

Pana'i mone foipa feleuba le'mo foipa nolana Yesu le'mo bati hu'ehina

Mk 9:14-29; Lk 9:37-43a

¹⁴To enali babu boana'i nupa hite nehanalo nehe netigo bo moneuba Yesutoga oto gigusa'agu lipito minoloto ma lu'ehina: ¹⁵Sipi Bo, kai

pana'nimofihigi kiginaga fi emibo. Ai negi nagi noto nominago gufa'a nohetibe. To ai babu yupahi afoya tibibi nohuto nagamilugu ho koto kola to logogu ho koto kola nohibe. ¹⁶To nani koko panaka nehanalo le'mo bati hu etalafi luto le'moto onamo enali le'mo bati mehilana'a hi'ahabe. ¹⁷Ya ligo Yesu ka'alo lu'ehina: Akae, lenali yatai kanalo boana'ise, lenali ka keheli ule'ale huse'natini meminabe, to komopatini bebe soto meminolata hibe. Henaki yupahi lenali hiti nani minoto foipanatini kofeli'ali nohube? To ana bomofi kumu ma luto lu emi'ehina: Panaka le'moto maga obo. ¹⁸Yesu ana foipa felemofihigi pana'i he'mi etoto bufa hubo ligo ana foipa fele nohigo ana'asilo ana pana'i bati hu'ehina yabe.

¹⁹Yalo Yesuhi koko pana'asigo Yesutoga elete ma lite loka he'ahana: Hena hu'ehigo lali foipa fele ho menolufune? ²⁰Ya lago Yesu ma luto lu epi'ehina: Hena'mugope lenali nanitoga komopatini nesi'asi mele'ahana'mu yabe. Lenali ma'naka lu lepilunagi kehelilo. Lenali nalepa legeya'a legi huto nanitoga komopatini nimise'natini minalina, ma kosamofihigi mula kegi'a bu molobo lilana ai lenabaga liyafa huto bilina'mu yabe. To lili'na yege yege'i lenalitini lilana'mu yabe. ²¹Ya hu'ehina ya'manamofihigi foipa fele ho lifise kapo'a fato'i mone meni'ibe. To nose'na mo sito nunumu foya liseubago anasi ana foipa fele ho lifilina'mu yabe.

Yesu fililoto aku'i ho tilinamofihigi kaga'a lu'ehina

Mk 9:30-32; Lk 9:43b-45

²²Yesuhi koko pana'a Galili hepato aku'i e nupa hilago kaga mone ma luto lu epi'ehina: Kokulumaguti limi'ehina Bomofihigi fateha'amagi enayanugu le'mete bite bilana kana'a anasi hupamone nohibe. ²³Ya hinogo enali ho fililabe. To ai melugu limito yege loegi monegi minoto aku'i ho tilina'mu yabe. Ya luto Yesu lu epigo koko pana'amagi enipagu keta hu'ehina yabe.

Sipi mono noto Yesu takisi efahi he'mi'ehina

²⁴Yesu koko pana'a hiti Kapaneami hepato nehetilago sipi mono noto takisi efahi lise bomagi Pitatoga ete ma lite loka he'ahana: Tisatiniuba sipi mono noto takisiba nohe'mina ni'ifihi? ²⁵Ya ligo Pitau: O'yo, lu'ehina. To Pitau nonuga notigo Yesu aitogati yata'a ma luto loka ho'ehina: Simoni, kai hena hibe luto nokeheline? Ma melugu enikibina bolo kiyi'afu takisi holata nohibe? Mana hepato boana'magifi to bonoho bona'magibe? ²⁶Pitau lu emi'ehina: Bonoho bona'magi yabe. Ya ligo Yesu lu emi'ehina: Ya hu'ehinagi ya'mana hepato bona'i takisi efahi mehe'milana'a huto ni'ibe. ²⁷Ya hu'ehina lali enele'mo topa ho lalune. Kai nagami hefuto buloto faya huku molobo. To yata'a lilata faya'i lito baga'a li aka huloto efahi bu galata'mu yabe. Kai ya'mana efahi liloto nani kaika hiti takisi he'mitogo su halibe.

Kuyu'afu ai sipi bo minalibe

Mk 9:33-37; Lk 9:46-48

18 ¹Yana kana'alo Yesuhi koko pana'a aitoga nehetele ma lite loka he'ahana: Luga'a enebe ligito kuyu'afu sipi bo kokuluma kapolo kaba hilina ni'ibe? ²Ya lite loka hago Yesu pana'i lagaso'a mone kehe igo ago folagaha'anigu le'mo ho ti'ehina. ³Ya huloto ma luto lu epi'ehina: Nani ma'naka luto lu nolepube. Lenali komopatini i gelehe hilete pana'i lagaso'a legi mehilana lenali kokuluma kapo'alo mebilana'mu yabe. Ma'naka luto lu nolepube. ⁴To bo moneuba mino laba huto minoloto ma lagaso pana suhi huto minalina, ya'mana bouba luga'a bo enohoto kokuluma kapolo minalina'mu yabe. ⁵To bo moneuba nani nig'i'niimu ekesa keheliloto yagapana'i ya'ma'a enele'mo bati huto enehe'malina, ai'ya nani'i nehe'malina'mu yabe.

Mi'mi huse'nauba foipana li huto nohibe

Mk 9:42-48; Lk 17:1-2

⁶Ya hu'ehina bo moneuba yagapana'i ya'ma huse'a nehilana folagaha'aniguti komopa'ani nanitoga melete minalune'mu hilana enele'mo nanitogati he'miletemo'mu ya'ma bo lubaha'agu sipi efa kosahi naga i etelete le'mete bite hege nagami folagaha'agu he'mi meleno. ⁷To ma melugu bomagi bona'i luga'a foipanagu enelepote bilata nehana boya sipi keta epesilina'mu yabe. Ma'naka luto ya'manana huto hilina'mu yabe. To anana li huto hilina boya sipi keta besilina'mu yabe.

⁸To kigi kayahakauba foipana li huto nohinogomo kai laga huto he'milago bubo. To kayahi mone kegi'a hiti kigigusa mone kegi'a hitigo minolenogo bati huto minoba minoba hepato bilata'mu yabe. To kigi kayahi luga luga hiti ni'inogo nohuto logo loba loba huto mesobose hepato bilata bati mehu'ehibe. ⁹To kubukauba foipana li huto nohinogomo kai li kutu hoto he'milago bubo. To mone kegi'a kubusigo ni'inogo minoba minoba hepato bilata bati huto ni'ibe. To kubuka luga luga bati huto ni'inogo nohuto logo loba loba huto mesobose hepato bilata bati mehu'ehibe. Ya luto Yesu koko pana'a lu epi'ehina yabe.

Minigi'ehina sipisipi yagamofih i bame ka'a

Lk 15:3-7

¹⁰Lenali ya'ma yagapana'i fa'menena nehabe lite li lalabe. Lenali kaba hu bati hilo. Nani ma'naka luto lu nolepube. Kokulumalugu nani Afo'nifihi bu'alo enali agelo'ani kaba hu epelete neminabe.

¹¹Hena'mugope Kokulumaguti limi'ehina Bouba minigi'ahana sipisipi yaga enele'mo huto hilube luto limi'ehina'mu yabe.

¹²Lenali hena hibe lite nekehelibe? To bo mone'mofih i sipisipi yaga'a 100 nehilanaguti moneko'isi minigilina hena hilina ni'ibe? Ai sipisipi

yaga'a 99 analo he'mi epelenogo kosagu kifi'na laga hite nete nehinogo moneko sipisipi yaga'a minigi'ehina sa sa hilina'mu yabe. ¹³Nani ma'naka luto lu lepilube. Ai sa sa huto ana sipisipi yaga le'mo huto hulotomo ana moneko yaga'mu luto sipi gelo biloto nu kito bilina'mu yabe. To 99 sipisipi yaga silaga'i fenene mehi'ahanamagi kumu luto gelo mebilina'mu yabe. ¹⁴Ya'mana suhi luto kokulimalugu Afotinifu nohinauba ma yagapana'i nehana folagaha'aniguti mone meminigilibe luto lulata nohibe.

Bonaka moneuba foipana hu'ehilina le'mo bati huse'mofihi hapa'a

¹⁵To bonaka moneuba kaga foipa'a lu keto'ehinogomo kai bitogo letalitisigo nehitetiti ana foipana'a lepibo. Letali letugufatitigu fala kite ya'mana kaga lu koguna iliyo. To kagaka keheli kiminogomo kalalukafihi ale'mo fulu hu'ahane. ¹⁶To kagaka keheli mekiminogomo kai mone'isifi loefi bona'i enele'mo'ohuto moneka bilo. Ya hitogo lugufa bomagi enali kaga mono kagu nina'a hite lu huto hilana'mu yabe. ¹⁷To ana bomagihi kaga'anilo keheli meepinogomo mono nonugu asaga mono boana'i lu huto huto lu epibo. To asaga boana'magi kaga'ani keheli meepinogomo bonoho bona'ifi takisi nelina bomagihi suhi luto nohane luto keheli emibo.

Lu laga hu eto'ehina

¹⁸Ma'naka luto lu nolepube. Lenali asaga'na ma melugu ninanamofi kumu lu laga hilana Hu'mau kokulimalugu ana suhi huto lu laga hu epalalina'mu yabe. To asaga'na ma melugu bati huto lilina'a Hu'ma kokulimalugu ana huto bati huto yabe lilibe.

¹⁹Ma'naka mone'a hiti luto lu lepilube. Ma melugu bona'magita folagahatiniguti bo loemale'i ana'ina monekoto komopa'atiti li hepilete anana lilu'ibe lite nunumu hila'ina, yalo Afo'nifu Hu'ma kokulimalugu nohinauba anana etimilina'mu yabe. ²⁰To bo loefi to loegi monegifi nani nigimimu enekesa kehelilete moneko hepato li nupa hite minalana ya'mana hepato nani folagaha'anigu enali hiti minaluna'mu yabe.

Koko pana'i foipana'a li mehe'misemofihi bame ka'a

²¹To Pitau Yesutoga oloto ma luto loka ho'ehina: Sipi Bo henaki yupahi nalalu'nifu ka foipa lu netolenogo le'mo fulu hilube? Sebeni'a yupahifi? ²²Ya ligo Yesu ma luto lu emi'ehina: Nani sebeni'a yupahi yabe luto lu mekimi'ohube. Sebeni'a teni yupahi babu yupahi kalalukafihi le'mo fulu hubo luto lu'ohube. ²³Ya hu'ehina gihiti bo moneuba lili'nalo pana'a hiti tina hi'ahana li eto hilune'mu nehana suhi luto kokuluma kapoya ni'ibe. ²⁴Ai hapi fito tina hu ete'ahana li eto hilube'mu nohigo bo mone samahi tito tola efahi li'ehina bo le'mete e'ahana yabe. ²⁵Ya hago ana

bo ai tina'alo he'milina efaha'a memino'ehina yabe. Ya higo ana bo hiti fe'noha'a hiti liha'a yagapana'a hiti fato bonatoga noepito efahi lilube lu'ehina. Ya hinogo tina hu'ehina efaha'ni he'mi'ehina okane'a бага ilibe. ²⁶Ya ligo ana koko pana'auga ana gihiti bo'amofihi gigusagu lipiloto melugu bu goloto ma luto gihiti bo'amofihi lu emi'ehina: Kai kiginaga fi nimito negeba hu'ohubo. Nani asaga tina'ni pa so su haluna'mu yabe. ²⁷To aku'i ana gihiti bouba koko pana'amofi kumu ginaga figo tina hu eto'ehina ana'a hilibe noluto ana koko pana'a he'mi eto'ehina yabe.

²⁸Ya higo ya'mana bouba heleko limito buto lili'na moneka neli'ina bo mone'mofihi tina huto tola efaha'a nesi'a emi'ehina bo bu goto lubaha'alo lito li geke geke huloto mele'isi tinaka pa sobo lu emi'ehina. ²⁹Ya ligo moneka lili'na neli'ina bouba melugu li piloto buka tito lu'ehina: Kai kiginaga fi nimito nesi'a negeba hu'ohubo. Nani tina'ni alihi pa saluna'mu yabe. ³⁰Ya lina ana bomofihi ginaga mefi'ehina. Ya higo ana bo le'moto buto naga foyagu molo'ehina yabe. To ai anaga nohuto tina'a pa so su halibe luto hu'ehina yabe. ³¹To ya higo enali moneko lili'na nelina bomagi ana suhi hinamofihi hapa'a be gelete ipakafa he'ahana yabe. To enali asaga kaga bite kaba bo'animofihi lu emi'ahana yabe. ³²Ya lago gihiti bo'aniuba ya'mana koko pana'a kehe iloto ma luto lu emi'ehina: Kai hapaka bati mehina lili'nalo bo yabe. Kai yata'a nanito yibi hanogo tinaka pa mesalata ana'a hilibe luto lu keto'ohuna yabe. ³³Nani yata'a kiginaga fi kimito he'mi keto'ohuna yabe. To hena hu'ehigo kai moneka lili'na neli'ina bo kiginaga fi meemi'ahane? ³⁴Ya luloto ana kaba bo'amofihi gufagu logo bigo asaga tina'a pa solotogo yabe luto naga'i emi'ehina yabe. ³⁵To Yesu kaga'a ma luto lu su ho'ehina: To lenali komopatinigu lenalalutinigihi foipana'ani li pa meso epolo бага meilana kokulumalugu Afo'nifu nohinauba ana huto lenali foipanatini li mehe'mi lepalalina'mu yabe.

Bomouba liha'amofihi le'mo he'milinamo'mu Yesu lu'ehina

Mk 10:1-12

19 ¹Yesu ya'ma kaga lu epi su holoto Galili hepatogati he'mito Yutia kapogu, Yotani nagami'i muya beletoga bu'ehina. ²Ya nobigo babu boana'magi mege'i melelete anaga neheta'ahana. Yesu analo'i enebesise bona'i enele'mo bati hu'ehina yabe.

³To Felosi bona'i mone'amagi ai nohinalo ete fi taga nehite loka he'ahana: Lali keya kaguti henana ni'igo bo moneuba liha'amofihi fa'mene le'mo he'milenogo bati huto ni'ifiye? ⁴Yesu lu epi'ehina: Lenali mono bukugu bu gelete ana ka mekeheli'ahanafiye? Ya'ma kagaguti go'ehina: *Yata'a kanagu Hu'mau bomo hiti a'mo hiti lolo hu molo'ehina yabe.* ⁵*Ya lolo hu'ehinagi bouba ito'afihi afo'afihi noha'atitiguti he'mito liha'a le'moto bigo etali nupa hite minete moneko bona'i minala'ibe.*

6 Etali loe bona'i meminese hite'atiti moneko bona'i nemina'ina yabe. Hu'mau etele'mo moneko hu'ehina alobole lenali bona'magita loko mehi etatalo. 7 Ya ligo Felosi bona'magi loka he'ahana: Koyapa Moseu kaga molo'ehina'auaba bo moneuba liha'amo'mu fayahi goloto li emito le'mo he'milube'mu hu'ehinaya henabe lutobe? 8 Yesu lu epi'ehina: Moseu komopatinigu sibina huse'na kehelito fayahi agobo luto liha'amo le'mo he'miloto ya hilina ni'ibe. Yata'a Hu'mau asaga lolo hu'ehina kana'agu ya he'miloto meni'ibe. 9 Nani lu nolepube. Bo moneuba liha'a fato bolo mebu'ehinamofihi le'mo he'miloto fato a'i lilina huto gumina nofalabe, Yesu ya luto lu'ehina yabe.

10 Ya ligo koko pana'amagi lu emi'ahana: Yana huse'namo ni'igo bomouba liha'a meliloto fa'mene minolenogo bati huto ni'inagihe, lite li'ahana. 11 Yesu lu epi'ehina: Asaga boana'magi enali ya'mana kaga melilana'mu yabe. Hu'mau ai bo luga'amagihi amuya epi'ehina, enali ya'ma bomagigo lilana'mu yabe. 12 Kehelilo. Bo enali komopa'anigu kaga fato fato'i ni'ina'mu lite ana'i menelibe. Bo luga'amagihi ito'anifu a'i melise minose bo enegetelata nehabe. To bo luga'amagihi enugufa laga hago ana'i melise neminabe. To luga'a bomagi kokuluma kapolo enekesa keheli emite minete mono ka fato fato melugu leli'ali hilune lanamagi liha'ani melise minalune lite lu laga hite neminabe. Bo moneuba ya'ma kaga keheli bati hilube lilina ai keheli bati hino.

Yesu yagapana'i lusa gi epolo'ehina

Mk 10:13-16; Lk 18:15-17

13 Ya'mana yupahi enali yagapana'i lagaso meso'a Yesutoga enele'mete e'ahana. Enali Yesu enugufalo yahi liloto nunumu hu epalalibe lite yabe. Ya nehago ana bona'i Yesuhi koko pana'amagi ka epeki'ahana. 14 Yesu lu'ehina: Lenali yagapana'i he'mi epelenogo nanitoga eno. Lenali enele'mo memalalo. Kokuluma kapoya yagapana ya'ma'asimagihina ni'ibe. 15 To Yesu enugufalo yahi liloto lusa gi epoloto he'mi epoloto bu'ehina.

Neheya kola bo fe'noha'a babu lito nina bo

Mk 10:17-31; Lk 18:18-30

16 Mone yupahi bo moneuba Yesutoga nehetiloto loka ho'ehina: Tisao, nani hetofa suhi hena huto huloto'ni minoba minoba hepa'i lilube? 17 Ya ligo Yesu lu emi'ehina: Hena hibe luto hetofanamu noloka nohane? Moneko kene'isi nohina Hu'ma aisigo bati hu'ehibe. To kai minoba hepa'i lilube lutomo keya ka li pili koloto mege'i molobo. 18 To ana bouba Yesuhi loka ho'ehina: Hena keya kabe? Ya ligo Yesu lu emi'ehina: Keya ka ma luto ni'ibe: *Kai bona'i ho mefilibo. Kai bo alobole etele'mo loko mehubo. Kai gumina mefolobo. Kai bo mone'mofihi faga faga lu meemibo.* 19 Kai

itokafinogo afokafinogo agoya hu etimibo. To kaika kele'mo bati hilana suhi luto kalalukagihi enele'mo bati hubo. ²⁰Ya ligo neheya kola bouba lu'ehina: Ya'ma asaga keya ka nani liyafa huto mege'i amolo'ohube. Ana'ina mone'a henana hiti hilube? ²¹Ya ligo Yesu ana neheya kola bomofihi ma luto lu emi'ehina: Kai bati huto minalube lutomo asaga fe'nohaka buto bona'i noepito efahi lilotoka guna ito musufalo bona'i epibo. Ya hitogo hetofanaka kokulumalo minalibe. To kai ya huloto nani'i oto nemege'i molobo. ²²Ya'mana neheya bouba Yesu lina kaga keheliloto ipagu gabu gigo ginaga fina bo kaga meluse bu'ehina. Hena'mugope ai fe'noha'a babu lu'ehina bo nohuto ai ana fe'noha'a fato bona'i meepilube luto'a ekesa kehelito bu'ehina yabe.

²³To Yesu koko pana'a ma luto lu epi'ehina: Nani ma'naka luto lu nolepube. Fe'noha'a hiti bouba ai kokuluma kapo'alo tilinaya aitoga sipi keta hu etalina'mu yabe. ²⁴Nani mone'a hiti kaga lu lepilube lu'ehina. Kameli yagauba kata hetise neka'mofihi hokolo kapo'agu nesi'asi keta besinogo tilinaya to fe'noha'a babu luto nina bouba Hu'mamofihi kapo'alo bilube'mu hilinaya sipi keta besilina'mu yabe luto Yesu lu epi'ehina yabe. ²⁵Enali koko pana'a ya'mana kaga'a kehelilete topa helete ma lite li'ahana: Ya latago minoba minoba hepa'i kuyu'afu lilinabe? lite Yesuhi loka he'ahana. ²⁶Ya lago Yesu enubugu enogo fiya iloto ma luto lu epi'ehina: Ma melugu bona'magi ya'manana mehilana'mu yabe. Hu'mau aisigo asaga'na lolo hilina'mu yabe.

²⁷Yesu ya ligo Pitau kaga'alo nona'a lu emi'ehina: Kai bu gobo. Lali asaga fe'nohati he'miloto kai'i kemege'i moloto noone. Ya nohuta lali henana liluta ni'ibe? ²⁸To Yesu ma luto lu epi'ehina: Nani ma'naka luto lu nolepube. Alihi asaga'namagi yuhufanago lolo hilina yupahi Kokulumaguti limi'ehina Bo ai fana mehenagu minoto kibina bomofihi kefa hisalo minalina'mu yabe. To nani'i nemege'i melete mine'ahana bomagita ya'mana yupahi 12 kefa hisalo minalana'mu yabe. To lenali ya hilete Isilaeli naga'i 12 magihi kaba hi epalalabe. ²⁹To enali bona'i luga'amagi nani kumu lite enekesa yigilete noha'anifi enogona'anifi enetali'anigifi ito'anigi afo'anigihifi yagapana'anifi to foya'anifi he'milete nanitoga alanamagi enali anana'anilo babu lite lilana'mu yabe. To enali bati huto minoba minoba hepa'i lilana'mu yabe. ³⁰Ya hu'ehina babu bo luga'a yatai yata'a kohe kohe hite nebanamagi aliha'a yupahi alihi alabe. To babu bo luga'a enali alihi nebanamagi alihi yupahi enali kohe tete bilana'mu yabe. Yesu ya'ma luto lu'ehina.

Bai naga foyagu lili'na bo

20 ¹Kokulumamofihi kapo'aya bo mone'mofihi sipi foya'a ni'ina suhi luto ni'ibe. Ya hu'ehigo ai mone etehi folugu'i heleko limito buto bai nagami lolo hilina nose'na foya'agu kifi'na li etalana pana'i

noenele'mabe. ²Ai enali luga'a lili'nalo pana'i hiti kaga lilete mone kina mone kina yatai lilana lili'nalo lilana'mu yabe lina kaga komopa'ani monetoga nemalabe. Ya luto lu epoloto ai bai naga'i nose'na foya'agu enoho lifigo bite lili'na lilune'mu nebabe. ³To yege ti olopa nohago bo luga'a hepa'i folagaha'agu fa'mene fuli nehago ai bu enogo'ehina. ⁴Ya huloto ai lu epi'ehina: Lenali bite foya'nigu lili'na lilenogo nani mina eto huto lepilube. ⁵Ya ligo enali bi'ahana. To fuligaha belo kanalo hiti to utehi yege liyofo nohina kanalo hiti ana suhi hu'ehina yabe. ⁶To yege limi falalube'mu nohigo tauniga nobinati bo luga'a ho tilete nehago bu enogo'ehina. Ya huloto ai ma luto lu epi'ehina: Hena hu'ehigo lenali yatai malo fa'mene ho tilete nehabe? Kana su halina'mu yabe. ⁷Enali ka'alo nona'a lu emi'ahana: Bo moneuba lili'na melimigo fa'mene nohune li'ahana. Ya lago ai lu epi'ehina: Lenali hiti ka'muya abite bai naga'i foya'nigu lili'na lilo.

⁸To sinihi gise'na nohigo ana foya afo'afu kaba bo'a kehe iloto ma luto lu emi'ehina: Kai lili'na nelina bona'i kehe ito mina epibo. Alihi e'ahana lili'nalo panatogati hapi fito mina epimo buto yata'a kohe tete ete lili'na li'ahanamagihi alihi epitogo su heno. ⁹To enali yege limi falalube'mu nohigo ete lili'na li'ahana bona'i kohe tete ete mone kina mone kina li'ahana. ¹⁰To kohe tete ete yata'a lili'na li'ahanamagi nehetele lali efahi enohoto babu lito li nupa lite enekesa yigi'ahana. Ya hana moneko suhi hite mone kina mone kina li'ahana. ¹¹Enali ana mina'ani lilete enugufagu logo bigo gulu gulu foya afo'afu ma lite ka emeki'ahana. ¹²Ya'ma alihi e'ahana bona'i lili'na hupamone kanasi li'ahana mina'ani lali limi'ahata moneko legege suhi luto epi'ahane. Ya hu'ehina lali keta lili'na sipi yege lanalo logobi hiti hiti huto lagabu lili'na li'ohune. ¹³Enali ya lite lago enali kagalo nona'a foya afo'afu ma luto enali folagaha'anigu mone nohina bomofihhi lu emi'ehina: Nalaluo, nani kele'mo negi noto faga melu keto'ohube. Kaga lutofi mone kinalo lili'na lilabe lugo komopati monetoga yata'a melelete alihi lili'na li'ahabe. ¹⁴Kai efahaka lito hepakaga bubo. Efahi kimi'ohuna suhi luto alihi ete lili'na li'ahana bona'i epilube'mu nohube. ¹⁵To hena hu'ehibe? Ya'mana nani'ni efaha'niloti ana'ina mone li huto hilube lilunaba bati mehilina ni'ifi? Nani hetofa suhi nohu ketonamo ya'mana hapa'nimu luto nani'i kipakafa nonahafihe? Ya luto foyamofihhi afo'afu lu'ehina fono ka yabe. ¹⁶Ya luloto Yesu ma luto molo emito lu'ehina: Ya'mana suhi luto bona'i enali alihi alanamagi kohe talana'mu yabe, to bona'i enali kohe tete alanamagi enali alihi bilana'mu yabe.

Yesu fililinamofihhi kaga'a loegi monegi yupahi lu'ehina

Mk 10:32-34; Lk 18:31-34

¹⁷Yesu Yelusale hepatoga bilube'mu nohuto 12 aposolo naga'a hiti enele'moto bu'ehina. Enali kapo melete nebite Yesu sumi ka ma luto lu

epi'ehina: ¹⁸Lenali kehelilo. Lali Yelusale hepato yatai notune. To nani Kokulumaguti limi'ohuna Bo, enali nele'mete bite sipi mono bona'i to keya kaga lu enelepise bona'i enali enayanuga bilana'mu yabe. Enali ka foya li netete to ho fililune lite kaga lu hetofa hilana'mu yabe. ¹⁹Ya hilete enali Lomu gamanilo nele'mete binogo enali kiya yokolo ka li netete to naga osatu nibi yigilete to malipu yafalo noho fililana'mu yabe. Ya hinogo loegi monegi yegegu aku'i ho tiluna'mu yabe.

Yemesiugo Yoniugo etali kaba bole minalu'ibe'mu li'aha'ina

Mk 10:35-45

²⁰Ya'mana yupahi Yemesinogo Yoninogo ito'atitifu, Sebetihi liha'auga ana pana'ale Yesutoga etele'moto oto melugu lipito minoloto mone'nalo loka halube'mu hu'ehina. ²¹Ya nohigo Yesu ma luto loka ho'ehina: Henanaka'mu nokebesibe? Ya ligo ai Yesuhi ma luto lu emi'ehina: Ma pana'ni loemo neha'ina kai alihi gihiti bo lolo nohitogomo moneba kayahi lamaga'aga minenogo moneuba kayahi sog'a'aga minenogo hila'ibe lutoka kaga molobo lu'ehina. ²²Ya ligo Yesu ana a'i lu emi'ehina: Noloka nohata kaga hapa'a hena kaga nolufi luto keheli bati mehuse nolane. Nanitoga huto hilina ekesa nagami'i naluna legitana ni'inagi letaliba ana konugutiba nala'ina ni'ifihe? Ya ligo etali li'aha'ina: Le'ali nalu'ina'mu yabe. ²³Ya la'igo Yesu lu etimi'ehina: Ma'naka lite letali nani ya'ma nagami konuguti nala'ina'mu yabe. Ya hila'ina ninaya moneuba nayahi lamaga'aga minenogo moneuba nayahi sog'a'aga minenogo hila'inamofihi hapa'aya nani nasana'ni meni'ibe. Ya'mana kefa hisalo luga'a bona'magihina yabe luto, nani afo'nifu li loloba hu epolo'ehina yabe.

²⁴Enali nayahi luga luga su hago aposolo naga'magi ya'mana kaga kehelilete ana kogunale ka etemek'i'ahana yabe. ²⁵Ya nehago Yesu kehe i nupa huloto ma luto lu epi'ehina: Lenali kehel'i'ahabe. Kibina bo mone'mofihi naga'a mone naga'magi enele'mo laba hilete enali kaba nehi epalabe. To enali sipi bomagi boana'magi labaga liyafa hite lemege'i malalabe tite amuya kaga lilata nehabe. ²⁶Ya'ma suhi lenali folagahatinigu memineneno. Mone bo lenali folagahatiniguti sipi bo minalube lutomo ai lenali kele kele botini minoto lenehe'meno. ²⁷Mone bouba lenali'i kaba hu lepalalube lilinauba ai lenali koko kako panatini mineno. ²⁸Ya'ma Kokulumaguti limi'ehina Bo ai ana suhi huto nohibe. Bona'magi aito lili'na he'mete li etalabe luto meo'ehina yabe. Ai boana'magitoga lili'na li epoloto enehe'malube luto o'ehina. To ai boana'magi kumu luto gufa'a he'miloto asaga boana'i foipana'ani pa so epalalube luto o'ehina yabe.

Etubu pisi lu'ehina bo loemo Yesu etele'mo bati hu'ehina

Mk 10:46-52; Lk 18:35-43

²⁹Enali Yeliko hepa'i he'mite nebago babu boana'i enemege'i lifite bi'ahana. ³⁰Etubu pisi lina bo loemo kapo beleha'alo neha'inagati Yesu

noabe lana'a kehelilete sipi kehe ilete ma lite li'aha'ina: Tebitihi Pana'ase. Kiginaga fi le'emibo. ³¹Ya nela'igo babu boana'magi bohoya ka lite etubunepa ilete he'miliyo li'ahana. Enali ya lana etali mekehelise koyo koyo ite kehe napa ite li'aha'ina: Tebitihi Pana'ase. Kiginaga fi le'emibo. ³²Ya la'igo Yesu ho tiloto kehe i etimiloto ma luto etoloka ho'ehina: Nani hena hu letatalugo nela'ibe? ³³Ya ligo etali lu emi'aha'ina: Sipi Bo, kai le'ubuti'a li gili hu le'etalane luto nolulibe. ³⁴Ya la'igo Yesu keke'i sipi lu etotoloto yaha'a ana bomale'i etubulo meko nohigo ana'asilo mele'isi etubu'atiti i gili higo asaga'na bu gelete Yesuhi mege'i melete bi'aha'ina yabe.

Yesu sipi bo lolo huto Yelusale hepalugu ti'ehina

Mk 11:1-11; Lk 19:28-40; Yn 12:12-19

21 ¹Enali Yelusale'i o leba telete Betefasi hepa kegi'a Oliba kosagu neheti'ahana. Ya hilete Yesu aposolo pana'a loemo ma luto lu etototo etoho lifi'ehina. ²Letali hepa'i monelugu nehetele ana hepalugu toki yaga naga i'ehinogo nala'a hiti nehinogo bu gala'ina'mu yabe. Letali ana yaga naga'a gulu fete etele'mete nanitoga aliyo. ³To bo moneuba kaga mone nolinogomo ma lite lu emiliyo: Sipi Bouba lili'na lilube'mu yabe li'inogo ai hololu luto letiminogo ana yagale yete aliyo.

⁴Ya'manana huto hilinaya koyapa'i kaga lu huto huto bouba kaga mone ma luto lu'ehinalo pa salina'mu yabe:

⁵Lenali Yelusale hepatoga neminana bona'i ma lite lu epilo:

Bu galo, lenalitoga kibina botini noabe.

Ai koyone bo,

ai toki yaga gupisalo minoto noabe.

Ai toki yaga ikele'amofihi gupisalo minoto noabe.

⁶To loe aposolo bomale'i kohe toga bite Yesu lu etimi'ehina suhi li'aha'ina yabe. ⁷Etali toki yaga lalamehi etele'mete a'igo enali kefe'ani toba hete ana toki yaga gupisalo mele'ahane. Ya hago Yesu ana toki yaga gupisalo tito minoto bu'ehina. ⁸Ya nehago babu boana'magi gukete'ani toba hete kapogu molo helele tete nebago to luga'a bona'magi yafa yaha'a yegete kapogu melete bi'ahana. ⁹To enali kohe toga bana bona'i hiti to alihi bana bona'i hiti ma lite kehe napa i'ahana: Tebitihi Pana'a yege filo. Sipi Bomofihi gi'alo ma noana bomofihi Hu'mau lusana emilibe. Hu'mamofihi lenegelo bi emilo. Ya lite babu boana'magi kehe napa ite li'ahana yabe.

¹⁰Yesu Yelusale hepalugu notigo ana hepalugu boana'i bu gelete henana huto nohifi lite ho ti бага ite ete li yege yege hilete li'ahana: Ya'ma bo kuyu'afube li'ahana? ¹¹To babu boana'i Yesu hiti kapo melete

banamagi ma lite li'ahana: Ai kaga lu yege hose bomo Yesu Nasalete hepato Galili kegi'a bomo nohibe.

Yesu mono nonuga ti'ehina

Mk 11:15-19; Lk 19:45-48; Yn 2:13-22

¹²Yesu mono nonuga tiloto babu bona'magi bisinisi melete ana'ina'ani salimi hila to mina fila hite nehana ya'ma bona'i hesi'ehina. To hitalo efahi senisi hila to hitalo minete nama salimi hila nehanana libe behe hube huto li fulugu felege nobito enele'mo tili tele hu'ehina. ¹³To ai kaga ma luto lu epi'ehina: Mono bukugu Hu'mau ma luto kaga koyo'ehina: *Nani noha'ni numuna noha'ni yabe lite gi'a nehabe.* Ya hu'ehina lenali ana nohi guminalo bomagihni suguna hepa'ani li lolo nehabe.

¹⁴Ya luloto Yesu mono nonuga nohigo enubu pisi lu'ehina bona'i luga'a hiti to enalapusa sibina hu'ehina bona'i luga'a hiti enali Yesutoga ago enele'mo bati hu'ehina yabe. ¹⁵Ya huto Yesu hetofana li huto nohina'mu lite yagapana'i mono nonugu nehanamagi sipi kehe ilete: Tebitihi Pana'a yege filo li'ahana, ya nelago mono bo hiti to keya kamofihni tisa bo hiti enali bu gelete enitaluga logo bi'ehina yabe. ¹⁶Ya higo enali bu gelete Yesuhi ma lite lu emi'ahana: Ma nelana kagaba keheli'ahapihe? Ya lago Yesu lu epi'ehina: Nani keheli'ohube. Mono ka mone ma luto nina lenali leka mese'ahana ni'ifihe? *Kai lagaso yagapana'i hiti to yagapana ikiliha'a hiti enali Hu'mamofitoga enegelo bi emilabe.* ¹⁷Ya luto lu epiloto ai enalitogati he'miloto Betani hepatoaga buto ana folugu'i mino'ehina yabe.

Yesu nemuya yafa ka emekigo hosopa i'ehina

Mk 11:12-14, 20-24

¹⁸Yesu Betani hepatoagati etehi i behe huto Yelusale hepato noago kapogu kau'na ho'ehina. ¹⁹Ya higo ai nemuya yafa kapo beleha'alo nina bu goloto buto legeya'a ni'ifi luto bu gana haya'ago ni'igo ana yafamofihni ma luto lu eto'ehina: Kai alihi yupahi legeyaka huto mehilibi. Ya ligo ana'asilo mele'isi ana nemuya yafa haya'a hiti to lufusa'a hiti logo bi su ho'ehina yabe. ²⁰Ya higo Yesuhi koko pana'amagi topa helete ma lite li'ahana: Hena suhi luto nemuya yafa mele'isi logo nobibe? ²¹Ya lago Yesu ka'anilo nona'a ma luto lu epi'ehina: Lenali lenekesu meheni. Lenali komopatini nanitoga melelete lenali loe lae komopatini meminalina nani ma nemuya yafamofihni hu'ohuna suhi hilana'mu yabe. To lenali ya'ma sunogo mehilana'mu yabe. Ma kosamofihni ma lite lu emilana'mu yabe. Ma kosa ho tito hege nagamilugu limibo lilana lenabaga liyafa huto limilina'mu yabe. ²²Lenali komopatini Hu'mamofitoga melelete ana'ina mone kumu'i nunumu hilana ana nunumutinilo nona'a lilana'mu yabe, luto Yesu lu epi'ehina yabe.

Kiya'afitogati kibina bo li'ahane lite Yesuhi loka he'ahana

Mk 11:27-33; Lk 20:1-8

²³ Yesu mono nonuga aku'i oto tito minoto boana'i kaga enelepito mino'ehina. Ya nohigo enali mono bo hiti to Isilaeli hepato enikibina bo hiti enali Yesutoga elete ma lite loka he'ahana: Hiya'agati lito o'ahata suhi li huto nohane? Ya'mana suhi kuyu'afu kelepi'ehina suhi nohane? ²⁴ Ya lite loka hago Yesu ka'anilo nona'a lu epi'ehina: Nani ana huto kaga mone'ya lenoloka halube. To lenali kaga lenoloka haluna kaga lu niminogomo nani ana huto kagatinilo nona'a hiya'agati lito o'ohuna suhi li huto nohufi lu lepilube. ²⁵ Ya yagi Yoni bona'i nagami'i folo epolo'ehina, ya'mana nagami'i folo epolose'na hiya'agati o'ehibe? Hu'mamofitogati o'ehifi to ma melugu bomagitogati o'ehibe? Ya luto enoloka hago enali ya'mana kaga kehelilete musi musi ka lite ma lite li'ahana: Hu'mamofitogati'na yabe liluta ai ma luto lilina'mu yabe. Hena hu'ehigo lenali Yonihi komopatinigu li menemalabe lilina'mu yabe. ²⁶ To ma melugu bona'magihina yabe liluta ya asaga boana kumu'i lelesa nolibe. Hena'mugope enali asaga'i Yoni kumu kaga lu yege nohana bo nohibe lite komopa'ani neeminamo yabe li'ahana. ²⁷ Ya lite lilete enali Yesuhi ma lite lu emi'ahana: Lali mekeheli'ohune. Ya lago Yesu lu epi'ehina: Hiya'agati lito o'ohuna suhi nani li huto nohufi nani ana huto hapa'a lu melepilube.

Kogunale loemale'i bame ka'atiti

²⁸ Ya hu'ehina ma kaga lenali hena hibe lite lenekesa nekehelibe? Bo mone'mofihi pana'a loemo mine'aha'ina yabe. Mone yupahi pana'a yege'a nohinaga buloto ma luto kaga lu emi'ehina: Pana'ni, kai yatai foyagu buto lili'na libo. ²⁹ To pana'auga бага li gofa hoto lu'ehina: Nani ya lili'na meliluna'mu yabe. Ya luto luloto alihi minoto komopa'a i gelehe huloto foyaga bu'ehina yabe. ³⁰ Afo'atitifu mone pana'amofihi ana luto lu emi'ehina yabe. Ya higo mone pana'auga afo'atitifihili lu emi'ehina: Afo'niga nani foyagu buto lili'na liluna'mu yabe. Ya luto faga o'yo luloto ana foya'anigu lili'na buto meli'ehina yabe. ³¹ Yalo lenali lu nimilo luto Yesu lu'ehina: Ya'ma loe pana'male'i kuyu'afu afo'atitifu lu etimina kagalo mege'i molo'ehibe? Ya ligo enali Yesuhi lu emi'ahana: Yege pana'auga yabe lite, ya lago Yesu ma luto lu epi'ehina: Nani lusiga luto lu nolepube, takisi efahi nelina bo hiti to mokolo ana'i hiti enali kohe tete Hu'mamofihi kapo'agu nebabe. ³² Hena'mube? Yoniu lenalitoga oloto ai mino bati huto minosemofihi hapa hapa'a lenelep'i'ehina lenali ai kaga'a keheli meemi'ahabe. Ya hago enali takisi efahi lise bo hiti to mokolo ana'i hiti enali Yonihi kaga'a aliyafa hi'ahabe. Lenali ya'manana huto hina abu ge'ahanaya lenali alihi komopatini i gelehe hite li latahatinigu memele'ahabe, luto Yesu lu epi'ehina yabe.

Foipa bomagi bai naga'i foya kaba hi'ahanamofihhi bame ka'a

Mk 12:1-12; Lk 20:9-19

³³Ma bame ka mone'ya aku'i kehelilo, luto Yesu lu epi'ehina. Bo mone'mofihhi sipi foya ni'igo ana foya'agu bai naga'i hekololoto gegisa hu bego hu'ehina. Ya huloto yatama nohi ana foyagu giloto bai nagami'a letise'na mone lolo hu'ehina yabe. Yalo ai ana foya bisinisi malalube'mu hina bomofihhi yanuga bi'ehina. Ya huto emiloto ai ana foya afo'afu bonohi foto kapoga bu'ehina yabe. ³⁴Alihi nose'na'a li nupa huse kana'a o leba tolago ai lili'nalo pana'a enoho lifigo bai naga'i foyagu lili'na nelina bo nehanalo bi'ahana. Ai nose'na luga'a nimilabe luto enoho lifigo bi'ahana yabe. ³⁵Ya higo enali ana foyagu lili'na nelina bomagi koko pana'a enele'mete bilete mone'amofihhi osahi nehete mone'amofihhi ho fala nekite to mone'amofihhi efa kosatu he'mibe molobe hite i yopo hi'ahana yabe. ³⁶Ya hago foya afo'afu koko pana'a mone'a hiti aku'i enoho lifi'ehina yabe. Ai babu luto enoho lifi'ehina yabe. Ya higo enali foyagu lili'na nelina bomagi ana suhi hite enegene mane ilete yata'a hi'ahana suhi hi epele'ahana yabe. ³⁷To alihi ai'a pana'a ho lifigo enalitoga limi'ehina. Ya nohigo afo'afu ma luto lu'ehina: Enali pana'nimofihhi kaga'a keheli emilana'mu yabe. ³⁸Ya higo enali foyagu lili'na nelina bomagi ana pana'a bu gelete ma lite musi musi ka li'ahana: Ya'ma bouba ai afo'afihhi fe'noha'a li su halina'mu yabe. Lenali ho tilo, lali mana pana'a ho fililototi ya'mana foya'a laliti lilune. ³⁹Ya lilete enali ana foyaguti le'mo fegutoga melelete ho fili'ahabe.

⁴⁰Yalo lenali henabe lite nekehelibe luto Yesu enoloka ho'ehina: Alihi foya afo'afu oloto foyagu lili'na nelina naga'i hena hu epalalina ni'ibe? ⁴¹Ya luto Yesu enoloka hago enali ma lite lu emi'ahana: Ai oto ya'ma foipa bona'i enele'mo asaga'i sibina hu epoloto enahalina'mu yabe. Ya huloto ai ana foya'a lito fato bo epinogo kaba nehite kana nose'na'a huto nohinogo enali lite bite foya afo'afihhi ai'a luga'a emilana'mu yabe. ⁴²Ya lite lago Yesu ma luto lu epi'ehina: Mono bukugu kaga mone ma luto nina lenali mekeheli'ahafihe?

Lili'nalo bomagi ya'ma efahi
 bati mehina efahi yabe lite li he'mi'ahana.
 Yatai ya'mana efahuba nohi nekisa'a
 li tokolo hu'ehibe.
 Sipi Bouba ai ya'mana suhi li huto higo
 lali bu gota laga gofa hibe.

⁴³Ya'mu luto nani lu nolepupe. Hu'mau ai kapo'a lenalitogati lenebe silito fato boana'magi enali bati lili'na ma melugu lite nehilanamagihi epilina'mu yabe. ⁴⁴To mone bouba ai ana efapo gupisalo heleko malalina ai ibe laga hube huto gufa'a nesi nesi hilina'mu yabe. To ya'mana efahuba

bo mone'mofihi limo ito i lilika ilinaya ana bo gufa'a mumusopa lolo hilina'mu yabe.

⁴⁵Enali mono bo hiti to Felosi bo hiti Yesu lu'ehina bame ka kehelilete lalitoga lu moloto nolibe lite akeheli'ahana. ⁴⁶Ya hilete enali yato lilune'mu nehana. To Yesu kumu lu yege hose bo nohifi boana'magi lite nehite Felosi bomagi enali kumu koli hi'ahana yabe.

Ana'i kata nehite sipi nose'na nose'mofihi bame ka'a

Lk 14:15-24

22 ¹Yesu bame ka mone hiti ma luto lu epi'ehina: ²Kokulumamofihi kapo'aya gihiti bo mone'mofihi hapa'a legita huto ni'ibe. Gihiti bomofihi pana'auga liha'a li'ehigo afo'afu sipi nose'na laita hu'ehina yabe. ³Ya huloto koko pana'a enoho lifigo enali bite bona'i nose'na nalabe lite kehe i'ahana, ya hago ana bona'magi mebilune li'ahana yabe. ⁴To ai koko pana'a aku'i mone'a enoho lifito ma luto lu epi'ehina: Nani bona'i kehe i'ohuna bonatoga lenali bite ma lite lu epilo: Hohe, hohe. Lenali kehelilo. Nani nose'na ali loloba hu'ohube. Nani bulumaka yaga'ni bo'a hiti to yagakafa giliba'a hiti hoto linohi bi'ohube. To asaga'naya ali loloba hugo nose molose huto ni'ibe. Lenali ete ana kata nohuna nose'na nalo. ⁵Ya luto lu epigo enali koko pana'amagi ana kaga lite bite kehe ina ana bona'magi ana kaga kosele'ani enahago mekehelise bu folola e felela hi'ahana yabe. Moneuba foya'aga nobigo moneuba bisinisi lili'na'alo nobigo hi'ahana yabe. ⁶Ya nehago luga'a bona'magi ana gihiti bomofihi koko pana'a enayato lilete naga osatu luga'a nebiyigite to luga enoho fili'ahana yabe. ⁷Ya hago gihiti bouba italuga logo bigo gimbo bo'a enoho lifigo bite koko pana'a enehi'ahana bona'i noha'a gobe posa gibe hite enoho su he'ahana. Ya hilete hepa'ani logo goyoboto su he'ahana yabe. ⁸Ya huloto gihiti bouba koko pana'a kehe iloto ma luto lu epi'ehina: Ana kata huse nose'naya laita huto li loloba hu'ohuta ma ninaya to bona'i kehe uta bona'magi hapa'ani bati mehigo meabe. ⁹Ya hu'ehinagi lenali kapo loe lae hu'ehinalo bite nehite bona'i bila ela hilana enali'i kehe i nupa hite enele'mete enogo ana kata nose'na nalabe. ¹⁰Ya luto lu epigo ana koko pana'amagi kapolo kapolo bite mine бага i'ehite bona'i mana'afi to sibina hana'afi kapolo huto hana kehe i nupa nupa hite enele'mete ago enali ana kata nehana nohi li bai tete mine'ahana.

¹¹Enali boana'i tite mine su helago gihiti bouba bu enagalube'mu nonuga ti'ehina. Ya huloto ai bo mone gukete mana'a li mehekolo'ehina bo nohina bu go'ehina. ¹²To gihiti bouba ya'mana bo ma luto lu emi'ehina: Nalaluo, kai hena hibe luto kimi'ohuna gukete mana'a mehepise ma nonuga ti'ahane? Ya luto loka hago ana bouba ai kaga meluse fa'mene mino'ehina yabe. ¹³Ya higo gihiti bouba koko pana'a ma luto lu epi'ehina: Lenali ma bo gilo, yato naga ite fegutoga he'mi

melenogo ai metepugu minalibe. Ai ana metepugu nohuto yibi nama huloto бага yogo'a henibe yugupobe hilibe. ¹⁴Yesu kaga'a lu pa so su hoto lu'ehina: Hu'mau bona'i babu lito kehe ilata nohibe. Ya huloto ai ana bonaluguti mone'isi mone'isi enele'malina'mu yabe, luto Yesu lu epi'ehina yabe.

Takisi efahi he'misemofihi hapa'amu Yesuhi loka he'ahana

Mk 12:13-17; Lk 20:20-26

¹⁵Enali Felosi bona'magi Yesuhi fi taga huto kaga loka mika halune lite enali lu keheli'ahana. ¹⁶To enali pana'alobo'ani hiti to Helotihhi pana'alobo hiti enoho lifigo Yesutoga bite ma lite li'ahana: Tisao, kai ma'nakago lu epilata nohanogo lali akeheli'ohune. To kai ma'nakago luto Hu'mamofihi hapa'amu babu boana'i kaga lu enelepilata nohane. To kai moneko bomofi kumuko luto kekesa yigiba yigiba mehulata nohane. Kai asaga bona'i moneko kagago lu epilata nohata bo nohane. ¹⁷Ya hu'ehinagi kai ma kaga lu limibo. Kai henabe luto kekesa noyigine? Lomu gamani bomofito takisi he'milata nohutaba lali keya kagati li gofa nohopi to bati huto nohe'mune? Ya, kagatilo nona'a lu limibo. ¹⁸Yesu mi'i malalune'mu nehana kaga'ani akeheliloto ma luto lu epi'ehina: Lenali fagalo bona'i. Lenali henabe lite nimi'i nemalabe? ¹⁹Takisi efahi legeya'a mone'a li nelepilo. Ya ligo enali efahi legeya'a mone li emi'ahana. ²⁰Ya hago ai li enelepiloto enoloka ho'ehina: Ma okaba'a hiti gi'a hiti kiyi'afihina ni'ibe? ²¹Sipi Lomu kaba bomofihina'a ni'ibe, li'ahana. Ya nelago Yesu ma luto lu epi'ehina: Ya hinogomo Lomu kaba bomofihi nasana'a emilo, to Hu'mamofihi nana'aya Hu'mamofitogago emilo, luto Yesu lu epi'ehina yabe. ²²Yesu ya luto kaga'anilo nona'a lu epina kaga hapa'a kehelilete keka keka lataha'anitu hilete abifa hi'ahana yabe.

Bo filii'ehinagati aku'i ho tisemofihi hapa'amu Yesuhi loka he'ahana

Mk 12:18-27; Lk 20:27-40

²³Ana yupahisigo Satusi bona'i Yesutoga e'ahana. Enali ya'mana bomagi filise bona'i aku'i ho metilabe lite lilata nehana yabe. Ya nehana bomagi Yesutoga elete ma lite loka he'ahana: ²⁴Tisao, Moseu ma luto lu'ehibe. Bo moneuba yagapana'i meketose nohuto fililenogo ana bomofihi gonauba go'afihhi a'i liloto yagapana'i filii'ehina bomofihi nona'a ketalina'mu yabe. ²⁵To koyapa'i sebeni koguna mine'ahana, enogo'anifu liha'a liloto yagapana'i meketose filii'ehina yabe. ²⁶Ya higo gona'auga ana a'i li'ehina ana huto yagapana'i meketose filii'ehina. Ya higo ana megesalo gona'auga ana a'i liloto ana suhi huto yagapana'i meketose filii'ehina. Ya hite asaga'i ana kogunamagi ana a'i lina yagapana'i meketese fili su he'ahana yabe. ²⁷Ya hilago alihi ana ana'i filii'ehina yabe. ²⁸Asaga bona'i filii'ahanagati aku'i ho tilana yupahi ana koguna sebeni'a ho tilana ai ana

a'iba kiyi'afihi liha'a lolo hilina ni'ibe? Asaga'i sebeni'a kogunamagi ana a'i liha'ani le'mo lolo hi'ahana yabe. Enali ya lite Yesuhi loka he'ahana yabe.

²⁹Ya lago Yesu ka'anilo nona'a lu epi'ehina: Lenali mono ka hiti to Hu'mamofihi amuya'a hiti keheli bati mehi'ahabe. Lenali lenekesa yigise'natini asaga'i sibina hu'ehibe. ³⁰Bona'i fili'ahanagati ho tilana yupahi bo hiti a'i hiti li bo alobo mehilana kokulumalugu agelomagi suhi hite minalana'mu yabe. ³¹Ya hu'ehina ya'ma filise bona'i aku'i ho tise kagamofihi lenoloka halube. Mono bukugu Hu'mau ma luto lu lepi'ehina kaga mekeheli'ahafihe? Ai ma luto lu'ehibe: ³²*Nani Abalahahi afo'afita nohube, to nani Isakahi afo'afita nohube, to nani Yakopuhi afo'afita nohube*, luto Hu'ma lu'ehina yabe. Hu'ma ai fili'ahana bona'magi afo'anifu menohunagi enali minoba minoba bona'magihi afo'anifita nohibe, luto Yesu lu epi'ehina yabe. ³³To asaga boana'magi Yesu enelepimofina'mu lite enegelo bi'ahana yabe.

Kohe toto yata'a keya ka

Mk 12:28-34; Lk 10:25-28

³⁴Yesu lina kagauba Satusi bomagihi enabagalo ifi tago enali kaga meluse mine'ahana. Ya hite Yesuhi kaga'auga enoho fi tago kaga melise nehago Felosi bomagi be gelete enali Yesutoga ete li nupa hi'ahana. ³⁵Ya hago keya ka tisa bo moneuba Yesuhi loka mika hoto mi'i malalube'mu huloto ma luto loka ho'ehina: ³⁶Tisao, hiya keya kauba asaga keya ka enebe ligitto sipi'a ni'ibe? ³⁷Ya luto Yesuhi loka hago Yesu ma luto lu epi'ehina: *Sipi bo ai Hu'makafu yabe. Kai asaga kugufaka hiti kemehaka hiti kekesa yigise'naka hiti to asaga komopaka Hu'mamofihi aisigo emi su hobo*. ³⁸Ya'ma keya kaya ai kohe toto sipi keya ka ni'ibe. ³⁹To ana megesalo keya kaya yata'a keya kamofihi suhi huto mone'ago huto nesi'a ni'ibe. Ai ma luto ni'ibe: *Kaika kugufaka le'mo bati huto kaba nohata suhi luto kigi bonaka koyone hu epito enele'mo bati hu epolobo*. ⁴⁰Ya'ma keya ka loemale'i hapa'a lufusa'a lolo hite emalo ke'aha'igo luga'a Moseu lu'ehina keya ka hiti to kaga lu yege hese bomagihi enelepimofa'na huse'na'ani ifo etali etugupisalo neminabe, luto Yesu lu epi'ehina yabe.

Mesia kumu Yesu Felosi bona'i enoloka ho'ehina

Mk 12:35-37; Lk 20:41-44

⁴¹Enali Felosi bona'i li nupa hite analo nehago Yesu ma luto enoloka ho'ehina: ⁴²Lenali Mesia kumu hena hibe lite nekehelibe? Ai kiyi'afihi pana'a nohibe? ⁴³Ya luto enoloka hago enali ma lite lu emi'ahana: Tebitihi pana'amo nohibe. Ya lago Yesu lu epi'ehina: Ya lanagi to hena higo Sikalafu'uba Tebitihi le'mo kugu higo ho tito Sipi Bo'nibe lu'ehinabe? Yalo Tebitiu ma lu'ehina:

44 Sipi Bo Hu'mau ma luto nani Sipi Bo'nimofih
 lu emi'ehina:
 Kai nayahi lamaga'nilo minolotoka
 to nani fatehaka enoho su holenogo,
 melugu minelenogo,
 kai kigigusatu ifi to epalalane.

45 Tebitiu ai'a Sipi Bo'ni yabe luto gi molo'ehinamo to aku'i hena hibe
 luto Mesiau Tebitihi tata'afu lolo hilibe? Ya luto Yesu enoloka ho'ehina.

46 Ya luto enoloka hago bo moneuba ho tito Yesuhi loka mehalina'a
 hu'ehina yabe. Ya'mana yupahi Yesuhi kaga'alo koli hilete alihi yupaha'a
 loka mehe'ahana yabe.

**Felosi bomagi hiti to kaga enelepise bomagi hiti hapa'ani Yesu lu
 kuguma hu epolo'ehina**

Mk 12:38-39; Lk 11:43, 46; 20:45-46

23 ¹Alihi Yesu babu boana'i li gehesa hite minana hiti to ai'a koko
 pana'a hiti kaga ma luto beto hu epi'ehina: ²Kaga keheli bati
 huse bo hiti to Felosi bo hiti enali Mosehi keya kamofih hapa'a lu hokolo
 hise minelata nehabe. ³Ya hu'ehinagi enali kaga lu lepilite ya hilo ya
 hilo nelinogomo lenali enabaga liyafa hite enemege'i melele minalo. Ya
 hu'ehina mone'naya enali bati mehina suhi li huto nehinogomo lenali
 ana hapa'amofih enemege'i memalalo. Enali babu kaga fato fato'i lilata
 nehanaya ana kaga enali'ani mege'i melelata menehabe. ⁴Enali kaga
 lu keta fi epilite enali'ani mino saga hi'ehite enayatu meenehe'melata
 nehabe. ⁵Asaga'na li huto hilata nehanaya enali bona'magi bu galabe lite
 li huto hilata nehabe. Enali mono ka fayahi ge'ahanana enogo gobisalo
 li hekelela to numuna fayahi ge'ahanana enayanugu sahi bila to yatama
 gukete'aniga naga ilago limila hite li hekelelata nehabe. ⁶Mono nonugu
 enali Felosi bona'magi kefa hisa bati hinalo bona folaganugu mino saga
 hite nehago asaga bona'magi lenebe tigite lenigitini bona enubulo li
 saga hilata nehabe. To asaga bona'i li gehesa hite nose'na nete minelata
 nehanagu ana hilata nehabe. ⁷Enali bona'magi folagaha'anigu bite ho tite
 nehago asaga bona'magi enofokehi lite enugufaga soso hu epelele Tisao
 lite ligiti halabe lite hilata nehabe. ⁸Ya hu'ehina lenali kumu'i Tisao lite
 lenigi meheno. Moneko bo nohina aisigo tisa botini nohibe, ya hu'ehinagi
 lenali koguna ite minalo. ⁹To ma melugu bo mone'mofih afotifu yabe lite
 gi mehalo. Afotinifu moneko'isi ai'asigo kokulumalugu nohibe. ¹⁰Enali
 lenikibina bona'i yabe lite lenigi memelene. Lenali kibina botini mone'isi
 nohina ai Mesia nohibe. ¹¹Ya hu'ehina lenali folagahatiniguti kaba botini
 ai lenali koko panatini mineno. ¹²To bo moneuba gi'a li saga huloto hutu
 hata hilina ai gi'a alihi melugu limo ilina'mu yabe. Bo moneuba gi'a li
 saga mehuse legeso huto minalina alihi sipi gihiti bo minalina'mu yabe.

**Tisa bona'magi foipana hi'ahanamofihi hapa'ani Yesu lu hokolo hu
epolo'ehina**

Mk 12:40; Lk 11:39-42, 44, 52; 20:47

¹³Lenali kaga keheli bati hulata bo hiti to Felosi bo lenali, ehethinio, kaba hite mino sepa ite minalo. Lenali loe ka luse bo nehabe. Lenali boana'magihi enubulo kokulumamofihi kasiha'a li hekini lelata nehabe. Lenalitini ana kapo'alo metise nehite boana'magi tilune'mu nehana ana kapo lenali li hokolo mehi epelelata nehabe.

¹⁴Lenali keya kaga keheli bati huse bo hiti to Felosi bo, ehethinio, lenali kaba hite minalo. Lenali loe lenabaga hiti bo yabe. Lenali keto ana'magihi nohi fe'noha'ani ka'i legelata bo yabe. To lenali ya'mana foipanatini yatama nunumu lilete ifi telata nehanabe. Lenali osahi lepilina'a hofa talibe.

¹⁵Keya kaga kehelise bo hiti Felosi bo, lenali ehethinio. Lenali loe kaga lulata bo lenabaga kaba hilo. Lenali koko boti lilune lite mone bo ai mono kagatimofihi mege'i malalibe lite hege nagami beletoga to hepato hepato sa sa hilata bo yabe. Ya hite, koko panatini le'meletemo aku'i lenali logo kapolo lenalitini suhi lite le'mo melelata nehabe. Ya hu'ehina ai lenebege ligito babu luto foipana'a nominabe.

¹⁶Lenali lenubutini pisi lina bomagita bona'i kapo enelepilune lite nehafiye? Ehethinio, lenali kaba hu bati hilo. Lenali ma lite lilata nehabe: Bo moneuba Hu'mamofihi mono noha'a gi holoto lusiga luto ifogati yabe lilinaya fa'mene yabe lilata nehabe. Ya hu'ehina bo moneuba fayaha'a lubo labo lina goli efapo gi holoto ma'naka luto ifogati Hu'mamofihi noha'a yabe lilina. Yalo ai ana lu'ehina ka'a mege'i moloto anana li huto hino. ¹⁷Lenali lenubu pisi luto negi nagi bo. Henana ai sipina ni'ibe? Ai goli sipina ni'ifi to Hu'mamofihi noha'auba golimofihi le'mo lagaso nohibe? ¹⁸To lenali ma lite lilata nehabe: Bo moneuba Hu'mamofihi emise nasana emilata nehana hita gi holoto ifogati ma'naka nolube nolina, ya bati huto yabe. Ya hu'ehina to emise nasana hitalo ninamofihi gi holoto ma'naka luto ifogati yabe lilina, yalo ai lu'ehina suhi lino.

¹⁹Lenali lenubu pisi lina bo. Henana ai sipina ni'ibe? Ai emise nasana sipina to nasana hitauba emise'namofihi le'mo gi nobibe? ²⁰Ya hu'ehina to bouba ai Hu'mamofihi emise'na go emise hita gi holoto ifogati nolube lilina, ai asaga'na emise'na hitalo ninana hiti to ana hitamofi hiti kaga'amofihi lu amuya nomalabe. ²¹To bo moneuba Hu'mamofihi mono noha'a gi holoto ma'naka luto ifogati nolube lilina, ai Hu'mamofihi sipi noha'a hiti to Hu'ma ana nonuga nohibe luto kehelito kaga'amofihi lu amuya nomalabe. ²²To bo moneuba kokuluma'i gi holoto ma'naka luto ifogati nolube nolina ai kefa hisa hiti to Hu'ma, anaga nomina bo hiti to bo ana kefa hisalo nohina'mu luto kaga'a lu amuya nomalabe.

²³Lenali keya kaga keheli bati huse bo hiti Felosi bo, ehethinio. Lenali loe kaga lilata bo lenabagatini kaba hu bati hilo. Asaga'na yuhufa foyagu ni'inana guna ite nayahi luga luga su hago meletele nayahi su hana'amofihi Hu'mamofihi emilata nehabe. Ya hi'ahana lenali asaga kaga nekisa'aga sipi loto ninamofihi he'milata nehabe. Bona'i enele'mo bati huse kagafi, bona'i hiti koguna ito minose'nafi to komopatini monetoga molosemofihi kaga hapa he'milata nehabe. Nayahi luga luga su hana bati'na ninaloti nesi'asi Hu'mamofihi emise kaga mehe'milutaya ma sipina ninauba li yege halibe. ²⁴Lenali lenubu pisi lina bo bona'i kapo enelepilune'mu nehafihe? Lenali guya nose'nagu ume'ume'i noagomo hesi nehe'mite to kameli yaga noagomo lenali fa'mene asaga'i mikili helata nehabe.

²⁵Keya kaga keheli bati hulata bo hiti to Felosi bo, lenali ehethinio. Lenali loe lenabaga hiti bo lenabaga kaba hilo. Lenali kohi to lape'i gupisa'a loko sese hilata bo. Ya nehite guminanatini hiti to lenugufalo ni'inanatu komopa'agu li bai telata nehabe. ²⁶Felosi bo lenali lenubutini pisi lu'ehina. Yata'a kohi komopa'a luga okala huto li gulu gulu luletogo alihi gupisa'aga hiti ana huto gulu gulu lilibe.

²⁷Keya kaga keheli bati huse bo hiti to Felosi bo, lenali ehethinio. Lenali loe lenabaga hiti bo kaba hu bati hilo. Lenali kene mala mala hepa'i koholi penitu'i nefalana'a hite nehabe. Fegutoga bu go bati huse'a ninaga to komopa'aluga filise bona felisa'anifi to asaga'na kolo tuba inana fato fato'i babu luto bai toto minolata nohibe. ²⁸Lenali ya'ma suhi lite nehabe. Bona'magi fegutoga lenugufa be gelete lenebebe sana bona'i nehabe lite lilata nehabe. Ya hana komopatinigu faga faga lusemofihi to kaga li gofa hosemofihi fato fato'i bai toto ni'ibe.

Tisa bomagihi osahi epilina Yesu lu huto hu'ehina

Lk 11:47-51

²⁹Lenali keya kaga kehelise bo hiti to Felosi bo, lenali ehethinio. Lenali kaga loe lulata bo kaba hu bati hite minalo. Lenali kaga leli'ali bomagihi kene mala mala noha'ani gi epelelata nehabe, to lenali bebe sana bomagihi kene mala malato lose tose kifi'na fato fato'i hekelelata nehabe. ³⁰To lenali ma lite lilata nehabe: Koyapa'i tatatigi mine'ahana kanagu lali minotitaya tatatigi enehe'moto kaga lu yege hose bo meenohotita'mu yabe. ³¹Ya'mana kagauba lenalitini lu kuguma nohibe, lenali kaga lu yege helata nehana bo enoho fililata nehana bona'i ana naga'mo lenaliya nehabe. ³²Ya hite enali hapi fi'ahago lenali kehelite enemege'i melete ana suhi hime bilana'mu yabe. ³³Lenali osifa'i yabe. Lenali foipa osifa'mofihi yagapana'a yabe. Hu'ma ka foyagu lenele'mo malalinauba logo kapogu lenoho lifilina'mu yabe. Hena hite lenali koli felenogo Hu'mamofihi ka foyauba lenugufalo melilina ni'ibe? Lenali koli mehilana'a huto ni'ibe luto Yesu lu'ehina yabe. ³⁴Ya hu'ehinagi

lenali kehelilo. Nani kaga lu yege hose bo luga'a hiti, to lataha'anigu kaga bati huto ni'ilina bo hiti to mono ka keheli bati hi'ahana bona'i hiti lenalitoga enoho lifinogo'ni bilana'mu yabe. Enali folagaha'aniguti luga'a enoho fililabe, to luga'a malipu yafalo enahalabe, to luga'a mono nohatinigu nehinogo naga osatu'i enibi yigilana'mu yabe. To lenali mone hepatoti enele'mo he'minogo fato hepalogu netinogo enegene mane ite enele'mo fato hepato malalana'mu yabe. ³⁵To enali komopa'ani bati hu'ehina bona'i melugu nehago luga'a bona'magi enoho fili'ahana, enali asaga ya'mana bona'magihi gumi'ani lenali lenugufalo pa salina'mu yabe. Bati bo Ebeli ai fili'ehina, ya hulago analoti oto Sekalaiya ai Belakaiyahi pana'a, ai'i lenali mono nohi folagaha'agu ho fili'ahana. Asaga ya'ma bomagihi gumi'ani lenalito oto pa salina'mu yabe. ³⁶Nani ma'naka luto lu nolepube. Asaga ya'mana gumi'animofihi foipa mina'auga yatai ma nehana boana'i enali enugufalo huto hilina'mu yabe, luto Yesu lu epi'ehina yabe.

Yesu Yelusale hepa kumu yibi hu'ehina

Lk 13:34-35

³⁷Hege, Yelusale bona'ise. Kaga lu yege hose bo kai enoho fililata hane, to Hu'ma lili'nalo bo kai kumu luto enoho lifigo limina kai efa kosatu enoho nofile. Babu yupahi yagapanaka nani enele'mo nupa hilube'mu hulata nohube. To nala kokoleuba yagapana'a koketapa'aluga enele'mo nupa nohina suhi luto lenele'mo nupa hilube'mu nohunamo lenali melepesibe. ³⁸Lenali kehelilo, yatai hepatini fa'mene hepa'i yafa'a minalina'mu yabe. ³⁹Nani ya'ma kaga luto lu nolepunaya, lenali aku aku'i nani bu menegese mineme bite alihi yupaha'a ma lite lilana yupahi yabe, Sipi Bomofihi gi'alo o'ehina bo ai Hu'mau be tigilibe luto lu emilibe.

Sipi mono nohi sibina hilibe luto Yesu lu'ehina

Mk 13:1-2; Lk 21:5-6

24 ¹Yesu mono nohi he'miloto nobigo enali koko panana'amagi aitoga e'ahana. Enali sipi mono nohi ni'ina'mu lepilune'mu hi'ahana. ²Ya hago Yesu ma luto lu epi'ehina: Lenali ma asaga'na bu ge'ahafihe? Nani ma'naka luto lu nolepube, asaga efahi ma ninaya he'minogo ikupilo akupilo hite meminalina'mu yabe. Enali ibe fologobe hite meluguko limo i su halina'mu yabe.

Ketana babu luto huto hilina'mu Yesu lu'ehina

Mk 13:3-13; Lk 21:7-19

³Yesu Oliba kosagu nohigo koko panana'amagi suguna'i ete ma lite loka he'ahana: Hiya yupahi ya'ma asaga'na huto hilina ni'ibe? Hena huse kana yata'a huto hinogo, to yatai ma me'i su nohenogo kai alube'mu nohane luto liluta ni'ibe?

⁴Yesu ka'anilo nona'a ma luto lu epi'ehina: Lenali kaba hu bati hilo. Bo moneuba lenimi'i molo lalibe'mu nolube. ⁵Babu bona'i elete nani nig'i'ni nehete ma lite lilana'mu yabe: Nani'ni Mesia nohube. Hu'mau noho lifi'ehina bo lenubuto bilube'mu nohube, ya lilabe. To enali babu boana'i enimi'i malalana'mu yabe. ⁶Lenali lebato luba nehanamofihi nogo'a kehelilana'mu yabe. To foto'i nehilana lubamofihi kaga'a kehelilana'mu yabe. Ya hu'ehina lenali koli mehilo. Ya'ma asaga'na huto hilinaya to ana su halina kana'a mana'a huto mehu'ehilibi. ⁷Mone naga'magi ho tite mone naga'i hiti luba hilana'mu yabe. To mone gihiti bo mone'mofihi naga'amagi ho tite mone kibina bomofihi naga'a hiti luba hilana'mu yabe. To babu hepatoga sipi kau'na enahalina to sipi imima'i hiti lilina'mu yabe. ⁸Asaga ya'mana kana huto hilinaya ai'i moneuba yagapana'i ketalube'mu nohigo yata'a gabu foya nolina suhi luto huto hilina'mu yabe.

⁹Yalo bomagi lenayato lite nagalugu lenele'mo melenogo kosele lili'na lilenogo alihi lenoho fililana'mu yabe. To nani kumu lite asaga boana'magi lenipakafa halana'mu yabe. ¹⁰Ya'mana yupahi babu boana'magi komopa'ani sibina hinogo enogo'anigihini enele'mete bite fateha'animagihini enayanuga nebite to enali'ani enogona'ani fateha'ani enele'moloto hilana'mu yabe. ¹¹To kaga lu yege holata bo faga faga lite babu lite huto hilete babu boana'i enimi'i molomofa'na hilana'mu yabe. ¹²Foipa faipa suhi sipi'a tili tele hulenogo babu bomagi enali koguna ito minose'na'ani he'mi su halana'mu yabe. ¹³Ya hu'ehina bona'magi amuya melete nani kumu li pili kete nehago nani aku aluna Hu'mau enubuto bilina'mu yabe. ¹⁴To Hu'mamofihi kapo'amu luto ka lamana'a ya'ma asaga noto noto kapoga lu yege henogo asaga boana'i kehelilete fato fato hepallugu bai toto ana kana'a su halina'mu yabe.

Foipana laga mehinana huto hilina

Mk 13:14-23; Lk 21:20-24

¹⁵To foipa bati mehina napaua hepa'i li sibina hulata nohina lenali bu galana'mu yabe. To koyapa'i kaga lu huto huto bo Tanieliu anana'mu alu'ehina yabe. Ya'manana ai hepa'i Hu'mamofihi molo emise hetofa hepa'i folagaha'alo ho tito ya'ma sibina huto hilinamo'mu kaga lu'ehina yabe. Bo moneuba ya'mana kaga leka soloto ai ekesa yigi fe lino. ¹⁶To ya'mana yupahi Yutia melugu nehana lenali koli hite kosaguko tilo. ¹⁷To bo moneuba noha'a lebato nohutomo ai noha'alugati fe'noha'a limito melino. ¹⁸To bo mone foyagu nohutomo noha'nigati gukete'ni lilube luto mebino. ¹⁹Enali ana'i ya'mana kanalo yagapana hiti hi'ehilana to yagapana'i amihi epite minalanamagi kumu niginaga fi noepube. ²⁰Lenali nunumu hite minalo, ya hilete yasi hilina yupahifi to fuli yupahi lenali koli mefelese minalabe. ²¹Ya'mana yupahi sipi keta huto

minalina'mu yabe. To me'i yuhufa huto hina kana'alofi to koyapa'i ya'mana ketana huto mehu'ehina yabe. To alihi yupa hiti ana ketana huto mehilina'mu yabe. ²²To Hu'mau ya'mana kana li hupa mone mehititaya asaga boana'i ma melugu meminatita'mu yabe. Ya hu'ehina Hu'ma ai enele'mo eto hu'ehina bona kumu'i ekesu mehalibe. Ya'mu luto ai ya'mana kana'a li hupa mone hilina'mu yabe.

²³Ya'mana yupahi bo moneuba ma luto lu epilibe: Bu galo. Mesia ma nohibe, e'e muyaga nohibe, ya luto nolinogomo lenali kaga'a keheli meemilo. ²⁴To faga faga Mesiagi to faga faga kaga lu yege hose bo babu lite nehetilete Hu'mau enele'mo eto hu'ehina bona'a enimi'i malalune lite babeyafana lumofihhi lumofihhi fato fato'i li huto hilana'mu yabe. ²⁵Lenali kehelilo. Ya'ma ka'mu luto kohe toto yata'a kaga alu lepi'ohube.

²⁶Ka melugu nohibe lite bona'magi nelinogomo lenali anaga ka'ani liyafa hite mebilo. To bu galo. Maga'ma fala kito nohibe lite nelinogomo lenali ka'ani keheli meepilo. ²⁷Sopohi fi besa lolata nohina lenali akeheli'ahabe, ya'mana kegi'ati yege tiloto oto mobuto limi fololata nohinaga limi nofalabe. Ana suhi huto Kokulumaguti limi'ehina Bouba nani aku alube'mu hiluna yupahi aluna'mu yabe.

²⁸Filise bona'i gufa'a mone hepatoga ni'igomo anaga lupahi ete li gehesa hilata nehabe.

Kokulumaguti limi'ehina Bo aku alihi alina kana'a

Mk 13:24-27; Lk 21:25-28

²⁹Yesu ka mone hiti lu'ehina: Ma melugu sipi ketana huto hilina su ho su nohenogo ana'asilo mele'isi yege fi metepu noinogo to ikahi melenogo asaga sonofi'i kokulumalugu nina melugu limo i su halabe. Kokulumalugu amuyana ninana mopo hu бага ilana'mu yabe. ³⁰Ya'mana yupahi Kokulumaguti limi'ehina Bomofihhi gufa fayaha'a kokulumato huto nohinogo asaga boana'i ma melugu nehanamagi yibi hu бага ilabe. To Kokulumaguti limi'ehina Bo sopohi ifo'alo minoto noenogo bu galabe. To ai sipi amuya'a hiti to sipi fana meha'atu fi besa loto alina'mu yabe. ³¹To ai agelo'a babu lito enoho lifinogo enali ufehi fu linogo sipi nogo nomelenogo analo bona'a enele'mo eto hu'ehina guna ilina'mu yabe. To enali me'i nekisa'a loegi loegi ninalo mine бага ilete anagati bona'i guna ite ete bite me'i mone kegi'a nekisa'aga su halana'mu yabe.

Nemuya yafauba bona'i guna ise'mofihhi hapa'a lelepilata nohibe

Mk 13:28-31; Lk 21:29-33

³²Nemuya yafaloti lenali mana'a be go fiya ilete lilo. Nemuya yafa yaha'agu foba'a babu lito ni'igomo yuhufa haya'a nohesibe, ya nohigomo lenali hetofa yege kotaga lu'ehibe ya nohinagihe lite lilala nehabe.

³³Ya'mana suhi luto alihi asaga'na huto nohinogo lenali be geletemo

ma lite kehelilo, kana'a anasi a'o leba toloto hapi afilube'mu nohibe lite kehelilo. ³⁴Nani ma'naka luto lu nolepube. Yatai kana'alo boana'i mefilise nehinogo ma asaga'na huto hilina'mu yabe. ³⁵Kokuluma'i hiti me'i hiti su halinaya nani ka'ni fenene mehilina'mu minomo buto minalina'mu yabe.

Anana huto hilina yupa hiti kana'a hiti bo moneuba mekeheli'ehibe
Mk 13:32-37; Lk 17:26-30, 34-36

³⁶Anana huto hilina yupahifi to kana'afi bo moneuba mekeheli'ehibe, kokulumulugu agelouba ana huto mekeheli'ehibe, to nani Hu'mamofihi pana'a nani'ni hiti ana huto mekeheli'ohube. Hu'mau aisigo anasi ana kana'a keheli'ehibe. ³⁷Kokulumaguti limi'ehina Bo aku alina yupahiya Noaha yupahi huto hu'ehina suhi luto huto hilina'mu yabe. ³⁸Koyapa'a Noaha kanalo nagami'i bilito enoho fi meto'ehigo asaga boana'magi ya'mana kana'alo sipi nose'na nete to ana'i kata hite nehago ana kana'alo Noau sipi botigu ti'ehina yabe. ³⁹Ya hina enali ana boana'magi yana'mu huto hilube'mu nohinagi lite enekesa meygise negi nagi nete nehago sipi nagami'i bililoto enoho fi to su ho'ehina yabe. Kokulumaguti limi'ehina Bo aku alube'mu hilina yupahi ya'mana suhi luto huto hilina'mu yabe. ⁴⁰Ya'mana yupahi bo loemale'i foyagu lili'na lite nehi'inogo mone'amofihi le'mo fenene nohinogo mone'a ana foyagu lita i he'minogo minalibe. ⁴¹A'i loemale'i nose'na hesite nehi'inogo mone koto nehila'inaloti mone a'i le'mo fenene nohinogo mone a'i analo ai'asigo minalibe. ⁴²Ya hu'ehinagi lenali Mesiau alina kana'a mekeheli'ahanagi kaba hu bati hite minalo. ⁴³Lenali ya'ma kaga keheli bati hilo. Bo moneuba guminalo bo alina kana'a keheli'ehitita ai noha'alo kaba gimi giloto nohigo guminalo bouba ai noha'agu tiloto fe'noha'a li su mehalina'mu yabe. ⁴⁴Ya hu'ehinagi lenali asaga yupahi lele hite kosaba kosaba hite minalo, hena'mugope? Kokulumaguti limi'ehina Bo aku limilina ya yupahi alibe lite lele hilana kana'alo mealina fato kanalo nehetilina'mu yabe.

Lili'na pana'i bati'a hiti to foipa'a pana'i hiti etali bame ka
Lk 12:41-48

⁴⁵Lili'nalo pana'i mone hiya'a bati'a nohuto ai ekesa yigi bati huto lili'na'alo kaba hu bati nohibe? Kaba bo'auga luga'a lili'nalo pana'magi kaba bo'ani le'mo nomoloto kana'a nohinogo nose'na epilata pana'i yabe. ⁴⁶Alihi sipi bo'auga olenogo asaga lu emi'ehina suhi li su ho'ohutomo ya'ma lili'nalo pana'i ai sipi gelo bino. ⁴⁷Nani ma'naka luto lu nolepube, sipi bo'auga ya'mana pana'i le'moloto asaga fe'noha'alo li kaba gi etalina'mu yabe. ⁴⁸To ai bati mehina lili'nalo pana'i nohutomo ai ma luto lilibe: Sipi bo'ni mele'isi i behe huto meabe. ⁴⁹Ya luto luloto ai kaba hu epolo'ehina pana lalu'agi hiti luba nohuto to bia nagami'i nelete negi nagi nete nehana

bo hiti nagami'i nalina'mu yabe. ⁵⁰ Ya huto ya'mana lili'nalo pana'uba sipi bo'a geba huto meminalinalo ana kana'asilo sipi bo'a nehetilibe. To ana pana'uba alina kana mekehelise nohilinalo yabe. ⁵¹ Ya huto nohinogo sipi bo'auga naga osatu ana pana'i bi yigiloto le'moto buto fagalo bona enayanuga bilina'mu yabe. Ya hinogo enali ya'managa nehite sipi yibi bena nehite enagabu kumu usegi asegi ise hepato buto minalina'mu yabe.

Teni yafana'magihi bame ka

25 ¹ Yesu kaga luloto bame ka mone lu epi'ehina: Ya'mana yupahi kokulumamofihi kapo nayahi luga luga su hago nehana yafana'magihi suhi hilina'mu yabe. Bo mone liha'a hiti etayanugu lilu'ibe'mu hilina bo alube'mu hilibe. Ya nohinogo enali ya'mana yafana'magi lamu libi'ani li gilete kapoga bite sa sa hite le'moto alune lite yabe. ² To nayahi mone kegi'a su hana yafana'i enali enekesagu fe melina yafana'i yabe. To nayahi luga kegi'a su hana yafana'i enali enekesagu fe lu'ehina yafana'i yabe. ³ Enekesagu fe melina yafana'magi lamu libi'ani lite banaya to kalasini su nohenogo heki bilana kaba'a melise bi'ahana yabe. ⁴ To enali enekesa hiti yafana'i enali lamu libi'ani nelite to kilulu koha'anigu kalasini heki bai tete su nohenogo heki bilana kaba'a lite bi'ahana. ⁵ Liha'a hiti etayanugu lilu'ibe'mu ha'ina bo ai mele'isi meago asaga yafana'i geba hite minapa minapa higo enubu loko toko higo enubu'i ke'ahana.

⁶ To folugu'i sipi kehe mone ilete ma lite li'ahana: Liha'a hite etayanugu lilube'mu nohina bomo ma noabe. Lenali kapoga bite be gete be tigite le'mete alo lite kehe i'ahana. ⁷ Ya lago enali ya'mana yafana'i ho tilete lamu libi'ani li kulu tite li loloba hi'ahana. ⁸ To enali enekesa fe melina yafana'magi enekesa ni'igo enekesagati kalasini kaba'a hiti lite e'ahana yafana'magihi ma lite enoloka he'ahana: Lenali kalasini luga'a limilo. Lali libiti asabalube'mu nohibe li'ahana. ⁹ Ya lago enali enekesagati kalasini'ani hiti lite ana yafana'magi li'ahana: O'e, ma li'ohuta kalasiniuba lali hiti lenali hiti bati mehilina'mu yabe. Lenali situaloguti bite fato'i mina filo. ¹⁰ Enali enekesa fe melina yafana'magi kalasini mina filune'mu a'nebago ya'mana bo liha'a yanugu lilube'mu hina bo neheti'ehina. Ya higo enali lele hite minana yafana'i ana bo hiti nonuga tilete ana bouba liha'a hiti etayanugu li'igo ana gukete nose'na babu lite nete mine'ahana. Ya nehago ana noto kasihi hekini lo'ehina yabe.

¹¹ To alihi enekesagu fe melina yafana'i ete kasitoti ma lite kehe i'ahana: Sipi boti yale. Sipi boti yale. Kai kafe sigi letobo. ¹² Ya lago ai sipi bouba ma luto lu epi'ehina: Nani lenali'i mekeheli'ohube lu'ehina yabe. Yesu ana bame ka mone'a hiti molo emiloto ma luto lu epi'ehina: ¹³ Ya hu'ehinagi lenali kaba hu bati hilo. Kokulumaguti limi'ehina Bouba aku alina yupahi to kana'a hiti lenali mekeheli'ahabe.

Loegi monegi lili'nalo pana'magi bame ka

Lk 19:11-27

¹⁴Bo moneuba hepa'a he'miloto foto hepatoga bonohi bilube'mu hilina suhi huto kokulumamofihi kapo'a minalina'mu yabe. Ai lili'na pana'a kehe i nupa huloto ai enali enayanugu fe'noha'a molo'ehina. ¹⁵Ai lili'nalo pana'amagihi hapa'anilo hiti to enali lili'na lilata nehana hapa'ani keheli fe luloto moni efahi guna ito epi'ehina. Mone'amofihi 5,000 kina emi'ehina, to mone'amofihi 2,000 kina emi'ehina, to mone'amofihi 1,000 kina emi'ehina. Ya huto guna ito epiloto abufa hu'ehina. ¹⁶Ai ana kaba bo'ani abufa hulago 5,000 kina lina bouba hololu luto ana efatoti bisinisi mololoto 5,000 kina aku'i molo emito mone'a hiti efahi huto li'ehina yabe. ¹⁷To kaba bo'auba 2,000 kina emi'ehina bouba ana huto bisinisi mololoto aku'i 2,000 kina molo emito mone'a hiti efahi huto li'ehina. ¹⁸Ya ha'ina ai 1,000 kina kaba bo'auba emina bouba ai lito buto melugu keli kifiloto anagu keli ho'ehina yabe.

¹⁹Yatama kana'a a'mino yatama huloto sipi bo ai aku'i hepa'aga o'ehina. Ya huloto lili'nalo pana'amagihi efaha'a epi'ehina li nupa huto li eto hilube'mu hu'ehina. ²⁰To 5,000 kina emi'ehina bo ai o'ehina, ai 5,000 kina mone hiti molo emito liloto oto ma luto lu'ehina: Sipi bo, kai 5,000 kina nimi'ahane. Bu gobo, nani bisinisi moloto'ni 5,000 kina mone'a aku'i okalago li'ohube. ²¹Sipi bouba ma luto lu emi'ehina: Kai hetofa lili'nalo bo amuya bo nohane. Kai hetofa suhi li huto hu'ahane. Kai lili'nalo kaba hu bati hulata nohane. Kai lagaso'nasimofihi kumunalo hetofana huto kaba hu bati hu'ahatalo yatai nani babu fe'noto kaba kimi gi ketalube. Kai sipi boka hiti kegelonaguti ete minaliyo. ²²To 2,000 kina sipi bo'auba emi'ehina bo ana huto o'ehina. Ai ma luto lu'ehina: Sipi bo, kai 2,000 kina nimi'ahane. Bu gobo, nani bisinisi moloto'ni 2,000 kina mone'a hiti molo emito li'ohube. ²³Ya ligo sipi bo'auba ma luto lu emi'ehina: Kai hetofana huto amuya lili'nalo bo yabe. Kai lili'nalo bati huto kaba hulata nohane. Kai lagaso'nasimofihi le'mo bati huto kaba kimi gitamofihi okane'a yatai babu fe'noto kimi gi ketalube. Sipi boka hiti kai kegelonaguti ete minaliyo. ²⁴To 1,000 kina sipi bo'auba emi'ehina bo ana huto oloto ma luto sipi bo'a lu emi'ehina: Sipi bo, nani akeheli keto'ohube, kai hakale kaga lulata nohata bo nohane. Mone bouba foya hekolo'ehinaguti kai nose'na kifilata nohane. To mone meto bo moneuba nose'na legeya'a tili hu'ehinaloti kai nose'na'a lilata nohane. ²⁵Ya'mu luto nani kai kumu nelesa'ni ligo 1,000 kina nimitamo lito buto melugu keli hoto fala ki keto'ohuna yabe. Ya hu'ohuna efahaka nimi'ahata eto huto ma li keto'ohunagi libo. ²⁶Ya ligo sipi bo'auba ka'alo ma luto lu emi'ehina: Kai bati mehina lili'nalo bo fuligo koloto nominata bo yabe. Bo mone'mofihi foyaguti nose'na nokifito to mone melugu bo moneuba

nose'na legeya'a tili hu'ehinaloti nose'na'a nani kumu noline luto noho fisa nokitaba kai keheli bati hu'ohuto nolapihe? ²⁷Ya latagi, kai hena hibe luto efaha'ni efaha nonugu memalane? Ya hatita nani oto ana efaha'nilo molo emi'ahago to mone hiti lutita'mu yabe. ²⁸Ya hinagi kai 1,000 kina li'ehina be silito 10,000 kina li'ehina bomofihi li emibo. ²⁹Hena'mube? Asaga bona'i ana'ina'ani ninalo nani mone'a hiti epilune'mu yabe. To mone bouba ana'ina'a meni'inogo nesi'nasi yanuga li'ehinana nani be sili he'miluna'mu yabe. ³⁰Ya huto ni'inagi ma bo lili'na melise fulilo bo fegutoga metepu inagu nu kite le'mo he'milo, ya hinogo enali anaga metepugu usegi asegi ite enagabu kumu yolege balege ite gelehe gelehe hite enabagalo heni kofi'ehite yibi hite metepugu minalabe luto Yesu bame ka lu epi'ehina yabe.

Yesu asaga boana'i guna ito enele'mo eto eto hilina

³¹Nani Kokulumaguti limi'ohuna Bo nohuto gihiti bo suhi huto oto agelomagi hiti aku aluta yupahi sipi kefa hisalo nani minaluna'mu yabe. ³²Ya hu'ehinogo'ni asaga melugu boana'i nani nubulo li gehesa hilana'mu yabe. Ya hinogo yaga kaba bouba sipisipi yaga hiti meme yaga hiti enele'mo guna iloto loegu enele'mo luga luga ilata nohina suhi huto nani ana huto ilube. ³³Nani sipisipi yagamagi nayahi lamaga'aga enele'mo nomoloto to meme yaga nayahi soga'aga enele'mo malaluna'mu yabe. ³⁴Ya hinogo'ni kibina bouba ai oloto nayahi lamaga'niga nehana bona'i ma luto lu epilina'mu yabe: Lenali alo. Afo'nifu lenele'mo bati hilibe. Koyapa'i ai kokuluma hiti me'i hiti lolo hu'ehina kana'alo Afo'nifu kapo'a li hokolo hu lepolo'ehina kapo lenali ete tilo. ³⁵Hena'mugope? Koyapa'i nani kau'na nonalago lenali nose'na nimi'ahana yabe. To nagami kumu lubaha'ni hosopa noigo lenali nagami'i nimigo no'ohuna yabe. To nani hepa'ni he'miloto ka bo oto nohugo lenali nohatinigu nele'mo mele'ahana yabe. ³⁶To nani nugufa yapako nohugo lenali nugufalo gukete li hekele nete'ahana yabe. Nani nebesigo koloto nohugo lenali fulu fulunatu ite ete soso hi nete'ahana yabe. Nani naga nonugu nohugo lenali ete bu negete nebe tigi'ahana yabe. ³⁷Ya linogo enali bati bona'i sipi bomofihi yahi lamaga'aga minanamagi ma lite sipi bomofihi loka halabe: Sipi boti. Hiya yupahi kau'na nokalago bu kogoto nose'na kimi'ohutabe? To hiya yupahi nagami kumu lubahaka hosopa noigo nagami'i kimi'ohutabe? ³⁸Hiya yupahi ka bo lolo huto nohanogo lali nohatigu kele'mo molo'ohutabe? To hiya yupahi kai kugufa yapako nohanogo lali gukete li hekolo keto'ohutabe? ³⁹Kai hiya yupahi kebesi'ehigo lali buto soso hu ketola, to naga nonugu nohanogo lali buto kebe tigila hu'ohutabe? ⁴⁰Ya lite noloka henogo nani sipi gihiti bomofita ma luto lu epilube: Nani ma'naka luto lu nolepube. Musufalo bo mone nalalu'nifihi ma melugu ya'mana suhi hi ete'ehilana ya'ma nani'i nele'mo bati hi'ahabe.

⁴¹To nani nayahi soga'niga nehana bonatoga i behe huloto ma luto lu epilube: Lenali foipa bona'i. Lenali logo mesobose logo loba loba huto nina hepatoga bilo. Ya'mana logo Afo'nifu Sata hiti foipa fele'a hiti mesobose loba loba logo go epolo'ehinalo yabe. Lenali analo bilo. ⁴²Hena'mugope? Nani kau'na nahago nohugo lenali nose'na menimi'ahanabe, nagami kumu lubaha'ni hosopa noigo lenali nagami'i menimi'ahanabe. ⁴³Nani ka bo oto hepatinigu nehetuna nohatiniluga nele'mete meti'ahabe. Nani nugufa yapako nohugo lenali gukete nugufalo li mehekele nete'ahana yabe. Nani nebesigo koloto nohugo lenali ete soso mehi nete'ahabe. To nani naga nonugu nohugo lenali ete bu negete nebe metigi'ahana yabe luto gihiti bo lu epi'ehina. ⁴⁴Ya luto lu epinogo enali ka'alo nona'a ma lite lu emilabe: Sipi Botimaka. Hiya yupahi kau'na kohola, lubahaka hosopa ila, ka bo minola, kugufa yapako minola, kebesila, naga nonugu minola hu'ahanago lali kele'mo bati mehu'ohune? ⁴⁵Ya lite loka henogo gihiti bouba ma luto lu epilube: Nani ma'naka luto lu nolepube. Musufalo bo nalalu'nigihini ma melugu enele'mo bati mehi'ahanaya nani'i nele'mo bati hite menehe'me'ahabe. ⁴⁶Ya linogo ya'mana bona'i enali enagabu ginogo minoba minoba hepalugu bite minalabe. To bati bona'a enali hetofa hepa'i minoba minoba hilana hepato bilana'mu yabe, luto Yesu lu epi'ehina yabe.

Enali mono noto kaba hi'ahana bomagi Yesuhi fi taga hi ete'ahana

Mk 14:1-2; Lk 22:1-2; Yn 11:45-53

26 ¹Yesu kaga alu epi su holoto alihi koko panana'amagihini ma ka lu epi'ehina: ²Lenali akeheli'ahabe, loe yupahisi minolototi koyapa Hu'mau lubuto bu'ehina yupa kumu Pasa yabe nelana ya'ma nose'na naluta kana'a huto hilina'mu yabe. Ya hulenogoti Kokulumaguti limi'ehina Bomofihini le'mete bite fateha'amagihini enayanuga melenogo malipu yafalo ho fililana'mu yabe.

³Ya'ma kana'alo sipi mono nohi kaba bona'i hiti to Isilaeli enikibina bona'i hiti sipi mono bo Kaiyafasihini nonugu li nupa hite mine'ahana. ⁴Enali Yesuhi fibe bataga hube hi etelete yato lite ho fililana kaga lube kehelibe hite mine'ahana. ⁵Ya hu'ehina ya'mana suhi asaga bona'i li nupa hite nose'na nete minelata kanalo ya mehilune. Ya hiluta asaga boana'magi luba li huto hilana'mu yabe lite sumi ka li'ahana.

Maliau tu mesebe Yesuhi lataha'agu heki eto'ehina

Mk 14:3-9; Yn 12:1-8

⁶Betani hepato Simoniu ai koyapa'i lepolosi hepuhi lo'ehina bomofihini nonuga Yesu mino'ehina. ⁷Ya higo a'i moneuba efaha konugu tu mesebe mina'a tito nina mesebe liloto Yesu hitalo nose'na noto nohinalo oloto ana tu mesebe Yesuhi lataha'agu heki su ho'ehina. ⁸Ya higo enali Yesuhi

koko pana'amagi anana be gelete enitaluga logo bigo ipakafa helete ma lite li'ahana: Sipi mina'a tito nina mesebe henabe luto heki hapotili nohibe? ⁹To ya'mana tu mesebe bo mone'mofihi emutita sipi mina'a tito lilototi enumuhi menina bona'i guna ito eputita'mu yabe. ¹⁰Ya lite nelago Yesu kaga'animofihi bu go fulu tito enogoloto ma luto lu epi'ehina: Lenali henabe lite ma a'mofihi ekesagu hina kaga nelabe? Ai hetofa suhi nani keheli bati hu etona suhi nohu netabe. ¹¹Lenali asaga yupahi enumuhi menina bona'i hiti minalana'mu yabe. Ya hu'ehina naniya lenali hiti minoba minoba mehiluna'mu yabe. ¹²Ma a'uba ma tu mesebe lataha'nigu heki neto'ehinaya kene keligu bilunamofihi nele'mo loloba nohibe. ¹³Nani ma'naka luto lu nolepupe, asaga noto noto kapoga ma a'uba li huto hinanamofihi hetofa kaga'a lu yege halabe, ya hilete enali enekesa yigi emite ai kumu'i enekesu mehalibe.

Yutasiu Yesuhi fateha'amagihi lenelepilube luto ka molo'ehina

¹⁴Ya'mana yupahi Yesuhi koko pana'a ¹²nehanaguti Yutasi Isikelioti yabe lite gi nemalana bouba sipi mono nopo kaba bonatoga gutunu ka ma luto buto lu epi'ehina: ¹⁵Yesuhi lenelepilunaba lenali henana mina'a nimilanabe? Ya ligo enali kaba bona'magi efahi legeya'a leka selete ³⁰li nupa hite emi'ahana. ¹⁶Ya hilago ya'mana kana'aloti Yutasiu Yesuhi fateha'amagihi enelepilina kana'amu sa sa hu'ehina yabe.

Yesu koko pana'amagi hiti pasa nose'na nalune'mu hi'ahana

Mk 14:12-21; Lk 22:7-14, 21-23; Yn 13:21-30

¹⁷Yeye mebise beleti nelata nehana kana'alo yata'a Yesuhi koko pana'a aitoga elete ma lite loka he'ahana: Asaga'na hiya'alo li loloba hu keto'ehinogoti kai Pasa nose'na nalane? ¹⁸Ya lago Yesu lu epi'ehina: Lenali hepalugu tiletetini bo mone'mofitoga bilete ma lite lu emilo: Tisau ma luto libe: Nani kana'ni a'o leba notabe. Nani koko pana'ni hiti kai nonugu Pasa nose'na nalube lu'ehibe lilo. ¹⁹Yesu ya luto koko pana'a lu epalago enali bite lu'ehina suhi huto hulago Pasa nose'na bagita hite li loloba hi'ahana.

²⁰Ute kana nohigo Yesu koko pana'a ¹²hiti hitalo minete nose'na nenete Yesu ma luto lu epi'ehina. ²¹Nani ma'naka luto lu nolepupe. Lenali folagahatiniguti mone bouba nani'i nayato lito fateha'nimagihi enelepilina'mu yabe. ²²Ya ligo koko pana'amagi enali enugufagu sibina hu бага igo eniginaga fina bomagi mone'isi mone'isi ho tilete ma lite Yesuhi loka he'ahana: Sipi Bo, nani kumu nolapihe? ²³Ya lite lago Yesu ka'ani ma luto lu epi'ehina: Nani hiti lapelugu yaha'atu'i beleti nagami i fulu huto nalina bouba ya hilibe. ²⁴Mono kagu koyapa'i kaga lu yege hose bomagi nani ya'ma Kokulumaguti limi'ohuna Bo fililuna'mu fayahi ge'ahana kaga ninalo nani filinogo'ni pa salina'mu yabe. Ya hu'ehinaya

ai nayato lito fateha'nimagi epilina bose. Ke. Ana bo lesa'a gofana lino. Ito'afu ana bo meketatitaya bati huto minatita'mu yabe. ²⁵Yutasu Yesuhi fateha'amagihi enelepise bouba ma luto lu'ehina: Tisao, nani kumu nolapihe? Ya luto loka hago Yesu lu'ehina: O'yo, kai alu huto nohane.

Yesu yupala nose'na koko pana'amagihi epi'ehina

Mk 14:22-26; Lk 22:15-20; 1 Kol 11:23-25

²⁶Enali nose'na nete nehago Yesu beleti liloto Hu'mamofitoga fokehi hoto nunumu luloto koko pana'a ana beleti li pata sito epila epila nohuto ma luto lu epi'ehina: Lenali lite nalo. Ya'ma nani nugufa'ni ni'ibe. ²⁷To ai bai nagami kofi mone liloto Hu'mamofitoga fokehi hoto nunumu luloto koko pana'a noepito ma luto lu epi'ehina: Lenali asaga'i ma bai nagamiluguti nalo. ²⁸Ya'ma nani golaha'ni ni'ibe. Hu'mau lu mu tifise'na'a golaha'ni huto hu molo'ohube. Asaga boana'magihi foipana'ani li gololo tu epalalibe luto nani nohekube. ²⁹Nani ma'naka luto lu nolepuhe. Nani mana bai nagami'i menose minomo buto buto'ni Afo'nifihiki kokuluma kapo'alo lenali hiti yuhufa bai nagami'i naluta'mu yabe. ³⁰Ya luto lu бага igo enali mono nama mone lilete fegutoga heleko limite Oliba kosagu tite mine'ahana yabe.

Pitaga nani kumu'i bahane halata'mu yabe luto Yesu lu'ehina

Mk 14:27-31; Lk 22:31-34; Yn 13:36-38

³¹To Yesu ma luto lu epi'ehina: Yatai lenali nani'i he'mi netete koli fele su halana'mu yabe. Monolugu ma lite kaga lu huto huto bouba go'ehina yabe: *Sipisipi yaga kaba hu'ehina bo Hu'mau ho filinogo sipisipi yaga'a koli hite tili tele hite fele su halana'mu yabe.* ³²Ya hu'ehinaya nani filihilunagati aku'i ho tiloto'ni kohe toga Galili kapogu nobiluna'mu yabe. ³³Ya luto Yesu noligo Pitau ma luto Yesu lu emi'ehina: Luga'amagi he'mi ketete koli hi su halanaya nani ma'naka he'mi ketoto mebiluna'mu yabe. ³⁴Ya luto ligo Yesu ka'alo lu emi'ehina: Kai ma kaga matuhakagu li molobo. Yatai folugu'i kokole nogo memolo'ehinogo kai loegi monegi yupahi nani'i mekeheli'ohube luto bahane halata'mu yabe. ³⁵Yesu ya luto Pitahi lu emigo Pitau lu'ehina: Nani kai'i bahane meho ketalunaya, kai'i hiti moneka fililu'inamo ni'ibe. Ya luto Pita lulago Yesuhi koko pana'a luga'amagi Pita lina'a hite moneko ka lu бага i'ahana yabe.

Yesu Gesemani foyagu nunumu hu'ehina

Mk 14:32-42; Lk 22:39-46

³⁶Ya huloto Yesu koko pana'a hiti enele'moto hepa'i mone gi'a Gesemani yabe luto ninalo bilete Yesu ma luto koko pana'a lu epi'ehina: Nani meyasilo buto nunumu hilunagi lenali malo nehilo. ³⁷Ya luloto Pitahi yagi to Sepetihiki pana'a loe hiti enele'mo mege toto moneka

bi'ahana. Ya hite nebago Yesuhi gufa'agu sipi keta besigo ligo pisigigo huloto ginaga gofa fi'ehina. ³⁸Ya huloto ai ma luto lu epi'ehina: Nani fililuna suhi luto nugufagu sipi keta nonebesibe. Lenali malo ho tilete minenogo nani hiti ikaba akaba huto minalune. ³⁹Ya luto luloto ai nesi'asi i gofa hoto buloto okabagati melugu koloto ma luto nunumu hu'ehina: Oho, Afo'niga, kai kekesa yigilata bati hinogomo, ma ekesa nagami'i nalunamofihhi kohi li he'mi netobo. Ya hu'ehina kai nani'i nemege'i moloto ka'ni liyafa mehuto, kaika kemehuba hilina suhi hubo.

⁴⁰Ya luto nunumu luloto koko pana'a nehanaga buto enubu'i kelete nehago bu enogo'ehina. Ya huloto Pitahi lu emi'ehina: Hena'mu nehabe? Ho tite lenubu gili gili hite hupamone kanasilo nani hiti kaba gimii gite meminalana'a hi'ahafihe? ⁴¹Lenali kaba hite minete nunumu hilo. Fibe taga hu lepolose'na lenalitoga huto hu lalibe'mu nolube. Komopatinigu ninanauba lenele'mo kosaba kosaba nohinaya ifo lenugufatini amuya'a meni'ibe.

⁴²Ya luloto Yesu i behe huto buto loe yupahi ma luto hu'ehina: Afo'niga. Ma kohi nanitogati i nebe silito mebinogomo nani nalube, ya hinogo'ni kaika kipagu ni'ilina suhi pa salibe. ⁴³Ya luto nunumu lu su holoto i behe huto oto koko pana'a enubulo sipi keta higo enubu'i kelete nehago bu enogo'ehina.

⁴⁴Yesu aku'i he'mi epololoto i behe huto buto loegi monegi yupahi yata'a lu'ehina nunumu aku'i lu'ehina. ⁴⁵Ya luto nunumu hu su holoto koko pana'a nehanaga i behe huto oto ma luto lu epi'ehina: Lenali lenubu'i bati'a kelete nehafihe? Lenali kehelilo. Kokulumaguti limi'ehina Bomofihhi yato lite bite foipa bomagihi enayanuga bilana kana'a ma'asi huto hilina'mu yabe. ⁴⁶Lenali ho tilo, abilutagihe. Bu galo, nani'i fateha'nimagi enayanugu li bilina bo ma ahuto hu'ehibe.

Yutasiu Yesuhi fateha'amagihi enayanugu libi'ehina

Mk 14:43-50; Lk 22:47-53; Yn 18:3-12

⁴⁷Yesu kaga luto nohigo Yutasiu 12 Yesuhi koko pana'a mino'ehinauba Yesu nohinalo neheti'ehina. Ya nohigo babu bona'i mege'i melete yanamagi emita'i yatamana nelite osahi ko nefite bululu hite e'ahana. Ya'mana bona'i enali sipi mono bona'i hiti to soga bona'magi enoho lifigo e'ahana yabe. ⁴⁸Yutasiu enele'moto ana bona'i yaha babeyafa hu epiloto ma luto lu'ehina: Nani soso hiluna'mu bomoya lenali sa nehana bo nu kiluna'mu yagi lenali bite yato lilo. ⁴⁹Yutasiu nehetiloto Yesu nohinalo fu luto buto ma luto lu'ehina: Tisao, folugu'i yabe, luto soso hu'ehina. Ya luto luloto Yutasiu Yesuhi nu ki'ehina. ⁵⁰Ya higo Yesu lu emi'ehina: Nalaluo, lolo hilube luto noata suhi mele'isi li huto hubo. Ya noligo Yesuhi fateha'a bufalo elete yato li'ahana yabe. ⁵¹Yesuhi hiti moneka mine'ahana bo moneuba yatama emita'i li saga huloto sipi mono bomofihhi koko

pana'a inaya koli nopigo i fakala bito ekesa ilaga lu'ehina yabe. ⁵²Ya higo Yesu bu goloto ana bo lu emi'ehina: Yatama emitaka noha'aluga li bibo. Asaga bona'i emitatu'i luba hilata nehana enali ana emita'aniuba laga hu enugufa melenogo fililana'mu yabe. ⁵³Nani Afo'nifihi nehe'malibe luto kehe ilunaya agelo gimi bo 12 tauseni'a be ligito babu lito enoho mefilibe luto kai mekehelipiye? ⁵⁴Nani ya hilunaya Hu'mau fayanugu go'ehinamofihhi mana'a hiya'a huto huto hilinabe? Monologu ma lite ge'ahana yabe, asaga'na ya'ma suhi luto huto hilina'mu yabe.

⁵⁵Ana kana'asilo Yesu fateha'amagi ma luto lu epi'ehina: Lenali baukalo bo helata nehana suhi lite nani'i nahalune lite yatama emita'i hiti yatama hosu hiti kefeha hite neafihe? Henabe lutobe? Asaga yupahi nani babu boana'i hiti sipi mono nonugu ka enelepito minolata huna lenali bite nayato meli'ahana yabe. ⁵⁶Ya hu'ehinaya kaga lu huto huto bomagi mono kagu fayahi ge'ahanalo pa salina'mu yabe.

Ya luto ligo Yesuhi koko pana'a tili tele hite koli fele su he'ahana yabe.

Kanisolemagi enubulo Yesuhi ka foya li ete'ahana

Mk 14:53-65; Lk 22:54-55, 63-71; Yn 18:13-14, 19-24

⁵⁷Enali Yesuhi yato lina bomagi sipi mono bo Kaiyafasihi nonuga le'mete bi'ahana. Enali keya kaga keheli bati hi'ahana bo hiti to soga bona'i ana nonuga li nupa hite nehanaloga ti'ahana yabe. ⁵⁸Pitau foto foto huto enemege'i lifito bu'ehina yabe. Ya huloto ai babafi bomofihhi noho gegisagu ti'ehina. Analo tito ai hiti gimi bomagi hiti metoga minete nehana. Anana anana Yesuhi li huto hi etalanamofihhi hapa hapa'a bu go bati hilube luto yabe. ⁵⁹Enali sipi mono babafi bona'i hiti to asaga kanisole bomagi bo moneuba Yesuhi faga lu etenogo ho fililana bo'mu sa sa hi'ahana. ⁶⁰To babu bomagi Yesuhi faga faga li ete'ahana. Ya hana Yesuhi ho fililanamofihhi kaga mana'a lu huto mehi'ahana. Alihi loe bole neheti'aha'ina. ⁶¹Ya hilete etali ma lite li'aha'ina: Ma bouba ma luto lu'ehina yabe: Hu'mamofihhi sipi mono noha'a tele biloto loegi monegi yegegu aku'i gi бага iluna'mu yabe.

⁶²Ya lite la'igo sipi mono bouba ho tiloto Yesuhi loka ho'ehina: Kai'i kaga kifisa nei'inalo nona'a lilata ni'ifihe? Ya'ma kifisa nei'ina kagaloba kai hena hibe luto nokeheline? ⁶³Ya luto loka hago Yesu kaga meluse legeso huto mino'ehina. Ya higo ya'ma sipi mono bouba ma lu emi'ehina: Nani ma'naka luto Hu'ma mehiti bomofihhi gi'alo koloka nohonagi kai lu nimibo. Kai Mesiaga Hu'mamofihhi Pana'a nohapi fato'ibe? ⁶⁴Yesu ka'alo nona'a lu'ehina: Kai a'nolane. Ya hu'ehina lenali asaga'i kaga mone lu lepilube. Yatai hiti to aliha'a yupa hiti Kokulumaguti limi'ehina Bouba ifo muya Sipi Boti Hu'mamofihhi yahi lamaga'aga minoloto kokulumamofihhi sopoha'alo aku alina'mu yabe. ⁶⁵Yesu ya luto lulago sipi mono bouba kata'a li bolala ito pekene pakunu nohuto lu'ehina: Ai Hu'mamofihhi

kiya yokolo ka lu eto'ehibe. Lali bona'i luga'a hiti kehe meilune. Ai Hu'mamofihiki kiya yokolo ka yatai a'nolu etago lenalitini akeheli бага i'ahabe. ⁶⁶Lenali henabe lite nekehelibe? Asaga bomagi ma li'ahana: Ai bati mehina kaga lu'ehinago henogoti fililibe lite lu бага i'ahana.

⁶⁷Ya lilete enali Yesuhi okabagu libi'na nehete osahi emi'ahana. To luga'amagi enayaha osatu bu i polo hi'ahana. ⁶⁸Ya nehago luga'amagi loka he'ahana: Kuyu'afu nokahabe? Kai Mesiaga nohutomo lu huto hubo.

Pitau Yesuhi bahane ho eto'ehina

Mk 14:66-72; Lk 22:56-62; Yn 18:15-18, 25-27

⁶⁹Pitau fegutoga noho gegisa foya'aluga mino'ehina yabe. Ya higo sipi mono bo mone'mofihiki lili'nalo pa'uba bu goloto lu emi'ehina: Kai hiti Yesu Galili bo hiti mino'ahata yabe. ⁷⁰Ya ligo Pitau asaga bona'magi enubulo bahane holoto lu'ehina: Kai kaga nolatamofihiki nani mekeheli'ohube lu'ehina. ⁷¹Ya luto luloto ai fegutoga nohi kasito nohigo keke keke yafa a'i moneuba bu goloto bo luga'amagihiki lu epi'ehina: Muya pana'i ai Nasaletе bo Yesu hiti moneka mine'aha'ina bo yabe. ⁷²Ya ligo Pitau aku'i bahane holoto ma luto lu'ehina: Nani ma'naka luto mekeheli eto'ohuna bo'mu nelabe. ⁷³Nesi kanasi minoto bo mone'a analo minanamagi Pitatoga ete ma lite li'ahana: Ma'naka luto Galili bona nagaluguti nohane. Kai nogokauba huto'i noago nokehelune. ⁷⁴Ya lite lago Pitau lusi amuya mololoto bahane hoto lu'ehina: Faga nolinogo'nimo Hu'mau naga'i nimilibe. Nani ma'naka luto ana bo mekeheli'ohuna bo'mu nelabe. Ya luto noligo ana бага'a hiti kokole nogo molo'ehina. ⁷⁵Ya higo Pitahi koyapa'i Yesu kaga lu emi'ehina, ekesa hokolo hu'ehina: Kokole nogo memolo'ehinogo loegi monegi yupahi nani'i mekeheli'ohube luto bahane halata'mu yabe. Ya luto lu emi'ehina kaga ekesalo ago fegutoga heleko limito buto ginaga sipi huto yibi hu'ehina yabe.

Yesuhi kibina bomofihiki bulo le'mo mele'ahana

Mk 15:1; Lk 23:1-2; Yn 18:28-32

27 ¹Go'i noligo asaga sipi mono bo hiti to Isilaeli bo olopa'a hiti li nupa hilete Yesuhi ho fililana kaga lu keheli fa keheli hi'ahana. ²Enali seni nagatu'i Yesuhi yato naga'i ilete le'mete bite Lomu gamani bo Pailatihi sipi bo nohinamofihiki emi'ahana yabe.

Yutasi fili'ehina

Apo 1:18-19

³Yutasiu Yesuhi fateha'amagihiki enayanuga li bi'ehinauba Yesuhi ka foya li etete ai ka'a li melugu malana bu go'ehina. Ya huloto ai komopa'a i gelehe huloto 30 siliba efahi legeya'a sipi mono bomagi to babafi olopa bomagi emi'ahana aku'i ito buto epi'ehina. ⁴Ya huloto ai lu epi'ehina: Nani

foipana ameni'ina bomofihi yato li lepiloto'ni nani'ni foipana li nubufalo molo'ohube. To ai fililina'mu yabe. Ya luto ligo enali li'ahana: Ya lalinati meni'ibe. Ya'ma kai'naka ni'ibe. ⁵Ya lite lago Yutasu ana efahi mono nohi hasagu he'mi lago notito fegutoga buto nagato ai'a naga ho'ehina.

⁶Ya higo sipi mono bona'magi ana efahi lilete li'ahana: Ya'ma golaha efahi ni'ibe, mono nonugu efanugu li sibi huto malalutaya lali keya kagati o'e lu'ohutomofihi li gofa haluta'mu yabe. ⁷Enali ana efa kumu kaga lite lite melelete moneko kalo li mele'ahana: Enali ana efatu'i me somo lolo hulata nohina bomofihi foya mina filete bonoho bona'i ete filise bona'magihi kene mala malaluta hepa'i li lolo hilune li'ahana yabe. ⁸Ya'mu lite ya'mana me'i gi'a Golaha Me'i yabe lite gi mele'ahana yabe. Ya'mana gi'a yatai hiti helata nehabe.

⁹Koyapa'i kaga lu huto huto bo Yelemayahi bagalo Hu'ma kaga molo'ehina yatai mana'a pa so'ehibe. Ana kaga ma luto ni'ina: *Enali efahi legeya'a 30 siliba lilete ana efatoti ya'ma bo mina filuta mina'a yabe lite Isilaeli bona'magi ka mele'ahana yabe.* ¹⁰Ana efatu me somo lolo hulata bomofihi me'i Sipi Bo'niuba mina fibo luto lu nimi'ehina'a huto mina fi'ohube.

Pailatiu Yesuhi lili'na hapa'amu loka ho'ehina

Mk 15:2-5; Lk 23:3-5; Yn 18:33-38

¹¹Enali Yesuhi sipi Lomu gamani bomofihi bulo le'mo ho tigo ma luto loka ho'ehina: Kai Yuta bona'magi sipi gihiti bo'ani nohapihe? Ya luto loka hago Yesu lu'ehina: Kaika alu huto nohane. ¹²Enali sipi mono bo hiti Yuta bo olopa bomagi hiti Yesuhi fisa ina kaga'anilo Yesu kaga nona'a meluse legeso huto mino'ehina. ¹³Ya higo Pailatiu lu emi'ehina: Ma bona'magi babu kaga lite kifisa ite ka foyagu kele'me nemalana kai mekeheli'ahapihe? ¹⁴To Yesu Pailatihi kaga'alo nona'a aku'i meluse legeso huto mino'ehina. Ya higo ya'ma sipi Lomu gamani bouba babu ekesa yigi'ehina yabe.

Pailatiu ligo Yesuhi malipu yafalo he'ahana

Mk 15:6-15; Lk 23:13-25; Yn 18:39-19:16

¹⁵Asaga kufugu Pasa nose'na nelata nehana kanalo Lomu gamani bouba naga foyagu nehanaguti asaga boana'magi ya'muya bo li gulu ho etobo lanamofihi nagaluguti fulu ho etolata nohina yabe. ¹⁶Ya'mana kana'alo asaga bona'magi gi'a keheli бага i'ahana bo Balabasiu nagalugu mino'ehina. ¹⁷Asaga boana'i li nupa hago Pailatiu enoloka ho'ehina: Kiyi'afihili lepilube? Balabasihi li gulu ho etobo ya lite nekehelifi to Yesuhi li gulu ho etobo lite lilete nekehelibe? ¹⁸Enali Yesuhi ipakafa helete neminanati ka foyalo le'mo ho ti'ahanamo ni'ibe luto Pailatiu akeheli'ohuto enoloka ho'ehina yabe.

¹⁹Ya luto luloto Pailatiu ka foya nonugu kaba huto nominago liha'auga koko pana'aloga ma luto kaga malago ete lu emi'ahana: Kai foipana'a menina bomofihigi gufalo ana'ina mone li huto mehugo. Nani yatai folugu'i ana hetofa bomofihigi bamu'i bati mehina'a bu goloto'ni ai kumu nugufa'nigu sipi keta nebesi'ehibe.

²⁰Enali sipi mono bo hiti to Yuta olopa bomagi hiti asaga boana'i sipi ka lite enekesa bilete li'ahana: Kai Balabasihi nohe'mi etoto Yesuhi limitogo ho fililune lite lilo li'ahana. ²¹To ya'ma Lomu gamani bouba ka luto enoloka ho'ehina: Ma loe bo neha'ina kiyi'afihigi le'mo nagaluguti gulu ho etalube? Ya ligo enali kehe sipi ite: Balabasi yabe, li'ahana yabe. ²²Pailatiu ya lago lu epi'ehina: Ya lanagi Mesiatini ya'ma Yesuhi nani hena hu etalube? Ya luto enoloka hago asaga bona'magi sipi kehe ite li'ahana: Malipu yafalo ho filibo. ²³Ya lago Pailatiu lu epi'ehina: Hena'mube? Ai henana li sibina hu'ehibe? Ya lina kaga mekehise enali amuya melete kehe sipi mone'a hiti ite li'ahana: Malipu yafalo ho filibo. ²⁴Pailatihi kaga'a asaga bona'magi ho fi telete luba li huto hilana suhi hago Pailatiu bu enogo'ehina. Ya hago ai silaga boana'i enubulo nagami'i liloto yaha'a sese nohuto ma luto lu epi'ehina: Ma bomofihigi ho filise foipana kumu nani nugufalo metilibe. Ya asaga'na lenalitinilogagoko minalibe. ²⁵Ya ligo asaga boana'magi ai ka'alo nona'a lu emi'ahana: Ya'mana ho filise'namofihigi foipanafi lali lugufalo tiloto yagapanatimagi enugufalo leheko malalina'mu yabe. ²⁶Ya lite lago Balabasihi gulu ho etoto le'mo epi'ehina. Ya huloto Yesuhi naga osatu bi yigiloto ho etalo luto gimigi bomagi malipu yafalo halabe'mu enali enayanuga epi'ehina yabe.

Gimigi bomagi Yesuhi kiya yokolo ka li ete'ahana

Mk 15:16-20; Yn 19:2-3

²⁷Enali Lomu gamanimofihigi gimiligi bomagi Yesuhi le'mete gamani nonuga le'mete netigo gimigi bo ana nonuga babu lite nehana ete le'mo bego hi'ahana. ²⁸Ya hilete enali gukete'a li toba helete golaha kata hupa mone'i li hepi ete'ahana. ²⁹To ufeha'a hiti nagatu'i kakili'i mone lolo hilete lataha'agu bi ete'ahana. Ya nehite akepa osahi yahi lamaga'aga bilete enalapusa nohi fi emilete kiya yokolo ka ma lite lu ete'ahana: Yuta bona'magihigi gihiti bo'ani yale. ³⁰Ya lite lilete okabaluga libi'na nehete akepa osahi yahi lamaga'aga li binatu lite lataha'alo i'ahana. ³¹Enali ya lite kiya yokolo ka li etelete golaha kata li hepi etana li toba nehete ai'a kata'a aku'i li hepi ete'ahana. Ya hilete malipu yafalo halune'mu le'mete bi'ahana yabe.

Yesuhi malipu ho fili'ahana

Mk 15:21-32; Lk 23:26-43; Yn 19:17-27

³²Enali kapo melete nebite Sailini metoga bo gi'a Simoni ai'i be gelete fitu fo etete Yesuhi he'moto malipu yafa'a kofi etobo lago ai

kofi he'mo'ehina. ³³Enali hepa'i gi'a mone Gologota yabe luto ni'inalo neheti'ahana. Ana gi'a hapa'amofihi lataha'ani felisa hepa'i yabe lite lilata nehanalo yabe. ³⁴Ekesa'na hiti li sibi sibi hi'ahana bai nagami'i Yesu nalibe lite emigo nesi'asi nokehelinati aku aku'i no bati mehuse he'mi'ehina yabe.

³⁵Enali malipu yafalo nekatu Yesuhi ahelete gukete'a guna ito laliti fato fato'i lilune lite masisi suhi hite he'ahana. ³⁶Ya hilete enali analo nehite Yesu hena hilifi lite ai bota hite mine'ahana. ³⁷Ifo lataha'aga kaga mone ma lite lilete ka foya emi'ahana kaga fayahi gelete mele'ahana: Ana kaga ma luto leka nesabe: Ya'ma Yesu, Ai Yuta Boana'magi Gihiti Bo'ani Yabe. ³⁸Yesuhi luga luga ya kegi'a foipa bole loemo malipu yafalo ete'ehana. Mone bomofihi Yesuhi yahi lamaga'aga nehete mone'amofihi yahi sogaga he'ahana.

³⁹Boana'i enali bila ela hanamagi Yesuhi bugu gili gili nehite bai ka ma lite li ete'ahana: ⁴⁰Kai mono nohi li tele biloto loegi monegi yegegu aku'i gilube lu'ahata bo, yatai kaika kubuto bi negabe. Kai Hu'mamofihi Pana'a nohutomo malipu yafaloti maga limibo. ⁴¹Ana hite, to sipi mono bomagi hiti to keya kaga enelepilata nehana bomagi hiti olopa bomagi hiti moneko ka lite Yesuhi bai'i emite ma lite li'ahana: ⁴²Ai luga'a bona'i li enubuto bilata hu'ehina'a huto ai'a li buto mebibe. Yuta bona'magi gihiti bo'animo nohifi fato bo nohibe? Ai malipu yafa he'miloto magu liminogo lali bu goloto o'yo, ai ma'naka luto gihiti bo nohibe lilune. ⁴³Ai Hu'mamofihi komopa'a emito ai pana'a nohube lulata hu'ehina ai Hu'mau yatai abuto bino. ⁴⁴Etali foipa bo loemo Yesuhi luga luga sopaloga ete'ehana ya'male'i moneko ka lite Yesuhi bai'i emi'aha'ina.

Yesu afili'ehina

Mk 15:33-41; Lk 23:44-49; Yn 19:28-30

p ⁴⁵To fuligaha kanalo asaga hepa'i fi metepu i бага ito buto aku'i yege limi folose kanalo i besa lo'ehina yabe. ⁴⁶Yege alimi falalina kana'a nohigo Yesu sipi kehe ito ma luto lu'ehina: Eli, Eli, lema sabakatani? Ai ya'mana kaga ma luto lu gelehe nohune: Hu'ma'nigabe, Hu'ma'nigabe, kai hena'mu nohe'mi netane? ⁴⁷Ya ligo enali luga'a bona'i ana hepato ho tite nehanamagi ana kaga kehelilete ma lite li'ahana: Ya'ma ai Elaiyahi kehe i noemibe. ⁴⁸To bo mone enali folagaha'aniguti ho tito hololu luto buto kosopa ise'na lite bai nagamilugu i pota giloto lito oto akepalo itini noloto Yesu bili tuto nalibe luto emi'ehina. ⁴⁹Ya nohigo bona'i luga'amagi li'ahana: He'mi'ohubo. Elaiyau oto he'malifi bu galune'mu nohune lite nelago, ⁵⁰Yesu fililube'mu huloto kehe sipi aku'i iloto fili'ehina yabe.

⁵¹Ya higo ana kana'asilo ka'muya sipi mono nonugu hekini lose kata hasalo mele'ahana folaganuguti i hegege huloto ifogati hapi fito si'aga limito i pa so'ehina. To imimali hiti noligo efahi ibe kolibe huto limi'ehina. ⁵²To kene mala

mala keli i hokolo i baga igo Hu'mamofihi boana'a babu lite koyapa'i fili'ahana yatai aku'i ho ti su he'ahana. ⁵³Enali kene mala mala hepa'i he'mi su hete nehago alihi Yesu ho tilago li mone hite sipi tauni hepalugu netigo analo babu bona'magi bu enege'ahana yabe.

⁵⁴Gimi bomagihi sipi bo'ani analo minoto Yesuto kaba hu'ehina hiti to luga'a bona'i hiti imima'i linana hiti to asaga huto hinana be gelete enelesa'ani gofa ligo ma lite li'ahana: Ma'naka luto ma boya Hu'mamofihi Pana'a nohibe. ⁵⁵Babu ana'i Galili hepa'i he'milete Yesuhi he'malune lite mege'i lifite e'ahana anaga mine'ahana. Ya'mana ana'magi foto'i ho tilete nehite gili gili hi'ahana yabe. ⁵⁶Enali folagaha'anigu Magatala meluguti a'i mone Malia yabe. To mone Malia Yemesinogo Yosefenogo ito'atitifu yabe. To Sepetihi pana'a loemale'i ito'atitifu hiti mine'ahana yabe.

Yesuhi keli he'ahana

Mk 15:42-47; Lk 23:50-56; Yn 19:38-42

⁵⁷Yege limi nofalago fe'noho bo Alimatia hepatogati o'ehina bo gi'a Yosefe, ai ana huto Yesuhi mege'i molomofa'na huto mino'ehina bo yabe. ⁵⁸Ai Pailati nohinaga buloto Yesuhi gufa'a lilube luto loka ho'ehina. Ya higo Pailatiu lu epigo gimi bomagi gufa'a ite ete emi'ahana. ⁵⁹To Yosefeu Yesuhi gufa'a alito gulu gulu katatu li sa giloto yabe. ⁶⁰To yuhufa lolo hu'ehina muli efa kapo'agu gufa'a li bi'ehina. Ya huloto sipi efahi mone li behe behe huto kasihalo hekini loloto abufa hu'ehina yabe. ⁶¹Ya nohigo a'i loemale'i Magatala a'i Malia yagi to mone Malia hiti mulito mapahi fite mine'aha'ibe.

Gimi bomagi kene mala mala keli bagalo kaba gimi gi'ahana

⁶²To Yuta bona'magihi fuli kana ana'ina li tulu huse kana'ani yago'a yabe luto nina asu holago enali sipi mono bona'i hiti to Felosi bona'i hiti Pailati nohinaga li nupa hi'ahana. ⁶³Ya hilete ma li'ahana: Sipi bo yale, ai fagalo bouba mefili'ohuto kaga mone ma luto lu'ehina lu kimilune. Loegi monegi yupahi minoto'ni aku'i ho tiluna'mu yabe luto lu'ehina. ⁶⁴Ya hu'ehinagi kai gimi bonakamagihi kaga litogo bite loegi monegi yupahi minalifa lite kene keli baga'alo amuya melete i hekini leno. Koko pana'amagi faga lite gufa'a gumina lilete asaga boanatoga ai aku'i kene keliguti ho ti'ehibe lite enimi'i mele lalabe. Yatai faga li'ahanauba koyapa'i faga lilanamofihi be ligilibe. ⁶⁵Pailatiu ma luto lu epi'ehina: Lenali mono nohi kaba gimi gilata nehana bona'i luga'a bite enele'malo. ⁶⁶Ai ya ligo enali bite kene mala mala keli baga'alo ule'ale hite keya'i suhi hite hekini lo bati hi'ahana yabe. To gimi bo luga'a analo kaba gimi gite mine'ahana yabe.

Yesu mulimoguti ho ti'ehina

Mk 16:1-10; Lk 24:1-12; Yn 20:1-10

28 ¹To etehi go'i noligo Yuta bona'magi fuli yupaha'ani salelegu su halube'mu nohigo loe a'i Malia Magatala to ya'ma fato Malia

hiti muli'mogu bi'aha'ina. ²To mele'isi mone imima'i sipinamo li'ehina. Hu'mau mone agelo ho lifigo limi'ehina boubu ya'ma mulimofihi efapo hekini lose'na li koli he'mito ana efapolo mino'ehina. ³Ya'ma agelo okaba'alo kopisi'na suhi huto besa besa lo'ehigo to gukete ana huto koholina sipi'amo huto hu'ehina. ⁴To gimi bomagi ai'li be gelete sipi koli hite afoya foya ilete enubu neta neta bite melugu ke'ahana.

⁵To agelouba a'male'i lu etimi'ehina: Letali koli mehiliyo. Yesu malipu yafalo ho fili'ahana bo kumu sa sa neha'inamo'mu akeheli'ohube. ⁶Ai malo'i menohinagihe. Ai fili'ehinagati aku ho tilube luto lu'ehina'a ya huto ho ti'ehibe. Ete manugu tilete koyapa'i gufa'a ko'ehinalo be galiyo. ⁷To letali yatai koko pana'a nehanalo me'me hite bite fili'ehinagati ho ti'ehibe lite lu epiliyo. Ai Galili kapogu tubuto enali hiti analo fo tumala hilune luto lu'ehinagihe lite lu epiliyo. To nani alu noletumube agelouba ya luto lu'ehina kaga. ⁸Ya noligo ana a'male'i sipi koli hite aku etegepohi nelite muli'moguti he'mite hololu lite bite koko pana'aloga agelomofihi nona'a lu epilube'mu bi'aha'ibe.

⁹To etali hololu lite neba'igo ana'asi enubulo Yesu kapogu huto hu'ehibe. Neha'ifiye? luto lu etimi'ehina. Ya ligo etali ete gigusa'alo nu kilete meto kelete aitoga agoya hu emite mine'aha'ibe. ¹⁰To Yesu lu etimi'ehina: Koli mehiliyo. Nogonamu tamu'ni nehanaga bite Galili kapogu nanitoga enogo fo tumala hilune, luto lu epiliyo, Yesu ya luto lu'ehina.

Gimi bomagihi suguna ka'ani

¹¹To a'male'i kapo melete tauniga neba'igo gimi bona'i mulimogu kaba hi'ahanamagi sipi mono bomagitoga bilete asaga'i be ge'ahananamo lu yege he'ahabe. ¹²To sipi mono bomagi ana kaga kehelilete mono kanisole bona'magitoga bite li gehesa hi'ahana. To ya'ma mono bomagi gimi bona'i efahi epilune'mu nehabe. ¹³Hena'mugope? Enali lu epi'ahana: Yesuhi koko pana'amagi folugu'i ete gufa'a lenali lenubu'i kelete nehago gumina lite fenene hi'ahabe. Ya kaga lu epilo, lite lu epi'ahana. ¹⁴To ana kanisole bomagi kaga mone hiti lu epi'ahana: To, Lomu kaba boubu ya'ma lenali lenubu'i ke'ahana kagamofihi kehelilenogo lali ya'mana aitoga bati hu lepalalune, lite li'ahana. ¹⁵Ya lu epi'ahago gimi bomagi o'yo lite efaha'ani nona'a lilete to mono kanisole bona'i kaga'ani boana'magihi ya'ma lu epi'ahabe. Ya'ma faga luse'na'ani minoba minoba huto bilina'mu yabe. Yatai Yuta bona'i anana keheli amuya mele'ahana.

Yesu koko pana'amagihi enubulo huto hu'ehina
Mk 16:14-18; Lk 24:36-49; Yn 20:19-23; Apo 1:6-8

¹⁶To Yesuhi koko pana'a nayahi luga luga su hago nigigusagati mone heleko malago Galili kapologa bilete koyapa'i Yesu mone kosagu

enelepi'ehinaga fo tumala hilune lutomo ti'ahana. ¹⁷To nehetite Yesuhi be gelete aitoga agoya hu emi'ahana. Enali mone luga'amagi yigise loe lae hilete Yesu nohifi fato bo nohifi lite keheli'ahana. ¹⁸Yesu koko pana'amagihi ma luto lu epi'ehina: Kokulumalugu hiti melugu hiti asaga'na kaba hilane lutomo Afo'nifu ya'ma nimi'ehina. ¹⁹Yamu'i lenali asaga melugu bonatoga bite nani naga'ni enele'mo lolo hilo. To ana bona'magihi afo'nifihi gi'alo hiti pana'amofihi gi'alo hiti to Sikalafu'mofihi enigilo li melete nagami'i folo epalalo. ²⁰To asaga nani lu lepi'ohuna ka lenali bite lu enelepinogo kehelite liyafa hite mege'i malalabe. To lenali kehelilo. Nani lenali hiti asaga yupahi moneka nohinogoti ma me'i su halina kanagu hiti lenali aku'i minaluta'mu yabe.